


1100. 93




IL ME PAIS

STRENNA POPOLAR

PAL 1855







Lit. Seit 3.

IL ME PAIS

STRENNA POPOLAR

PAL 1855

AN PRIN



GURIZZA

G. B. SEITZ, TIPOGR. LITOGR. EDITOR.

THE END

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

Il me pais lè vergin come il mar :

No lè un chiamp, no lè un suart, no lè un altar.

Induvinci di A. G.

PREFAZION.

Parcè di no? Za che no si pol fà miracui, fin almanco lunaris.

Jera un piez che i smiravi. Ma una vos mi diseva dentri: E po dopo? Ogni stella lè daventada cumò una cometa; e l'influss che corr, mett propri i sgrizulaz nellis venis.

Cun dut chist, la voja no podeva lassami. Zira, volta, messeda — la brusadula mi mostrava simpri un sol viars. Tant val dunchia tentala: chiapai la pena, ed ecco che il libri lè fat.

Ben o mal, ce m'impuarta? Lè paraltri fatt oun coscienza, e mi basta.

Qualchi veritat gi sarà registrada: veritaz qualchi volta che scottin — ma jo soi fatt cusì: scrivi simpri cull'anima. E po? di mal no uèi, di ben no si olsa, disin — e la veritat corr, parcè che nissun no gi bada par propri cont, e pai altris lè mercanzia che fas agio.

La paraula sai che lè roza, come il dialett che fevelli. Ma anchia chist no lè un mal. Se jo foss Dante, faress forsi scrivi ogni galanton in sta maniera: par chel puor lunarista che soi, mi diress content, se almanco il cinquanta par cent dei mei lettors faress pensà come che jo scrivi.

Se il libri no fas fiasco, vi lu prometti di an in an fin che soi viv — val a di, finche vivarà in me il desideri di jessi util a qualchidun, la qual chiossa lè l'istess come di, che il me libri vivarà fin che i mei lettors varan bisugna di lèilu. —

No podaressin fà dunchia un patt: comedassi un e l'altri? — Lejèt, e mi risponderà il uestri cur. Intant ualemit ben scomenzand da cumò — e a rivodişi, speri.

FEDERIGO COMELLI.

FAZ E PROMESSIS.

Cui scomenza dal principi e cui dal fin: nualtris scomenzia dal-
l' indiz.
Ma l' indiz no podial vè anchia lui un pensier, un desideri e una
fede?

(Pag. V. **Introduzion**) Chist libri a lè fat come i fruz: a
domanda: — Se foss lezit, diress che al preja.

Ma preja no ul di simpri amà: anchia il paron
qualchi volta preja e bastona.

(„ **VII. Faz e promessis**). E la risposta di dulà vegna-
raja? Dall'esperienza di cui che lu jà fat, e dalla
coscienza di chei che saran boins di capilu.

Par conseguenza, chist libri lè un preparament,
lè un pen, lè una promessa: badait che no manchi.

(„ **I. Ricuarz**). Meiorà, ecco il sò desideri. Istrui, ecco il miez,
lessi lett, no cui voi, ma cull'anima; ecco il pre-
mi che al spieta.

Dunchia - a vualtris e al timp. Ce che si pode-
va si jà fatt: ce che uressin farin forsi nel seguit.

(„ **15. Il Friul oriental**). Dall' uv alla cova; dalla scuna
alla fuessa: chista lè la patria; e nualtris gi sin fioi
e i soi paris.

Amala - un bisugn. Stimala - un dovè. Cognos-
sila, una consolazion. Sei zardin o cimiteri, anchia
la tiara jà un'anima.

(„ **21. La strada di fiar e il Prediel**). Cui che ama
lavora. Cui che pensa lavora. Cui che patiss lavora.
E cui lè in chist mond che no patissi, che no
pensi e no ami?

E industria lè lavor — dunchia vita.

(„ **29. Tre bisuins e tre risorsis**). Dal mal che si pa-
tiss s'impura a cognossi il ben che si podaress
gioldi. Chist lè il secret dell'esperienza plui granda.

Pensin dunchia simpri che la natura lè benefica
a cui che la cir; e lè avara par cui che la dis-
menteja.

(„ **33. Sino a chiasa?**). Lessi puor ul di ve poc; jessi in-
digent ul di ve manchianza del necessari. Vè inedia
ul di no podè nanchia pitocà par la vita.

La caritat solleva; la beneficenza preven i mai e
l'avviliment e il disonor della miseria.

(Pag. 41. **Ce isa l' art ?**). No basta chialà, bisugna viodi: no basta viodi, occor di sinti.

All'anima vera ul bontat, sapienza e bellezza. E l'art viv cull'anima.

(„ **46. Un invenzion par nualtris**). Cussi faseva me pari — Art polfrona di vivi senza art e senza cur e senza anima!

L'on medita parcè che lè on: i pos previodin, i tros profitin, dug' dal ben gioldin.

(„ **49. Poesiis.**) La poesia lè la prima paraula dei popui. Prima di pensà si sint; prima di ragionà si spera o si vùi.

Cui che plui gusta la paraula del sentiment lè chel che plui patiss o plui ama. No' dovaressin sei a chist pont: Lein e sintinla.

(„ **54. Di pal in frascia — Raccont.**) Il fogolar del puor ard par miracul. Pensà a lui ul di preparassi a judalu.

(„ **76. La me storia**). La civiltat confuarta la fede. Consultin i nestris trenta secui di vita, e viodaria che la stella della salut lè vizzina.

(„ **90. Il sistema metric e lis nestris misuris.**) La natura nus jà dat dei fradis, la societat quasi diress dei nemis.

Ragguaglià lis usanzis lè ragguaglià i sentimentz e i principis: lè unissi.

(„ **99 L' abecè dell' economista.**) Usà la ment a raccolzi ul di prosperà ben nel dividi. — Ualè e pedè, ecco una lezion che dà fuarza. — Scienza lè providenza.

(„ **103 Quatri freduris**). Cui fevella e cui pensa; cui pensa e cui fas.

Vè il pensier nella paraula e la volontat del ben nellis operis, lè vivi la vita degna dell' on — o preparala.

E cumò jo domandi: vino preparat qualche chiossa? Che Dio nus judi! vin promitut; e la volontat no manchiava.

DIARI

1

ZENNAR

RICUARZ

L'inviar no lè la muart. L'inviar lè anzi la preparazion della vita.

Al Contadin

La natura ul il so diritt, e l'on ubbidiss alla natura. Quand che il contadin lè nel miez dei soi chiamps, che pensi che il so lavor lè come' che al foss di di il prin ministro della providenza.

Io mi fermi culi sora un punt. Chista lè la stagion che s'implantin lis chiarandis intor ai podess. — I nestris antics vevin invece il dio *Tiarmid*: un dio senza braz e senza giambis, che protezzeva soltant culla so persona di piera i confins dilung là che jerin. Ce ispirazion santa no lè vera? — Parcè vino bisugna cumò dei fossai e dellis chiarandis, che lor stessis no bastin, e che puartin via tanta' porzion di teren che podaress dà ale di miei che no spinis? E chista usanza lè freschia; parcè che za cent ain un viazzador frances alsi maraveava di no vè chiatat in Italia nissun ripar fra confin e confiu — e ogni nestri galanton si consolava della so maravea. — Quand che plantais lis chiarandis, ricuardaissit del dio *Tiarmid* e del frances che vi disì, e pensait che la sicurezza lè biella, ma che nissun impediment material val plui della pizeria che nus offriss la coscienza dell'anima.

- 1 Lunis
- 2 Marters
- 3 Miarcui
- 4 Joiba
- 5 Vinars
- 6 Sabida
- 7 Domenia
- 8 Lunis
- 9 Marters
- 10 Miarcui
- 11 Joiba
- 12 Vinars
- 13 Sabida
- 14 Domenia
- 15 Lunis
- 16 Marters
- 17 Miarcui
- 18 Joiba
- 19 Vinars
- 20 Sabida
- 21 Domenia
- 22 Lunis
- 23 Marters
- 24 Miarcui
- 25 Joiba
- 26 Vinars
- 27 Sabida
- 28 Domenia
- 29 Lunis
- 30 Marters
- 31 Miarcui

FEVRAR

- 1 Joiba
- 2 Vinars
- 3 Sabida
- 4 Domenia
- 5 Lunis
- 6 Marters
- 7 Miarcui
- 8 Joiba
- 9 Vinars
- 10 Sabida
- 11 Domenia
- 12 Lunis
- 13 Marters
- 14 Miarcui
- 15 Joiba
- 16 Vinars
- 17 Sabida
- 18 Domenia
- 19 Lunis
- 20 Marters
- 21 Miarcui
- 22 Joiba
- 23 Vinars
- 24 Sabida
- 25 Domenia
- 26 Lunis
- 27 Marters
- 28 Miarcui

RICUARZ

I estrems si tocchin: e il principi della ricchezza confina cul principi della miseria.

Al Possident.

La destinazion del proprietari di terens no lè chè di possedi; lè chè di direzi e di fà. Il contadin ja par capital i soi braz e l'esperienza; il possident dev vè par capital la volontat del progress — quindi il studi e la scienza.

In chist mes che scomenzin i vers lavors della campagna, antigamenti i nestris viej costumavin, che ogni lavor al vignis scomenzat dal paron culla so famèa; pò lu chialeva a continuà il contadin. — No vi par che jera una usanza benedetta anchia chista? Pal sior jera una scuola, pal puor un consuart. — Cumò paraltri podarress jessi fatt alc di plui: invece di mostrà si pol insegnà: invece di scomenzà cù propriis braz, si pol direzi cun la propria ment: e la ment umana no valial forsi plui dellis mans? — S'un t'una quantitativ compagna di teren, in Ingilterra si giava un prodott di 20, e in Franza di 13. E in Ingilterra si jà fonz e clima manco propizis, e la proporzion dei agricultors lè di 22 par ogni cent animis di popolazion, mentrì che in Franza riva quasi al quaranta. — Da ce derivia sta differenza? — studiagit su un an: il parcé vi lu dirai un'altra volta; e viodarin se lavjn d'accordo.

MARZ.

RICUARZ.

—

Ce ulin di lis marzadis? Che il principi della vita lè come chel della muart — un travai, un dolor, un fastidi.

All'artisan.

Saveso cè che uareva di una *primavera* trenta secui indaùr di nualtris? Uareva di una *distruzion*.

Dug i prins fruz della tiara, dellis bestis e dei umin, si ju sacrificava in chista stagion, in part par dà come un tribut a Dio, in part par sfogà in sta maniera chel aument di popolazion che jera un aument di miseria.

Ma parcè si faseva chist sacrifici in chè stagion nella qual torna a sfiori la vita, e no pluitost quand che la natura pàr che finissi quasi di vivi? — La reson lè natural, e a vualtris plui che a qualunque altri dev jessi clara — Il salvadi, viv della zór-nada, come vualtris; al viv della providenza. D'instat l'on raccolz — d'inviar al consuma. D'instat il soreli chiol la suarza al lavor — il lavor dell'inviar confuarta miei del soreli il sang nellis venis. — Tignit a menz: in chist mes, che il puor al fàsi i soi conz: cui che si ja proviadut a timp cuntra la miseria dell'inviar, chiatarà che nell'inviar al si jà preparat la ricchiezza della primavera: — e nualtris no sin plui salvadis, nè la società lè par nuja.

- 1 Joiba
- 2 Vinars
- 3 Sabida
- 4 Domenia
- 5 Lunis
- 6 Marters
- 7 Miarcui
- 8 Joiba
- 9 Vinars
- 10 Sabida
- 11 Domenia
- 12 Lunis
- 13 Marters
- 14 Miarcui
- 15 Joiba
- 16 Vinars
- 17 Sabida
- 18 Domenia
- 19 Lunis
- 20 Marters
- 21 Miarcui
- 22 Joiba
- 23 Vinars
- 24 Sabida
- 25 Domenia
- 26 Lunis
- 27 Marters
- 28 Miarcui
- 29 Joiba
- 30 Vinars
- 31 Sabida

—

AVRIL

—

- 1 Domenia
- 2 Lunis
- 3 Marters
- 4 Miarcui
- 5 Joiba
- 6 Vinars
- 7 Sabida
- 8 Domenia
- 9 Lunis
- 10 Marters
- 11 Miarcui
- 12 Joiba
- 13 Vinars
- 14 Sabida
- 15 Domenia
- 16 Lunis
- 17 Marters
- 18 Miarcui
- 19 Joiba
- 20 Vinars
- 21 Sabida
- 22 Domenia
- 23 Lunis
- 24 Marters
- 25 Miarcui
- 26 Joiba
- 27 Vinars
- 28 Sabida
- 29 Domenia
- 30 Lunis

—

RICUARZ.

Il pan lè un aliment; dut il rest una prosperitat. La vita vera scomenza dall'abbondanza.

All'industriant.

Sulla fin di chist mes si principia a fà nassi il cavalir: l'industria plui biella, e uarin sperà la plui richia del nestri pais.

Son mil e trecent ain in punt cumò che 'o scrivi, che il cavalir capitava dall'India in Europa. Mil e trecent ain son qualchi chiossa. Fait un confront cul bombas. Nel 1791 (son sasantatre ain) Hargraut inventava la filadura del coton; e a chist ora no lè quasi un miserabil in duta l'Europa che non di vebi in duess una chiamesa, o sulla taula un mantil. No confuarta chist cont? No ulial di svilup, progress, perfezionament della vita? — L'industria a chist ora fas vivi lis popolazions cun doi tiarz di fadia e cun t'un quart della spesa che accorreva una volta — le calcul fat: e l'industriant del di di uè vodagna la metat di plui di chel che vodeguava cinquanta ain fà: par conseguenza, stabilit il 12 pell'unitat d'una volta, cumò vin chist risultat: 9 il lavor, 16 il vodagn, 13 il consum — la vita in compless lè diventada di $\frac{5}{12}$ manco chiara, plui preziosa, plui libera. — Badait che l'ocasion del progress no nus schiampi.

MAI

RICUARZ.

Chialàit la tiara: dug i prodoz si preparin, e pàr quasi che clàmin la benedizion di Dio e dell'opera umana!

Alla Famea.

- 1 Marters
- 2 Miarcui
- 3 Joiba
- 4 Vinars
- 5 Sabida
- 6 Domenia
- 7 Lunis
- 8 Marters
- 9 Miarcui
- 10 Joiba
- 11 Vinars
- 12 Sabida
- 13 Domenia
- 14 Lunis
- 15 Marters
- 16 Miarcui
- 17 Joiba
- 18 Vinars
- 19 Sabida
- 20 Domenia
- 21 Lunis
- 22 Marters
- 23 Miarcui
- 24 Joiba
- 25 Vinars
- 26 Sabida
- 27 Domenia
- 28 Lunis
- 29 Marters
- 30 Miarcui
- 31 Joiba

Ecco un'altra memoria: chist mes, pai nostris viei, jera il mes consacrat allis gnozzis. Cent e ving bunis generazioni in daùr, il matrimoni jera un marchiàt nella so vera forma — una santificazion della famèa nel so principi e nell'intenzion. In chista stagion ches tribùs menavin assieme duta la zoventut di famèa; e si scomenzava l'inchiant dellis feminis. Dalla plui biella si scomenzava, dalla plui deforme si finiva la vendita. I regai che si raccolzeva cullis primis siarvivin a dotà lis secondis; e in sta maniera no si lassava nissuna senza il sostegno di un marid, e senza l'amor prezios d'una famea. — Confrontait i costums: in chei timps i nestris viei jerin barbar — ma i lor costums nus insegnin almanco chist ca: che il principi della famèa jera plui sacro par lor, di chel che sei forsi cumò par nualtris. Nualtris vin tignut cont della vendita, e vin abbandonat la famèa, vin conservat simpri l'inchiant, e schiaffoin l'anima.

ZUIN

-
- 1 Vinars
 - 2 Sabida
 - 3 Domenia
 - 4 Lunis
 - 5 Marters
 - 6 Miarcui
 - 7 Joiba
 - 8 Vinars
 - 9 Sabida
 - 10 Domenia
 - 11 Lunis
 - 12 Marters
 - 13 Miarcui
 - 14 Joiba
 - 15 Vinars
 - 16 Sabida
 - 17 Domenia
 - 18 Lunis
 - 19 Marters
 - 20 Miarcui
 - 21 Joiba
 - 22 Vinars
 - 23 Sabida
 - 24 Domenia
 - 25 Lunis
 - 26 Marters
 - 27 Miarcui
 - 28 Joiba
 - 29 Vinars
 - 30 Sabida
-

RICUARZ

Providenza lè il pensier, providenza i affiez, providenza i bisuins, providenza il lavor, providenza il principi, providenza il fin d'ogni roba.

Ai Marchiadanz.

Lè cà il mes della uestra divinitat: anchia chist uso nus lè vignut da chei popui che son staz paris dei nostris paris, e dai quai vin ereditat l'esperienza di pensà, di amà, di confuarta i bisuins della vita.

L'intenzion di chei vici jera forsi di procurà in chist mes un protetor nel dio del commerci; o covava l'idea di contentalu'cui sacrificis, par no vè plui bisugna di lui, quand che il mes dei raccolz ves soddisfat allis necessitaz della vita?

La natura proviod, e l'on previod, diss un proverbì. E la miseria di chist mes lè la disperazion della int quand che l'on no soccor alla stessa natura; come che la richiezza di chist mes lè la disperazion dell'on che no profitta dei beneficis della natura. — La providenza dell'on lè pensà, preparà, proviodi, previodi, e chel che plui val, assistisi: il principi ver del commerci.

LUI.

RICUARZ.

Cui che semèna raccolz: no lè la
vita in chist proverbi dell'anima?

Al sior.

Cui lé nel mond che jà un diritt
alla ricchezza? Cui esist sulla tiara
che vebi come par un dovè la miseria?

Quand che l'on raccolz, che 'l pensi
che almanco il cine o il quatri par cent
della int no raccolzin mai nuja; e che
ottanta ain fà l'indigenza rivava in
qualchi luc a superà il quart della
popolazion che viveva.

Nei prins tiamps la stagion della
raccolta jera la cucagna del puor:
spigolava. Nel medio evo i convenz
cirivin e distribuivin. Nel nestri secuf
si dona.

Ma il don plui biel lè il lavor;
parcè che il lavor nobilita e no stan-
ca; juda e no avviliss; ricrea e sod-
disfa allis necessitaz della vita.

E quand si podial donà plui l'oc-
casion del lavor, che nel moment che
Dio profund la so grazia?

- 1 Domenia
- 2 Lunis
- 3 Marters
- 4 Miarcui
- 5 Joiba
- 6 Vinars
- 7 Sabida
- 8 Domenia
- 9 Lunis
- 10 Marters
- 11 Miarcui
- 12 Joiba
- 13 Vinars
- 14 Sabida
- 15 Domenia
- 16 Lunis
- 17 Marters
- 18 Miarcui
- 19 Joiba
- 20 Vinars
- 21 Sabida
- 22 Domenia
- 23 Lunis
- 24 Marters
- 25 Miarcui
- 26 Joiba
- 27 Vinars
- 28 Sabida
- 29 Domenia
- 30 Lunis
- 31 Marters

RICUARZ.**AGOST.**

Aumentà e sparagnà — ecco la regola dell'economia che la natura nus mostra.

Al puor.

- 1 Miarcui
- 2 Joiba
- 3 Vinars
- 4 Sabida
- 5 Domenia
- 6 Lunis
- 7 Marters
- 8 Miarcui
- 9 Joiba
- 10 Vinars
- 11 Sabida
- 12 Domenia
- 13 Lunis
- 14 Marters
- 15 Miarcui
- 16 Joiba
- 17 Vinars
- 18 Sabida
- 19 Domenia
- 20 Lunis
- 21 Marters
- 22 Miarcui
- 23 Joiba
- 24 Vinars
- 25 Sabida
- 26 Domenia
- 27 Lunis
- 28 Marters
- 29 Miarcui
- 30 Joiba
- 31 Vinars

Il sorg ture si maduriss, e la polenta si prepara par sostentà la miseria.

Croderessiso vualtris che si podarress tirà la vita indenant senza la blava? E pur no son nanchia doi secul e miez che ca di nualtris si mangia pan di sorg e polenta. Intor al 1560 al capitava chist gran nell'Europa — non si sà ben se dall'America o se propri dall'Asia. Nel 1610 si lu semenà qualchi poc nel Friul. Dis ain dopo si lu viodè par la prima volta sul marchiât a Udin — e da chel moment in poi, vo saveso ce prodott che'l si ja fatt; e ce risorsa che lè daventada.

Visaisit qualchi volta di chist — e badait anchia a chist altri cont che vi fasi: dal 1500 al 1600, il presi medi del forment in Friul faseva lis 7 liris (2 fi. 20 k.) par star: nel 1592 a si lu pajà a 36 e mieza — plui che quintuplicat il valor ordinari. Pensagit: la fan del disasiet no si la jà paiada tant chiara. E nel secul dopo l'Europa ja vut 33 ain di chiestrestia e undis di fan, cun t'un tiarz appena di popolazion a confront della nestra.

Cun chist jo intindi nujaltri che mostravi, che il puor uè no lè tant puor come una volta, e che cul timp uarin sperà che al finirà di jessilu affatt, e par simpri.

RICUARZ.**SETTEMBAR**

Il riposo della natura no lè un ozi:
lè una meditazion, un confuart, una
promessa.

Al proletari.

- 1 Sabida
2 Domenia
3 Lunis
4 Marters
5 Miarcui
6 Joiba
7 Vinars
8 Sabida
9 Domenia
10 Lunis
11 Marters
12 Miarcui
13 Joiba
14 Vinars
15 Sabida
16 Domenia
17 Lunis
18 Marters
19 Miarcui
20 Joiba
21 Vinars
22 Sabida
23 Domenia
24 Lunis
25 Marters
26 Miarcui
27 Joiba
28 Vinars
29 Sabida
30 Domenia

Cui che no possed nuja, no possed
nanchia la stima dei umin: par jessi
amaz e stimaz occor o fortuna, o braz,
o talenz, e voluntat di dopraju: la
miseria fas compassion, e la compas-
sion no consola.

Chist lè il mes che finiss di lavorà
la campagna, e cumò scomenza il la-
vor plui grand della cittat, il lavor
dell'industria: la uestra vendema. Le-
jet e consolaissit.

Sul principi del secul in Italia si
pajava in media un lavorant di cam-
pagna a 17 k. par zornada di lavor;
cumò si lu paja 23 e plui.

Nella Prussia si pajava il zorna-
lier industriant a 26 k. cumò ricev
37 par zornada.

In Franza al veva 21, e cumò al-
l'otten 31.

In Inghilterra l'agricoltor vodegna-
va 3 l. par settimana, e cumò al ri-
cev 4 e 5, e nei ain di gran lavor,
come nel 1814, fin 7 $\frac{1}{2}$ par settima-
na; e pal lavorant di manufacturis l'au-
ment lè in proporzion di 3 a 40.

E doi o trè secui in daùr, saveso
ce che si pajava in Europa il lavor a
zorna a? S solz di Franza d'instat, e
6 d'inviar, chel che no bastava par vivi.

No lè un mejorament anchia chist?
e par cumò no nus basta?

OTTOBAR.

-
- 1 Lunis
 - 2 Marters
 - 3 Miarcui
 - 4 Joiba
 - 5 Vinars
 - 6 Sabida
 - 7 Domenia
 - 8 Lunis
 - 9 Marters
 - 10 Miarcui
 - 11 Joiba
 - 12 Vinars
 - 13 Sabida
 - 14 Domenia
 - 15 Lunis
 - 16 Marters
 - 17 Miarcui
 - 18 Joiba
 - 19 Vinars
 - 20 Sabida
 - 21 Domenia
 - 22 Lunis
 - 23 Marters
 - 24 Miarcui
 - 25 Joiba
 - 26 Vinars
 - 27 Sabida
 - 28 Domenia
 - 29 Lunis
 - 30 Marters
 - 31 Miarcui
-

RICUARZ.

Quand che j braz finissin di lavorà, che scomenzi il pensier: — l'anima vegla o mur.

Ai pos.

Sòn vizinis lis scuelis: il mal lè che i scuels an di son, ma i mestris nus manchin.

I nestris antics vevin una specie di scuola anchia lor: ma la lor sala jera una piazza, e scuelsar dut il popul.

Al dì di uè, no s'impara, si judica: e la cattedra lè come il pulpit, il pulpit, come la scena, la scena come il casot, e il casot una trappula.

In Ingilterra ogni agricoltor lè un economista e un inzegner in miniatura; ogni industriant lè un mecanic e un chimic. In Franza si studia sui libris, sui chiamps, nei viaz, nellis fabbrichis, sora i fluns, sullis navs. In Germania si lavora e s'impara. La braùra dei nestris viei nus ja fat dismentejà che la braùra no polsa. E beat chel che gi pensa!

Da Adam in cà ogni on lè un scuellar: no saress ora di risussità la stampa dei mestris?

Son pos che lu podin fà: e a chei pos jo ài consacrat chista pagina: fede, volontat e coslanza.

NOVEMBAR

RICUARZ.

-
- 1 Joiba
 - 2 Vinars
 - 3 Sabida
 - 4 Domenia
 - 5 Lunis
 - 6 Marters
 - 7 Miarcui
 - 8 Joiba
 - 9 Vinars
 - 10 Sabida
 - 11 Domenia
 - 12 Lunis
 - 13 Marters
 - 14 Miarcui
 - 15 Joiba
 - 16 Vinars
 - 17 Sabida
 - 18 Domenia
 - 19 Lunis
 - 20 Marters
 - 21 Miarcui
 - 22 Joiba
 - 23 Vinars
 - 24 Sabida
 - 25 Domenia
 - 26 Lunis
 - 27 Marters
 - 28 Miarcui
 - 29 Joiba
 - 30 Vinars
-

Tre san Martins son l'istess che un incendi, — lè un American che fevella.

Ai tros.

Chel istess american nus diseva: sparagnà ogni zornada un centesim, ul di jessi rics. — Ma cumò che finiss l'an economic, cui lè che podial fà i conz e repeti: jai sparagnat ogni dì un centesim?

Quand che i nestris viei dividevin il timp in sècui, ain, mes, zornadis, oris, minuz, pàr come che vessin meditat all' economia del lavor, alla misura dell' opera. Il fà no lè simpri braùra, e fà prest no ul dì simpri fà ben, come che fà ben no ul dì simpri fà prest: l'utilitat verà lè di fà prest e ben — il timp svola e no spieta. E il fin dell' an lè chel che mostra cui che jà savut lavorà tropp e ben — il san Martin nus la prova.

Ma parcè lè stat dit che tre san Martins son l'istess che un incendi;? Prima di dut, parcè che ogni cambiamento lè fatal; po, parcè che i cambiamentz son come il segno dei mal-affars; pò parcè che il mal ven cul mal, e par vè il ben bisugna chioilu da capo.

DECEMBAR

RICUARZ

No finiss ben chel che chiol, finiss
ben chel che torna.

A dug.

- 1 Sabida
2 Domenia
3 Lunis
4 Marters
5 Miarcui
6 Joiba
7 Vinars
8 Sabida
9 Domenia
10 Lunis
11 Marters
12 Miarcui
13 Joiba
14 Vinars
15 Sabida
16 Domenia
17 Lunis
18 Marters
19 Miarcui
20 Joiba
21 Vinars
22 Sabida
23 Domenia
24 Lunis
25 Marters
26 Miarcui
27 Joiba
28 Vinars
29 Sabida
30 Domenia
31 Lunis

L'an lè come il codiz d'un debitor:
chiol e torna.

E l'invier lè tornad, par medità un
altra volta la so preparazion della vita.

L'è il mes della dea Vestal: lus,
candor, e prudenza: la plui biella di-
vinitat dei mei paris!

Lè il mes del riposo: pas, ritira-
tezza e union: il plui dèn costum del-
la patria!

L'on si ritira: il puor par no pa-
ti; il sior par gioldi.

Lavor al puor, contentezza al sior
— ecco ce che pol dà la stagion del
riposo.

Ogni fiesta del rice paja par quatri
dis la miseria a cent miserabii.

La struscia d'ogni miserabil mett
a contribuzion quatri capitai di cent
rices.

Providenza anchia chista, quand
che no si pol chiatà previdenza.

Ma dug' chisg' ricuarz ce ricuar-
din? — Poc, amis mei: ricuardin che
sin vifs come che vivevin i paris —
e disin che il cuarp chiol fuarza parcé
che ja manco reson di vai — e che
l'anima patiss, e pensa.

(Una nota par traviers) (Caviè e rispuestis)

— E i sanz ? — Son in paradis, fradis. — E lis festis? — Tasèt che lis festis, voja o no, caplin anchia senza il lunari. — E la luna? — Negozi? La luna mi la jai sparagnada par me, parce che nissun la batt miet, vi lu zuri. Par no disgustavi paraltri, ecco ca: spartin la polpetta. I miarz lassinju in pas; la luna se vi occor vait a cirila nel poz; e par cui che ama l'ozì, cùt sòt son volt ain di festis, e che al fusi cucagna.

An	Corrispondenza cul periodo			Ritt cattolic-Roman						Ritt ebraic				Principi dell'an ture	Ciel. an. d. Egitto	Qualità dell'an				
	Giulian	Ebraic	Ture	N. aureo	Epatta	Cielo solar	Letera dominic.	Indiz. rom.	Pleniluni o limit		Fiesta	Fiesta pascal se- cond i riti Giulian o grec-russo.					Bell. domin. del principi Giulian	An gnov	Zorn. dell'an	Pasca
												Stil vieri	Stil gnov							
1855	6567	5616	1272	13	12	16	G	13	1 april	8 april	27 marz	8 april	15 Sett.	B	385	5 april	15 sett.	12	com.	
1856	6568	5617	1273	14	25	17	F E	14	21 marz	25 mar.	15 april	27 april	A G	354	354	20 april	4	15	bises.	
1857	6569	5618	1274	15	4	18	D	15	9 april	12 april	7 april	19 april	F	355	355	9 april	22 ago.	14	com.	
1858	6570	5619	1275	16	15	19	C	1	29 marz	4 april	25 marz	4 april	E	385	385	50 marz	11	45	*	
1859	6571	5620	1276	17	26	20	B	2	17 april	24 april	12 april	24 april	D	354	354	10 april	1	16	*	
1860	6572	5621	1277	18	7	21	A G	3	6 april	8 april	5 april	15 april	C B	385	385	7 april	20 lui	17	bises.	
1861	6573	5622	1278	19	18	22	F	4	26 marz	51 mar.	25 april	5 mai	A	385	385	26 marz	9	18	com.	
1862	6574	5623	1279	1	23		E	5	15 april	20 april	8 april	20 april	G	354	354	15 marz	29 zuin	19	*	

L'equinozi di primavera al chiad invariabilmente al 21 di marz ogni an. Il prin pleniluni che i ven dopo e che pol sei dal 21 di marz fin al 18 di avril come che chidareso registrat cà parsora (?), lè la base del calendari ecclesiastic roman. — La prima domenica che seguiss al prin pleniluni dopo l'equinozi di primavera lè la PASCA cristiana. — Quarantasis dis prima di Pasca scomenza la quaresima; e dal miarcu dellis veneris indaur fin all' Epifania che ven ai 6 di zenar, dadis dis dopo Nadal, lè la durada del periodo carnealesc. — Quaranta dis dopo Pasca chid la Seensa (di Joiba); cinquanta dis dopo Pasca lè la Pentecoste (di Domenica); cinquantaset, la Trinitat (di Domenica); e sessanta, il Corpus domini (di Joiba). Duttis lis altris festis son fissis. — Par cognossi po il timp dellis fasis lunars, ognun pol regalassi daur il pleniluni indicat (?), calcotand 29 dis e 5 oris par ogni rivoluzion, e dividind in quadri parz chel periodo, par partia fur da se stess i quars, i gnons e lis plenis, come che ognudin senza a jessi lunaris pol fulu, tant plui che i minuz par vuallris no contin. — A cui po che no i basta chist tant, che volti chiarita: daur sta pagina chiatara il sang des sos venis, e la poesia del so cur che lu spietta.

MARGHERA

Adelsberg 29 mai, 24 agost, 18 ottobar, 3 dezembar.

Aidussina 26 mai, 24 zuin.

Ajel 5 6 novembar.

Aquileja 27 marz, 12 lui, 24 dezembar.

Buccova 1 mai.

Cacig 26 mai. — Canal 6 novembar.

Cervignan 14 novembar.

Cividat 27 lui, 29 settembar 10 11 12 novembar

l'ultima Sabida d'ogni mes.

Comen sul Chiars 20 marz, 13 novembar.

Corgnal 10 avril, 9 novembar.

Cormons 25 26 27 zuin, 3 settembar.

S. Cros 12 zuin, 14 settembar. — S. Danel 7 zennar.

Duin 24 zuin.

Gurizza 16 marz, 24 agost, 29 settembar, 30 novembar.

I marchiaz mensii d'animalia, l'ultima joiba d'ogni mes.

Gradischia 20 21 zenar, 25 26 fevvar, lunis e marters
dopo l'ottava di Pascha, lunis e marters dopo la do-
menia 1.^a d'agost, 12 settembar, 25 26 ottobar.

Idria 1^v avril, 16 mai, 21 settembar, 11, nov. e 4 dez.

Lubiana 25 zennar, 1 mai, 30 zuin, 20 novembar.

Migea 13 zuin. — Monfalcon 20 marz e 6 dezembar.

Palma 21 lui, seconda, tiarza e quarta settimana di ot-
tobar, e ogni second lunis di mes.

Plez 20 marz. — Quisca 24 avril, 16 ottobar.

Romans 25 lui,

Ronzina 30 novembar.

Samaria 3 fevvar e 22 novembar.

Sessana 3 mai e 14 settembar.

Sutta sul Chiars 1 settembar.

Tulmin 20 avril, 21 settembar.


Turiae 20 avril, 9 ottobar, 9 dezembar.

Udin 16 17 18 zennar, 13 14 15 fevvar, 20 al 26 avril,

30 31 mai, 5 al 20 agost. 24 novembar. e 3 dezembar.

Vippaù 27 fevvar, 18 avril, 4 settembar, 28 ottobar.





IL FRIUL ORIENTAL.

Come un ullima ondada, che si butta a ciri jett e riposo si presenta la natura della nestra provincia a cui che ven dal cur dell'Italia, e si direz viarz chel sublim padiglion della nestra frontiera, lis alpis. — Ul poc par induvinà il miracul della so creazion. Mar e po vulcans da principi; po fluns che corint paralei ai monz si butarin a plane jù nella marina, preparand chè crosta di tiara, che cumò abitin e nus nudriss; in ultin il ritiro dellis aghis, e la propagazion dei animai e des plantis.

Alzait i voi a che lungia cresta di monz, che son staz il prin ricovero dellis antighissimis nestris tribùs montanaris. Chè biella ponta inclinada in jù viars di no del mont Kern, no pàr che saludi il pais che si fasè patria e zardin dei soi fioi, che culi vignirin a purgà la lor asprezza selvadia? Chel intai roscat della lungia prominenza del Matajur, no pàr che al disi nel so lengaz: stait cujez, che par culi no si passa? — e daùr chei doi monz cussi bieci si sollevin altris montagnis, e pò altris e altris anchiamò come che diseva un nestri poeta, infin che po dopo, lontan lontan s'incontra la patria d'un altra stirpe e d'un altra fevella.

Il Terglau, che in strett rapuart geografic al apparten veramenti alla Carintia, lè il plui alt fra chei monz che si clamarin alpis Giulis, fin dal moment che Giulio Cesar ju traviarsà par la uera dei Gai: sora il livel del mar al si solleva 10400 pis di Vienna. Ma il Mannhard, che lè propri nestri dalla so banda di cà, au di conta 8500, e il Rasur an di jà 8200. Ma a contaju dug quang, vi faressin una litania di 67 noms, non biella ciart, ma pur tant chiara par cui che la preja.

Fra duttis ches sommitaz, un labirint di vals e di fluns s'incrosa di duttis lis bandis; e par comprendi la

bellezza di chel lavor magnific della natura, bisogna jessi staz làssu, vè percorut dug' chei senos, vè salutat l'alba dall'altezza di vot mil pis sora il mar, vè innalzata la ment a chel tal che la ja fatta — nel miez della gnot, fra l'oscuritat di un buron, quand che l'eco dellis vals repet cent voltis ogni sussur dei tons che sbrundulin, e che i lamps vi mostrin il precipizi sott i pis, e una magla di dusinta clasters di altezza traviars i voi che la chialin.

Fur dellis visceris di chei monz plovins jù continuenti, come tang fii d'arint, duttis ches aghis che benedissin della lor freschiura l'istad ardint dellis nestris planuris. L'Isunz fra dug' chei fluns al primeggia. Il Lusinz, che ven fur sora Trenta quasi all'ombra del Caniauz che si slanza anchia chel là plui di vot mil pis dal livel della nestra marina. Serpeggiant fra ches golis di mont, il nestri biel flun al cor cun t'un pendio ruinos viars tramontà di soreli fin nella val di Ucea, poc lontan dal mont Baba, alt anchia chel 6600 pis, a 7 miis lontan di Plez, in linea retta. Sora Saga al plea sul vint di siroc, e riva cun dos oris di viaz su Chiauret, là che al si fas manco rapid e plui viart e plui limpid. Su chist pont, Dio sa in ce epochis, il so jet continuand la strada che al ten cumò, si univa cun chel del Nadison, che al jess dal mont Stù a circa 1200 pis di altezza, e che rivat allis spallis del Mia al si buta cumò a ponent del Matajur, mentri che in altris timps chiaminava a tramontana di chel mont e continuava il so cors par la val presint del Lusinz, puartant ju il nom di Nadison fin a Aquilea e alla fosa. No vi dirai la bellezza di, chè vallada. Se rivaio una volta lassù, montait sulla collina di sant Antoni. Buttait ju i voi a dretta e a zanca, vicin, lontan, là che pol mai tirà la vista; e vi assicuri che fareso il segno della cros, e benediress la Natura e chel Dio che la ja fatta. — Dopo rivat a Tulmin, il Lusiuz al si zira quasi a miez di, e fra i crez di Santa Lucia si strenz in un canal di

tre clasters, cun t'una profunditat di cuntuardis, fasind paura a chel tal che lu chiala. Sott Gurizza abbandona lis monz, al si fas viart e seren, e al scor traviars chë planura che za cognoseso. Da Rubia a Sagrad tochia sulla so zanca l'ultima falda del Chiars, e po dopo, fin che si convertiss nella Sdobba, scor simpri egual liber e clar fra Gradischin, Flumisel e l'Isula.

Da Gurizza fin quasi alla Chiusa di Plez la strada della Carintia no abandona che dos solis voltis chist flun. E una volta, quand che la Chiusa, il Chiaschiel di Tulmin, Canal, Salcan, Gurizza, Manizza, Gradischia, e Fojan protezzevin sta linea, l'Isunz si poteva clamalu il cuntrafuart della nestra frontiera, la cuntrafuessa des alpis. Cumò lè viart come una strada ferrata, o al plui al plui si presenta come la dogana dell' opinion, che chiala e passa.

Il caracter della part superior di chista provincia lè come che Dio lu ja fatt: sever e sacro. Lassù vj par di chiatà anchiamò il dio Crono — l'antiga personificazione della patria, e lis Ermis — la divinizzazion del diritt e della sicurezza. E nell'espression della int, l'on di studi induvina in qualchi moment il Pelasgo anti-celtic, che cun dut il so istint del vagà, ama la so tana e i soi fis, e chiatà il mond in chè so spanna di tiara.

Di pas in pas che vignind ju dal Prediel vastu acquistand la planura, l'austeritat della montagna e la natura aspra del popul van piardinsi biel plane, insin che tu no chiatistu plui che un ingrispament inclinat di terens e una scletezza di costums che innamorin. Cajù no incontristu plui l'inspirazion del coraggio che si fàs par necessitat come indifferent al pericol: culi s'induvina pluitost chel pensier che suggeriva ai prins popui l'adorazion di Beleno — il dio dellis profeziis — il dio quindi della scienza e della providenza.

Fra lis alpis e il mar, la nestra provincia si estind sun t'una superficie quadrada di circa 840 miis italianis. Tre son lis regions — e triplicat si podaress quasi di il

clima. La montagna che cun t'una temperadura media invernala di 0°. 4 si ugguaglia al clima di Praga, nudriss int sana, robusta, superior ai strapaz, come che si conven all'antiuardia d'un popul. L' altiplan che abbrazza la zona di Gurizza e dellis saldis del Cuei a 280 pis circa di altezza e sulla latitudine di 45.° 57, nus dà la int uaress quasi di dell'industria, comeche nus la presenta Milan cun t'un clima che gi si avvicina (22.° 4 d'instat, 1° 9 d'invier media temperatura). La planura po' nus dà propri l'on della poesia come che il so calor medio di quasi 21 graz d'instat, poc manco della Toscana stessa, no pol manchià di prometti, parcè che la vita lè fuc, e il fuc erodemit a me, lè poesia. (1).

I pas, traviars i nestris confins, an di son tre. Il Prediel, che mena in Carintia e che chiad sott il Mannhard, lè all'altezza di 3672 pis di Vienna. Chel di Prevailt alt 1902, che vò nella Carniola. E chel di Opchina di 1262, che mett a Triest, e in Dalmazia. Il prin, protett dallis aghis e dai monz, i seconz uardaz da nujaltri che dal voli di Dio.

Il mar che pal nestri pais al si viarz sun chè linea serena e duta seminada di puarz e di isulis che chiamin dal Timau all'Ausa (i doi altris confins naturai di chista porzion di Friul), raccolz duttis lis nestris corrio, e lè il golf adriatic — chel mar che pai Italians in qualchi epoca si podeva di un lago. Chist mar cuviarzeva una volta duta la nestra planura, e si alzava ai tims primitivs fin al di sora dellis stessis montagnis: sul Prediel all'altezza di circa 3700 pis sora il mar attual podaress mostravi lis petrificazioni di capis e di crostaceos marins; e daùr Chiauret a un altezza di 900 pis

(1) Chistis notizis son desuntis da osservazioni parzials, confrontadis cull'esattezza plui granda che jera pussibil nella manchiànza di esperienzis plui sicuris e plui regolars. Cussì no us garantirai nanchia la misurazione della ploja, che, seconduna memoria della Societat agraria, nus dà a Gurizza un'altezza media annual di polliz parigins 57. 04. —

viodaressiso anchiamò un anel di fiar che serviva par assicurà lis barchis che lassù bordeggiavin. Cettang miars di ain vess doprat il mar par ritirassi come che cumò lu viodin, no esist barba di on che lu podì indicavi. — La so corrint chiamina paralella alla linea oriental della riva, vignind da Corfù fin dentri al nestri sen, dal qual si volta po dopo a miez di, zirand culla sponda occidental dei so jet; par cui nus resta spiegada la colmazion dei puarz e la sparizion dellis isulis, che una volta si chiatavin a sèi sul so cors. — Il fluss e rifluss lè normal: 3 pis si alza la colma ordinaria: ogni 24 oris il rifluss ritarda 44 minuz: la fella, che lè il stat medì dell'aga, succed regolarmenti ogni prin e ogni ultim quart di luna e dura da 6 a 7 dis. Lis gran secchis e lis gran colmis di zennar e fevvar dan la massima di 4 pis ogni volta. — La peschia lè abbondant intor Grau. La laguna, tajada da vinchiaquatri canai, presenta una profunditat massima di 38 pis e 10 oncis nel flun Anfora, a 4800 clafters di sott Aquileja; la minima profunditat del flun stess vicin alla so fosa major di Portobuso, al dà 11 pis e 3 oncis. — La linea marittima nestra fra confin e confin conta 22 miis, senza notà i ondeggiamentz dei soi senos. Sott Duin lè aspra e impraticabil — dal Timau in ju, senza la permission dei palluz, nissun nemi pol tocchiala.


E la vegetazion? Biella come che la Natura sà dàlla: puora paraltri a confront di chel che podaress falla daventà la providenza dei umin.

La vit e il morar pròsperin dilung sù, dalla marina nei monz; la prima fin sora Ronzina e qualchi poc anchia intor di Talmin a 600 pis di elevazion; il second fin a Sochia, a circa 1800 pis sora il mar. Lassù lè il roul che ven tant ben come il laris, e nellis vals ven sù come il fen anchia il sarasin e la blava. Cajù lè il forment che si nudriss cussi ben come il fic; la mandula come il cinquantin; il miluz ingranat come il zarfoi la chianaipa e lis lupulis. Quasi pardut, si mostrin lis fre-

gulis e l'uliv; e nel plan si viod qualchi volta cul soreli di lui e d'agost, madurissi all'aria il naranz e il limon, che in qualchi luc, nell'inviar, no varessin mai nanchia bisogna di stúa.

Tasind della pozzolana, del chiarbon fossil, del ram, del fiar, della soda e di tang'altris minerali che duarmin anchiamò nella ment dei doz e nellis visceris della natura, i nestris prodoz son za tai, che podin mantigni una popolazion di 184,129 animis. — In montagna lis mandris e lis as; nella planura il gran, il vin e la seda; nella marina la peschia — ecco lis nestris richiezzis. Quand che seso sul mar, fra Grau e san Pieri d'orio, alzait i voi allis monz: benedit ches montagnis — saludait la punta del Kern cun chel nul che al fuma simpri come l'incens dell'omaggio — e pensait che par nuja no son là che vi chialin, pensait che la natura ja vut anchia jè un pensier nel crealis.

E cumò una paraula anchia al popul. A chialai nella front vo gi chiataiso dos razzis — come a consultà i noms che nus puartin. Il voli seur, il chiaveli neri o castagn, il nas rifilat sora via, di quasi duta la int del plan, nus palesa la stirpe italica propria. Ii nas larg e tajat di sott in sù, il chiavelli biond e tirad, e il voli fra gris e celest, della int superior, nus disin l'origine oltremontana della stirpe gallo — celtica. — Guriza, la capital della provincia, e l'antiga cittat Norica o Norizia, che second tros pàr che i ves dat il principi e il nom, nus dà cul so nom l'idea di una dellis primis popolazions del pais, latina di origine. Cussi istessamenti altris lucs, come Marian, la villa di Mario; Cassean la villa di Cassio; Predaman, il podè (*praedia*) di Manlio. Mentri Viarsa (*Birsa*) aga fraida; Topojan (*Topoule*) lug dei pòui; Mernice, lug della pas; Medana, lug del miel; Lucinis, sit divisor, nus clamin al pensier l'invasion posterior di chei Slavos, che nella montagna fevellin anchiamò la lor lenga, messedada par altir cun chel dialett austero e sever che i nestris viei forsi





da trenta secui in ca nus jan mandat cul amor del propri pais, e cun lis tradiziuns della prima famèa. L'on della moatagna lè dur ma ospital, fred ma amorevul, litigant ma nell'istess timp (colpa la lungia abitudin dell'ubbedi) mansuet e servil. L'on della planura lè liber, viv, disinvolt, sicur di sè stess, e plen quasi diress di ambizion o di chel amorpropri che agita. Caratters dens di messedassi un nell'altri; pasta d'int, che consola; metal, che nel crusul della providenza no daress mai lega.

Su chista varietat di oggez, ecco sbozzat chel pais che abitin — cimiteri dei nestris antenaz, scuna dei fioi che jan di nàssi. A descrivi dut quant il poema della nestra natura, uaressin cent libris e una vision di profeta, e no siet chiartis e l'inspirazion della memoria che no uaress jessi memoria e lè pur simpri memoria. Chisg' ain che vegnaran, jo passarai nei dettaglios: chiolarai lis paraulis dalla coscienza: dall'opera della natura vegnarin alla fattura dell'on: dall'on tornar in a Dio. Instant, saludait ogni mattina il mont Kern — e preja it l'ave nel saludalu, in memoria di chel che ves lett, e come un vot par chel che podarai favi lèi forsi nel seguit.

La strada di liar e il Prediel.

Varino dunchia sti stradis? Vatil a peschia fradi; che jo no soi bon di rispundi. Chel che sai lè, che nus staressin ben un mond, e che se no lis varin, sarà di bàtti la fievera.

Poh! no stin dàssila po cussi disperada. In fin dei conz una strada plui, una manco...!

S'intind; una strada lè simpri una strada, e par fassi sipili, basta chè che vò in cimiteri. Ma jo, fradis

mei, da galanton vi lu disi, che se no viodi sulla chiarta geografica un par di braz che si buttin un nella Carintia, un a Milan, cun t'una biella coda viars Triest op-pur dulà che uareso, mi par che no duarmarai mai cujet. Figuràissit il centro caiù: io disi il centro par nualtris, saveso; e cun tun pàr di salz d'una banda chiatami nei magazinz di Triest, cun tre altris dall' altra a Udin a Vignesia a Milan; e viodi ploi ju par culi i legnams, i fiars, il plomb di Carintia come par una gran vena di vita, — a le di vè qualchì fregul di speranza mi par, e a lè di sperà che la strada del cimiteri varà i nestris uess si, ma no lis nestris miseris.

Par altri, a dila scleta, lè una storia lungia par nualtris chista benedetta strada del Prediel. Se lis chiantis no fallin a son za doi secui e miez che si batt a che quarta. Sott l'arciduca Carlo, nel mil e cinc cent, si veva viart alla Carintia il passaz fin alla nestra marina cun chè strada di rompicuel che nus mena anchiamò su per Chiauret e par Plez fin a Tàrvis. Ma za in chei timps, nei quai no si badava di schiavezzassi una giamba di plui o di manco e no si pensava di sparnizzà i cerviei pal teren, jessind che za senza altri si veva fat testament a chiasa prima di mòvisi; anchia in chei timps, jo disevi, i nestris paris vevin capit che al jera una strada di giaz chè lassù, e che par un cristian jera un tentà propri il Signor nel fidà sora di je la propria vita e lis propriis sostanzis. Par chist nel 1606, nel 1611, nel 18, nel 21, nel 42, nel cinquantacinc di chel secul, e dopo, indenant, fin ai nestris dis, a si cerchià simpri di quarta la facenda a bon fin. Ma i carintians, radunaz nel gran chiapitul dei staz, saveso ce che diserin ai 18 di marz del 1679? “ Che i gurizanz uarevin smercià in chè maniera i lor vins, e che par lor, buna int di Carintia, al jera dut un diàu il bevi il vin furlan che al vigni su d'una banda o dall'altra „

La bagatella del mar crodèso che la vebin capida? Poh! Contaimit a me chistis storis!

Ma cumò, seguitand nualtris a marchiellà simpri par chel viars, ce' dirane? Che uarin disuedai la so bira?

E in chei timps si trattava di spindi, induvinait mo ce tant? Quindis mil flurins, nè plui nè manco. Da chist si viod ce mud che si lava culla fiacca in che volta. Al di di uè scomettin ce che costa? Cinc cent mil florins... Misericordia!... — E ce bastin!

Ma par chist, còla il mond forsi? Prima di dut, un million uè nol val nanchia un millesim. No disi miga par la reson della chiarta: in confront d'una volta, anchia la zvanzica jà piardut la so lega. E po (a dilu cà in confidenza), lassait che si spindi! za an diel: e se no bàstin, si domanda: ogni galanton pol simpri mandà fur chel che no pol passà la bochia del stomit! — No fèvelli mo ben? — No vi par che anin perfettamenti d'accordo?

Ma tornand dunchia a bomba, jo disevi che chè strada nus staress ben un mond, e che cumò podin lassàsi stargià un poc il cur, parcè che in ogni cas a si ordinà che gi si assumi il proget, e il progiet si lavora. Inzegners dunchia di cà e di là del confin. Palinis che smàin. Piramidis di clas che mostrin, a perpetua memoria, i livèi. Mi par propri di viodila, e un sgrizul di plasè al mi cor su par lis venis. Se savaressiso ce providenza, ce cucagna! — Uarin che vebin di nassi cajù lis fabrichis come i fongs. — E come che mandin lis farinis del Timàu e di Strazig in America, uarin mandà lis macchinis nell'Inghilterra e lis sedis in China. Uarin fà miracui, uarin... Ma dulà vadi jo cul cerviel! Fin prima i conz sora i dez, e po disin che son quatri. —

Chiapin dunchia lis robis par fil, mettinlis in clàr, e chiamin cun tun fregul di ordin. La strada di fiar ja di sèi la viscera nestra; l'arteria come che si dis, della vita. I nestris prodoz valaràn il dopli, e i prodoz dei altris valaràn par nualtris la metat. Nus occorreran gràns nell'an della miseria? Cun quatri siviladis del vapor, ecco culi i formenz e la blava della Valachia e della Russia. Nus occorreran bez nei ain di abbondanza? Cun quatri

remenadis del stantuf ecco che varin mandat lis nestris raccoltis pai quatri vinz della tiara.

Ma in chista maniera puartarin la chiestia nel pais! — Seso maz? Disèt pluistost che varin finit di suspirà la miseria. Sino forsi tant siors che no si jà di vè dibisugna del prossim? Chialait un poc ce tantis chiossis che nus occorin e che nus stan ben come il pan che si mangia. Intant i animai dell' Ungiaria par parà ju un bocon di chiar dopo la nestra mignestra. I uelis dell' Istria par cunzà lis nestris salatis. I lens dellis montagnis cà daür di nualtris, par cuèi ce che occor e par schialdanus il sang inglazat nellis venis nei mes d'inviar. I veris di Boemia par riparassi dal chiald, dal fred, dal vint, dalla ploja, o pai vas o ches altris storis che occorin. Il chiarbon d'Ingilterra par fà corri lis machinis dei nestris lavoratoris. I minerai di dug i pais, o par danus un raccolt par la tiara, o par procuranus la resistenza dei murs sotta l'aga, o par fani i stromenz, lis machinis, e chei tang' tarabàtui di chiasa che son cussi necessaris. La lana di Germania per cuviarzinus; il lin di Lombardia par fà linzù e chiamesis; lis sedis del Piemont e di Franza par fà un pochia di comparsa alla fiesta; il bombàs dell'America o del Bengàl par tièssi la coto-nina del puòr; i limons di Sicilia par distudà lis inflamzions dell' instat; lis ladrìs della China par cujetanus lis fievaris; i sài, i àciz, i spiriz, lis droghis, che siarvin in dug i bisùins della vita. E vi par che sèi poc? Vi par che pensand a duta sta litania di chiossis che nualtris no possedin, si podia siarà i braz in cros sulla schena, e tirà su la muraja della China sui quatri nestri confins, senza pensà che son altris pais in chist mond e altra int che nus spieta sul gran marchiàt della vita? E jò no vi jai dit una decima part di chel che nus occor. Che se uaress là ogni poc par sutil, se ves di divilis sù dutis come che lis jai nel cerviel, no finiressin ciart in un mes a dàvila curta.

Ma no stàit miga spaurisi, se nualtris dovin rico-

gnossisi tributaris di tanta part di mond cullis nestris tantis necessitaz. Par l'amor di Dio, no stait pensà disgrazis; che nualtris, grazis a Dio, no vin paura di muri di fan anchia senza l'ajut di chei pòpui che jai ricuardat ca parsora. Se si uaress, si podaress ben vivi senza bisugna di nissun. Ma l'om ja un istint nobil che lu separa dai istinz grossolans dellis bestis: l'istint di stà simpri miei. Par chist lui al si dà lis mans attor. Par chist lui al cerchia no solamenti chel che gi occor par tirà il flat, ma chel che gi stà ben o par non pati, o par vivi plui comut, o per gioldi.

Io lu sai ben tant che qualunque altri, che chista provincia a lè un pais agricul, val a di dedicat principalmente alla coltivazion dellis tiaris, in grazia del so clima dolz e dei terens abbastanza fertii. Il lavor della tiara nus dà press a poc chel che nus occor par tirà indenant di zornada in zornada la vita. Ma un popol unicamenti agricul và soggett prima di dut ai ains di chiarestia; po all'augment della popolazion che nel cressi al si viod schiampà simpri plui la tiara sott i pis; in ultim a lè slav dellis circostanzis — uei di, che vivint isolat e in braz a un sol miez di campala, al pol chiatassi nel cas di viòdisi da un an all'altri abbassassi alla metat il valor dellis sos possessions, o par colpa della prosperitat dei pais che lu circondin, o par colpa d'un discredit dell'agricoltura che suced nei ain della chiarestia, dellis disgraziis privadis, o dell'abbondanza di prodoz che da altris pais podin capitagi allis spallis.

Lè par chist mutiv viodeso, che una volta i nestris viei consideravin come una providenza chè nettada di int che faseva o una pesta o una uera. Par chist anchia nualtris viodin da un secul in cà, là in malora lis famèis plui antighis e plui fuartis, e subentràgi una posidenza guova, improvvisa, minuda, chiolta su la plui part dai speculators di commerci e d'industria.

Liberaz invece da chist isolament, e distraz dal

metti propri ladris nella tiara, ecco che si costrinz la int a buttassi appunt o al commerci o all'industria. E chisg' gnovs rams di speculazion ce nus dano? Prima di dut nus jevin da chè sclavitut di spietà un boccon di pan da ches quatri spannis di tiarache nus sostegnin. Nus libera da chè ristrettezza di no usà nel vivi domestic di nissun altri miez che di chel dei prodoz campestris. Po, chel che nus vanza, mandin ai altris, par vè da lor chei tai ogez che nus manchin. Po, dal vodagn che risulta da chista prima speculazion, si chiazin a meiorà l'agricultura stessa. Chista, meiorada che sei, nus puarta un frut o plui biel a plui bon o plui abbondant. Cun chist meiorament o aument di prodot, cressin il capital; slargin la nestra operazion produtiva; din man ai minerali che in nessun pais no manchin; profitin dei combustibii che suplissin alla manchianza dei lens; mettin in moto lis aghis, un capital muart che pol rindi il dusinta per cent; si promòvin lis navigazions dei canai e dei fluns; il mar si avizzina alla montagna; il coraggio dei navigators (come che al diseva un grand italian) trapassa come un spirit di vita in chè int superior che a cor jù a cambià lis sos raccoltis cullis maniffatturis e i prodoz tropicali, e impara da lor a procurassi cull'art, dai propri lor chiamps, fin la seda e quasi lis droghis, e a sparagnà cun la propria industria il tribut perfìn di chei tiessuz che nassin nel Bengàl e nella China, e che i tellars di Lion e di Londra nus fan jessi insin cumò tributaris dei nestris sudors all'Ingilterra e alla Franza.

Cumò, par capimior chista storia, sintit chist che vi disi. Fin che nualtris no vevin un commerci, il nestri pais no veva nanchia un industria. Cumò tignit a menz, che senza industria, un popul, ai nestris timp, no pol vivi, o al vivarà puòr e sogget a chei tai che san fà i lor conz mior di lui. — I nestris paris, si contavin parons asseluz di lor stess, e, come che jai dit za prima, a lèrin dug in malora. Parcè? — Lor si spietavin dut dalla natura; nuja speravin mai dall'on: lè il caratter

della int di campagna. Parons di nujaltri che di qualche chiamp di tiara, ognun al veva chel che vevin chei altris. I soi voi no passavin di là della propria chiaranda, i soi pis no fasevin mai un pass nella chiasa del propri visin. Ogni villa jera un pais, ogni chiasa un pizzul regno. Separaz instà maniera fra di lor, jessind che nissun crodeva di vè bisugna dell'altri, e jessind che dug vevin chei stess bisugns, e chè maniera stessa di proviodisi, al manchiava par conseguenza fra lor ogni commerci. Vivind simpri in chei confins, fasèva il fi cèl che veva fat il pari, e nissun si figurava che a si podess fà altrimenti e miei. Jera la conservazion d'una roba che no pol conservassi: uèi di l'indipendenza dell'economia individual. Jera la stabilitat d'un principi che dalla so natura le condanat a cambià simpri: intindi di la fortuna. Ma quand che nella prosperitat non si progrediss, allora si chiad in ruina. La ruina dell'antiga possidenza nus prova chista veritat: la risorsa della possidenza gnova nus la dimostra anchiemò plu ben. E nus la dimostra savelo par ce? specialmenti par la reson, che nassuda chist ultima fur della buttega e dai bancs e dallis fabbrichis; invece che riposà e distaccassi dal commerci e dall'industria che la jà creada, al si armonizzà cuu lor e all'ingrandi la ricchezza.

Ma i braz che l'industria chiol alla tiara? — Pauris di fruz. Ai nestris dis no si mur plu di fan. E pò; parcè, si lamentin che lis popolazions crescin massa? Parcè tanta int cerchia di là in Crovazia e in Ungiaria a ciri gnovis coloniis? No lè forse una contradizion chist fat cun chel che vualtris diseso? Ma savelo ce che nus manchia? Vi lu dirai jo: il capital. Creàit il capital; e se nus manchià il gran, chiatarin ben cui che nus lu mandi. No stait dunchia vè paura che l'industria butti in malora lis campagnis. Pensait pluitost che gi darà una risorsa. Pensait ai capitai che l'industria ingruma e che traspuarta po sui terens. Pensait ai gnovs prodoz che vi dona, liberanvi dai marchiazfuristirs. Pensait allis richiezzis che crea e dellis quals si nudris,

mentri che l'agricoltor lis disprezzava o lis rifiutava come danosis. Pensait allis aghis, lis pieris, lis arzillis, il legnam, lis torbieris, lis piells, lis scais, i uess, lis sejaduris, e tang altris davòis che je dopra e che a vualtris vi son quasi dug' d'imbroi. Pensait ai lavoranz che nell'unissi insieme quasi in comun o in faméa, dàn un presi ai vivers, e un vodagn a cui che ju vend. Pensait a tantis sortis di vegetai che l'industria vi persuad di coltivà cun straordinaris vantaz. Pensait al lavor del-inviar, di chè trista stagion, nella qual il contadin cunsuma e no vodagna, e che l'industria oltre che occupà una porzion di lor, al dà un miez di sussistenza anchia a chei altris o cul sgiavà canai, o cul cerchià mineraì, o cul proviodi ai traspuars dellis mercanzia, o, se non altri, cul preparagi chè porzion di sparagn che a deriva dal vè lis manifatturis a chiasa lor, e fattis quasi da lor stess, viarzingi par di plui un credit cun la facilitat del vodagn; chel credit, capiso, che a che int procura una sovvenzion nella miseria, o un anticipazion par ches operis di mejorament che promettin gnovis fuarzis al puor, e che al proletari promettin possidenza e richiezza.

Dunchia? — Dunchia, allegamenti! Daisit lis mans intor, fasèt fradellanza fra la proprietat e l'industria, e vebit fede. Parcè che cumò jò disi,: lis stradis commercials, se non crein, almanco facilitin dut chist commerci e duta chista felicissima industria, della qual vi jai fevellat fin culi. Senza stradis no esistin comunicazions, senza comunicazions no si pol ve operositat vera in un pais. Nualtris vin qualche puart. Vin la strada della Cargnola; dopo tre secui, sperin di ve anchia chè di Carintia. La strada di fiar sarà l'arteria principal cun la qual si upiran dutis sti altris comunicazions secondaris. — Il commerci dunchia e l'industria del nestri avviguì dipindin da nualtri che chist: dinsi dunchia coraggio; lavorin e sperin. . . . Ma se la strada di fiar a no capita? Se la strada del Prediel lè stada un sun? — Ma! ce uareso che us disi? Cà lè un altri par di magnis.

Uarà di che jai fat il cont senza l'ostier anchia jo, e allora, par manco mal, fasarin pat cul diàu se nus compra.

Tre bisuins e tre risorsis.

Il nestri pais scomenza a senti tre grandis manchianzis: il combustibil, i foraggios, e il legnam par lis fabbrichis.

In ce maniera che il prin si podaress ottignilu dallis torbieris e dai depuesiz del chiarbon fossil, se uaressin dassi la pena di cirilu là che la natura lè ciart che nus lu ja preparat, vi lu dirai un altri an. Soltant cumò vi ricuardi che dei esperz montanistics jan esaminad lis nestris montagnis, e che la plui part di lor jan judicat che dellis gran venis di chiarbon no podin manchià ca di no, specialmenti nellis montagnis del Cuei; e che un specialmenti fra chisg, ingles e sapient di sti robis, dopo lungs esames e studis pazienz declarava, che la prima chiadena dei monz che coronin chista nestra provincia, lè di una formazion contemporanea a ches che traviarsin l'Irlanda. Cui che capiss chistis storis, dev capi anchia par conseguenza che il chiarbon dev jessi ca come là, e capirà che se si uaress, podaressin forsi ripeti anchia nò chel che diss l'Inghilterra: lis minieris del Sunderland valin plui, che i tesaurs della California.

Un altri an vi mostrarin anchia cettant che podaressin produsi chei ving mil chiamps di palluz abandonaz, che percorrin la linea della nestra marina dal Timàu al flun Aussa. Un timp jera una dellis nestris richiezzis chè fila di praderiis che circondavin Aquileja. Cumò no chiataiso plui chei biei pascul: il ris, la blava e la vit, nus jan usurpat i miors, e

chei che restin no dån la decima part di chel tant del qual vin bisogna. I praz artificiali son un ripiego, ma no si podarà calcolaju mai una risorsa. Chel che occor lè di no chioli al gran il teren del gran; ma di usufruttà la jarba di chel pais che no dev produsi che jarba. — Vi mostrarin nell'istess timp che no lè capital piardut chel che s'investiss nella tiara, e che anchia se no vin a nestra disposizion i braz dei prussians prisonirs par sujà chei palluz, come che un secul fà si fasè cun chei altris, la spesa che nus occorress no domanda ciart il poz di san Petroni par sostignila.

Par chist an dunchia, dopo vevi indicat chisg doi oggez tant importanz e benefics par dà suarza all'agricultura e all'industria, vi favellerin in ristrett solamenti dei boses, che unissin insieme dos providenzis: il combustibil e il legnam par lis fabbrichis. — Un qualchi secul indaür e persin a ricuard dei nestris plui vici, quasi duta la nestra montagna jera fodrada di boses, che l'avviditat dei parons e del contadin estirparin di planta. Scomenzant dal mont di san Valentin, fin al Matajur e il Montmajor, domandait a chei pastors dai chiavei blancs e dalla piel brustulada, e vi diran: ai mei dis cà si pascolava fra i arbui. In qualchi banda, e appunt nel Montmajor che disevi, chiatareso anchiamò nel teren una ret fissa e incrosada di ladris che vi mostrin cimud che lè una veritat chel che disi. Anchia il Chiars jera l'istess: il Chiars, dentri il qual cumò no ses boins di chiatà nualtri che clap e par grazia cà e là qualchi bocon di sterpaja. E il ricuardà chisti chiossis cumò che si stenta tant a vè un bocon di len par schialdassi, dovaress pur rindi accuarta la int, che anchiamò pensa a distrui.

Nel 1852 si veva istituit una societät culà su, appunt par promovi l'imboscamet del Chiars, fra il Vipau e l'Isunz e lis valladis che circondin Triest.

Una intenzion santa jera chè, e Dio uèlì che no sei tramontada.

Qualchidun paraltri veva ridut, e altris si vevin spaventat a chè idea. Ul di che lè int che no ja maipensat alla vita; e par no di qualchi chiosa di pies lè miei tàsi. A fin paraltri di confondiu mior, ecco il nestri proget, che vi spieghi.

Supponet prima di dut una spartizion di territori abastanza minuda, par dividi l'operazion preparatoria dell'imboscamet che si ul fa. Par chiaminà adasi e cun bon profit si assumi il quadri e la descrizion di dug chisg scompartimenz del pais, cull'indicazion della superficie plana e della superficie in pendio di ogni distrett. Si noti par ognun di chisg distrez che disi, il grad d'inclinazion dei monz, i lor senos, e l'altezza major dal level del mar. Si determini i vinz ai quai lè soggetta ogni cima e la suarza di chisg vinz che ordinariamenti lis dominin. La natura del teren, si dev anchia jè analizzala, e si dev par ogni luc classificà la so proprietat di vegetazion, che za da sè stessa si mostra. Dopo chist lavor si calcula i braz e il timp e la spesa che laress pell'imboscamet complet, comprendind anchia chè part puramenti cretosa della montagna, sulla qual si podaress ottigni cul timp una cuviarta di tiara dalla stessa deposizion dellis plantis e dell'aga. In ultim si regola il cors dellis aghis, a fin che no vebin di devasta cullis plòis il lavor, ma si convertisin invece a so benefici.

Fat chist plan che lè plui facil di chel che par a sintilu, daventa una conseguenza necessaria, il proces di assegnà la qualitat, quantitat e maniera dell'imboscamet che si ul fa. Chist lavor, sulla base del proget che vin dit, si lu divid in periodos — un poc par an, e prima in chei luc che son plui favorevui alla coltivazion, e plui al sicur dai vinz e dallis aghis.

Par vigni po al lavor, bisognaress distribui par


ogni distrett il so semenzar e il vivàr dellis plantis. Po si dovaress dividi l'occupazion fra la int in proporzion dei muz e dellis suarzis. E in quant alla maniera di vigni al fat, ecco ce che la natura insegna, cun chè scuola che no ja mai fallat.

Sui monz la natura fas prima spuntà fur i fragars, i rovez, i zinevris, che pàr che si strissinin par tiara come in cerchia di un luc par fà penetrà dentri lis lor barbis, quasi che vessin paura che i vinz no lis sladrisin par aria. Fur di chel graticolat che formin sti plantis modestis, incrosadis fra lor e che tegnin insieme la tiara, scomenzin a alzàssi i baraz e lis plantis spinosis, bassis e ruidis, come che occor ai prins abitanz della tiara che dàn suarza alla tiara. Preparada in sta maniera una difesa cuntra i vinz e lis aghis, ecco che vegnin su biel planc i pins e i fajars, ai quai, come che diss un gran scrittor italian, appena che son d'aventaz grang e robustg, dan luc ches plantis di prima e lassin liber il regno al paron plui biel e plui chiar della montagna.

Là che si presentin i torinz, la natura prepara cull'opera dell'aga stessa che distruz, un rapar a sè stessa. Lis franis siarin ca e là il jet di ches aghis. Fra i clas e lis pieris puartin i vinz qualche fruzzon di semenza. Crescin lis urtiis, i rovez, lis spinis, i roui: e l'operazion che vin dit, torna da capo.

No podia fa l'on a puesta chel che fas la Natura par cas? Dut consist in chist, di ualè: lè par chist che vin il cur e lis suarzis.

Cumò vi dirai solamenti anchia chist — i beneficis che chista operazion puartaress. Prima di dut in qualche an varessin i lens che nus manchin. Cui lens acquistaressin, un capital la montagna, e un aliment alla so industria la planura. Lis aghis varessin finit di sterili il pais superior, e di devastà lis vals e i plans che stan sotto, e che cumò no jan difesa cun-





Lt. S. G.

tra chè ruina che plomba dall'alt. I fluns ricevares-
sin plui regolaritat nel lor cors, parcè che lis mon-
tanis no vegnaressin cussi improvisis e teribilis. I
lor jez no si alzaressin tant come che nass cumò,
cun pericul immens dellis villis e dellis campagnis
vicinis. L'attrazion dellis plantisnus evitaress chei suz
che patin, e nusfermaress ches fumatis che distruzin
tanta part di forment. I nestrìs puarz no vegnaressin
colmaz, e plui sfogo acquistaressin i palluz, e manco
spesa domandaress la conservazion di ches tantis di-
fesis, che son la tiarza impuesta del popul.

No vi par che dut chist sei par alc? Jo lu
speri. Podaress fevellavi anchiamò; ma jai fede che
basti par fami capi, sibben che no jai par altri spe-
ranza che basti par jessi badat, e chel che plui occora-
ress, ubbidit. Par altri jai fiducia che un altri an
podarai di plui sclet ce che pensi; e a chista promessa
del cur jo rimeti me stess e vualtris.



Sino a chiasa?

A plane! Jo spieti prima il comunismo o il di-
luvi — chei doi spauraz, che fan ridi dug chei tai
che no i crodin. — Jessi a chiasa ul di batti il chiv
frallis stellis, chiatassi in pas cun dug'i desideris,
vè, come che al foss di di, finit di bevi il judizi uni-
versal della propria coscienza. — Us parial che cu-
mò, in chel mud che stin, si podia eliantà gloria e
ripeti cun t'una buna sfregolada di mans: sin a
chiasa?

Io domandi se sin a chiasa culla nestra caritat, culla nestra beneficenza. — L'an passat vo ves let nel lunari di Gurizza la storia di chel che jan fatt in chist pais i benefattors del puor infeliz. Vi chia-taressiso chist an in vena di lèi nel me libri un fregul di storia — no di chel che vin fatt, ma di chel che no si ja fatt in confront di tang altris che ferin plui di nualtris?

Lè cussi, come che si diss, un poc di sènape sott il nas, un sbattacul daür la uarela: lè, capiso, una pirula par svejà un poc la fantasia dei galanz-umin, par tochiai la coscienza, par fagi meti una man sul pett, e ripeti come chel vescu: *peccavi!* pensand allis sos vanitaz, allis propriis supiarbis. Che del rest, jo vi disi za culi da principi, che lè miei fa alc che nuja, e che chel poc che al fò fatt lè sim-pri una grazia di Dio. (*) —

Un filosofo ingles jà scompartit i puors in quarantaquatri classis disgraziadis. Ju ja prima divi-duz in fruz, malaz e vèliz; i fruz ju ja separaz in espuesg, abandonaz e uarfin; e cussi di seguit in-denand. Un altri filosofo, frances, al esaminà i bisuins della famèa second lis necessitaz della vita, e chiata che dal puor che par no avvillissi dev puartà la vela-da, fin al puor che senza curassi di nuja al duar partiara e si cuviarz di pezzoz, si podin puartà fur vinchiavot classis di bisognos. Un tiarz filosofo, te-desc, chiolind la media del manteniment necessari, al puartà fur un bisuin zornalier anchia pal plui mi-

(*) A Gurizza vin l'ospedal central della provincia; la dotazion *Vandola* (190 fl. fra dos zovinis all'an); la *fondazion Formica*, che lè un altra dotazion annua par dos zovinis (150 fl. l'una) e sis uarfin (50 fl. par ognun); l'*Orfanotrofi Contavall*; il *mont di pietat l'istitut dei sorz e muz*, e il *ricovero dei fruz abandonaz*. A chisg si podaress azunzi i *stipendis* pai seuelars puors, la *prebenda* dellis famèis nobilis dellis dos contèis, l'*Ospedal di Gradischia* e il *soccors del dadodis* pai indigenz, l'*Ospizi* di Dajel, un istitut di ricovero di Cormons etc., dei quai vi fevellarin un altra volta.

serabil, di nuja manco che di vot carantans in di nella campagna, e di dis in zitat, aumentant di do tiarz l'assegnament par la femina, e di un altri tiarz a reson d'ogni fi. Un quart filosofo, italian, al formà la proporzion dei puors sora dug i pais dell'Europa, e dal so calcul si giava, che la int che mancia del necessari sta in ragguaglio della popolazion su di una media del 18 per cent, cun la differenza che in Italia an di vin una media del 12 par cent, mentri che nel Ingilterra, colpa la gran possidenza che esclud il puor dalla sicurezza della vita regolar a si la quarta sur a 38 e a 40.

Pensait a duta sta int che dev vivi, e che no ja mai nuja di ciart par vivi dalla mattina alla sera. Pensait alla fan di chei infeliz, al fred, al dolor, allis malattiis. Pensait a una puora mari cun tre, quatri e plui fis, che no pol sostigniu. Pensait a ches creaturis che zemin, e che no san parcè che l'on lis condana a tang' mai. Pensait alla disperazion che persuad alla colpa. Pensait alla colpa che prepara il delitt. Pensait alla lez che chiasia il delitt, ricuardansi di cui che lu ja comitut solamenti nel moment di punilu.

Par soccorri a chisg disgrazias, la major part dei quai jan vut par causa dell'indigenza la stessa indigenza che erèditin dal pari e trasmettin nei fis, si pensarin un diluvi di provedimenz, i plui dei quai risultarin inutii, e insufficienz po dug'quang'. Dapprincipi si pensà alla limuesina; po si capì che fa *limuesina* no lè *caritat*; po si viodè che usà *caritat* no lè fa *beneficenza*: e si esaminà miei la vita.

Allora si chiolè a pruibì l'esportazion dei grans dai pais: ma l'agricoltor al fò spaventat e si diminui la produzion e si aumentà la schiarsezza. — Par impedì la sortida del numerari si pruibì subit dopo l'introduzion dei prodoz forestiers; ma i agricoltors si fidarin su chist, la campagna restà trascurada di

plui, s'inchiarì ogni roba, e si multiplicà la miseria. — Si pensà al lavor sfuarzat; ma dividind e sparnizzand lis fameis si chiolè alla creatura i affiez e lis speranzis domesticis, e si rendè odiosa l'occupazione. — Si provà i risparmi sforzos; ma chisg no zovavin al ver miserabil — uei di a chel tal che no pol lavorà par la vita. — Si conseq di reprimi lis grandis affittanzis dei stabii, ma si chiadè nel mal uso e nel mal esempi di suddividi lis fameis del contadin, chiolengi lis fuarzis del lavor in comun, senza dagi i vantaz dell'economia dellis fameis ristrettis. — Un al fè la proposizion di aumentà la quantitat dei prodoz cull'accresciment dellis macchinis; ma aumentant in sta maniera la rendita del sior no si diminuiva la penuria del miserabil. — Altris s'imaginarin di distruzi duttis lis macchinis par impiegà invece la int; ma chista misura schiaffojava un capital e diminuiva la produzion, e jera l'istess che chioli il pan fur di bochia del puor cul inchiarì il presi di ogni roba. — I ultins in fin pensarin d'incamerà l'industria, e di fa amministrà dal guviar il salari e la susistenza del miserabil; ma chist jera un chioli la libertat dei talenz e dei braz, senza accordà alla int nanchia la risorsa d'una proprietat misurada. E in sta maniera ogni progett al fè fiasco.

Da dut chist ca paraltri si capirin dos chiossis: il bisuin di soccorri il puor, e la necessitat d'una riforma social par ottigni un provediment che gi zovi. Non jessind paraltri pussibil una riforma cussi sun doi pis, si capì che la miseria no podega riparassi parcè che lè di so natura incurabil, una volta che esist, e che invece occorreva di prevignila, a fin che un poc alla volta scompariss dalla tiara.

Ca no lè il luc di fevellavi di Godwin e del so progett, che reclamà un gnov patt social, e al clamà par la prima volta la proprietat un usurpazion. No vi fevellarai nanchia di Harrington che al vive-

va prima, nè di Saint-Simon che al vigni dopo, nè di Proudhon che al viv anchiamò, i quai tignirin una strada consimil, e l'ultim dei quai, daür la dottrina di Godwin, al disè ches famosis paraulis: la proprietat lè un furt. Chisg, e tang altris son i riformators che vignirin al mond o massa prest o massa tard, e par conseguenza bisugna lassaju dabanda.

Vi dirai solamenti che Maltus in contrappuest a Godwin, al puartà fur la teoria della popolazion, e al mostrà che chista cress in proporzion geometrica (come doi, quatri, vot, sedis, etc.) mentri i miez di sussistenza si aumentavin solamenti in proporzion aritmetica (doi, quatri, sis, vot, ect.); ualind mostrà cun chist calcul che dug i provedimenz par favori la popolazion stessa son nuajaltri che miez di puartala in ruina. Ma i economisg plui coscienzios provarin che chist principi disperad jera fals, e che da ving ain a sta banda, se la popolazion si veva aumentat in media d'un sest o d'un settim, i prodoz si vevin aumentat plui assai che del dopli.

Chist calcul metè la suarza nel cur a dug i benefattors dell'umana famèa; e i provedimenz di beneficenza scomenzarin a chiapà pid e acquistà impuartanza social. In Italia, che il spirit di caritat jera za stat grand fin dal medio evo, in grazia della pietat in chei timps veramenti religiosa dei convenz e dei fraris, si fò i prins a slargià la pratica di chei esemplis che la scienza e il studi no vevin fat altri che approvaju e sostigniu nel credit che meritavin. Dall'Italia si dilatà l'uso in dug i altris pais e par ogni banda no si pensà nuialtri che educà i fruz, sostegni cul lavor e cù ricoveros i umin e i viei, e preparà a dug una garanzia pall'avvignì mediant il sparagn: ed ecco che la *beneficenza* vè vita.

Da quand che l'arcipredi Datèo fondava a Milan il so *brefotrofio* pai fioi della colpa, fin a chist timp nel qual vi fevelli, son passaz za dis secui.

Durand chist timp, saveso vualtris a ce grandezza che si sollevà nell' Europa la Caritat pubblica, la *Beneficenza* che disi? In pochis paraulis vi lu dirai; staimit attenz — ca son faz, e par no distravi di plui, ca finis la me storia.

I genitors del puor, occupaz nella cerchia o nel lavor, e tormentaz dallis malattiis, a cui podin fidà lis lor creaturis che vain e che domandin inutilmenti chel lat che lis tiri su nella vita? *I ricoveros pai lattanz* raccolzin insieme chei bambins e ju nudrissin. — Ches creaturis di tre o quattri ain che jan bisugna d'una educazion par fassi umin, e d'un mestier par sostignì decorosamenti la vita, mentri abandonaz a lor stess no podin imparà altri che l' ozi e la colpa, vegnin radunaz in chei collegios che si clamin *Asilos infantii*. — Par chei puors fioi che la miseria o il rossor della colpa ja chiolti un pari e una mari che podevin nudriu, son i *Orfanotrofs*, i *asii dei puors uarfsins*. — Pai malaz son i *ospedai*; pai miserabii, pai impotenz e pai viei, son i *Ricoveros di Caritat*. I uarbs, i sorz i muz, jan il lor istitut, nel qual si ju manten e si gi dà cun l'un gnov miracul della pazienza umana, quasi uaress di la vista, l'udit e la fevella, che la natura gi veva nejati. — E ai maz, a chei infeliz ai quai Iddio no lassava nujaltri che il cur e la vita, si dona protezion, caritat, amicizia — lis risorsis dell'anima. — Par correzi i customs del puor che nel vizi al cerchia un sfogo ai soi mai, si crearin lis societaz di temperanza, nellis quals dug chei che gi son inseriz gioldin qualchi benefici e qualchi privilegio, come che saress un premi, una pension o ale altri, cul pat che vebin di usà la frugalitat simpri. — Par ingrandì l'amor dellis arz, del studi, del lavor, del commerci, si formarin lis *Societaz d'incoraggiament*, che lè l'istess che di Societaz che premìn i plui attivs, i plui zelanz, i plui capaz fra

chè int che gi appartegnin. — Par soccorsi ai bisuins del puor lavorant e dell'artisan quand che lis malattiis o la vechiaja o la manchianza del lavor podarressin faju colà nell'inedia, si fondarin lis *Societaz di soccors vicendevul*, che son un alleanza di duta chè int che viv dalla zornada cun qualche mestier, i quai, sparagnand ogni settimana qualche pizzula tassa, di tre, di quatri, di doi carantans, ju mettin in una cassa comun e ju fan amministrà da qualche galanton par mantigni, ogni volta che i tochia, qualchidun dei lor membros chiaduz in disgrazia. — Pai operajos che no sein propri inabii al lavor, ma di qualche maniera impotenz e ridoz alla miseria, son lis *Chiasis d'industria*, nellis quals jan lavor e vodagn, e quand che occor, anchia tet, taula e vistit. — Pai puors che lavorin e i quai cun t'un poc d'inzèn e di economia rivin a metti via qualche flurin, son lis *Cassis di sparagn*, che raccolzin chei bezi, acciochè no vessin di restà muarz e in pericul di spari senza necuarzisi, e che ju mettin a profit, par aumentaju in ving o trenta ain del dopli e del triplo; mettint in sta maniera la puora int nella pussibilitat di partecipà a dug i beneficis del sistema social e a chei della proprietat stessa. — Par chisg istess e par lis fameis poc facoltosis, a qualunque class appartegnin, son lis *assicurazions sulla vita*, che lè come a di la garanzia d'una capital o d'una pension che quand che plui ocor son li in pront par judanus, e mediant i quai, un fi amoros di famèa al sicura alla puora mari, alla sur, alla sposa, ai fioi un bocon di pan par duta la vita; l'agricoltor o l'industriant assicurin, a chei che podin sovegnù, chel poc di capital che gi ven anticipati par fondà o ingrandì il zir dellis lor utilis speculazions; e il vieli, malad, sol, senza jet nè famèa, si assicura chei miez di finì senza disperazion la so vita. — Po son i *Lugs pios elimosiniers*, pai soccors temporaris e eventual; i

Monz di pietat par lis disgrazis improvisis; lis Casis d'imprestìt gratuit; lis unions par l'educazion e (chialait fin dula che lè arrivada la caritat santa dell'on!) fin lis societaz di mejorament pai carceraz e i patronaz par chei che vegnin fur di preson, lis quals si chiolerin la mission benedetta di judà cull'educazion, cull'istruzion, cul consei, cul ricovero, cui capitai, cul lavor chei puors infeliz, che la disgrazia ju veva buttaz alla colpa e al delitt, e che la condana soffiarta ju rigenerà nella vita social, e i dè il diritt e la pussibiltat di jessi rispettaç e amaz purchè il consei, la guida, la protezion e la pietat dei umin no i manchi. —

Operazion lenta e pazienta (diress vualtris) duta sta cà, che puartarà i fruz appena alla settima generazion, come che dis la sentenza di Dio. — Sin d'accordo. Ma providenza lè simpri — e puor chel pais, che no pol o che no ul provala e puartala! Che del rest il rimiedi della beneficenza nol domanda nanchia una cura tant lungia come che vualtris pensaiso; parcè che i soi effiez si multiplichin cui medesims effiez. — Ricuardaissit la storia dei vot chiavai. Se cun doi foi la strada in dos oris, diseva chel vieli, cun quattri la farai in una, e cun vot in nissuna. Cussi della civiltat, mi capiso. Ma cun veritat pluì sicura.

E i beneficis della beneficenza son chisg': prima di dut il proletari acquista la dignitat dell'on anchia lui; po dopo i soi costums si mejorin; pò la educazion e l'istruzion gi fas ottigni un caracter; pò la sicurezza della sussistenza gi dà anima nel lavor: — nass l'emulazion; i sparagns gi fan acquistà credit; il credit gi procura una proprietat; — scomparissin un poc alla volta lis causis dei vizis e l'istigazion al delitt; si crèa la famèa onorada e rispettada; si avvicinin lis classis della societat; si dilata simpri pluì l'eguaglianza moral e civil della int; si forma l'as-

sociasion del capital e del lavor; si solleva una gnova attivitat pubblica nella qual concorrin dug' quang': da chista gnova attivitat ven fur la possidenza minuda a vantaz della class indigent che plui non esist; e la societad si riforma senza sacrificis e senza quasi savè in ce maniera, e dalla prosperitat comun ven a comprendi ches dos veritaz incontrastabilis: che la miseria lè la disgrazia dei sior, e che la pizzula proprietat lè la garanzia o come se si diress la societad d'assicurazion della granda.

Ce isa l' art?

L' art lè un pensier, come la paraula. L' art come la paraula a lè un principi dell'anima, che si rappresenta in una forma, che si vistiss in una figura, che nus sevela cun t'un lengaz che chiad sott i sens e che ven al cur e che sveja sentimens, memoris, affiez, dolors e speranzis.

L' art che jo disi no lè un mestier — chè maniera fabril di lavorà materialmenti un oget, culla splana, cul marchiel, culla subla, culla gusiella, cul torni. Chistis professions jo no lis disprezzi. Jo no disprezzi nuja in chist mond. Ma se son utilis a l'on in societad, no son necessaris pal on dentri l'anima so. E cà jo riferissi il discors all'intellet e al sentiment che nus rafinin la vita in chei principis che la fan jessi degna di sè: sevelli per conseguenza dell' art che si mett in comunicazion cull' anima nestra.

Di *biellis arz* si podaressin contà un diluvi. L' uso par altri lis comprend in tre solis: l'*architettura*, paraula greca che ul di art principal, art nobilissima, che direz duttis lis altris, e che consist nel fabbrica cun soliditat, cun comoditat e bellezza; — la *pittura* che rappresenta i ogez cun lineis o cun colors, e la *scultura* che giava in riliev lis figuris.

Ma a ce siarvia po l'art? vo direso. — Iu sai: anchia senza di je il mond al chiamina. Ma no isial forsi un ambizion di possedè alc di biel nel pais? No lè forsi l'unica roba che si metti da sè stessa in mostra, e che il forastier, dopo l'ospitalitat, al cir propri cul cur, come se lu persuadaress chista sola reson a no disprezzà chè int fra la qual al si chiata? Po dopo, scoltaimit. — L'art come pensier, dev vè un scopo. Cull'aspiet della bellezza inzentiliss il cur del popul; cui ogez che rappresenta inspira virtuz, e, o consacra *memoris grandis*, o insegna *exemplis dens* d'imitazion o creà *desideris nobii* e tai che pàin il decoro e la delicatezza dell'umana natura. — Come esecuzion po, l'art lè nobil e granda, parcè che important e diffzil. Jè si divid in dos parz, l'*idea* e la *forma*. L'*idea* abbrazza in sè il *concett*, che lè il pensier della chiossa o del fatt che si scielz a rappresentà; l'*invenzion*, che lè la maniera nella qual si chiol a rappresentà il concett; e il *sentiment*, che lè la veritat cun la qual si lu rappresenta. Cul sentiment si leja po il caracter e la convenienza, che son come se si diress i elemenz che siarvin tant a creà cun *idea* gnova, quand a esprimi cun fedeltat ce che la ment abbrazzava, come anchia a fà che l'opera corrispundi all'*idea* general che la int si ja fat di chel gener di operis, e che fas par consequenza ottigni chel effiet che l'artista si propon sull'anima di ognidun che al si presenti davant la so opera. — La *forma* po si riferiss a dug i elemenz dell'*idea artistica*, e consist nella *proprietas*, che abbrazza la veritat storica, la veritat local, il costum, e la decenza del pensier culla decenza dell'esecuzion, val a di, l'armonia dell'oggett che inspira l'artista cul sens che dev produsi il so lavor in cui che lu osserva.

No occoraress che vi disi, dopo chist, che l'art pall'art lè una misèria che aviliss la mission dell'artist. Il fa una biella femina soddisfarà al voli e

nuialtri: il dipinzi una sia che sostenta i soi vechios, consola il cur e infond una virtut e insegna un esempi. L'art par la societat lè art di vita.

Ma cumò jo domandi: vino un art nella nestra provincia? Vino un numar adattat di ogez che o nus inspirin, o nus educuin, o nus consolin, e perfezionin un popul che soffriss e che spera?

Nel novembar del 1853 jo viodèi alla nestra esposizion fermassi qualchidun stupefat denant chè miseria della Maddalena copiada fur del nestri Tizian, e stà culla bocchia spalancada qualchi altri chialand chei pastiz di sblachia e di verderam, che si disevin paesaz o là incirca.

Chist fat al sconfuarta. E lè, magari cussi no, una veritat dolorosa, che il sens del biel no si chiata a jessi cà di no forsi nuja plui svejat nella major part della int, di chel che sei quasi nella China e nell'India; e che, par educassi come che il Signor al comanda, no' vin bisugna di sudà plui di una chiamesa, come un bambin che no fas anchiamò differenza fra un a e la z.

Si dovaress pensagi un poc su. Lè stat dit che la civiltat d'un popul si misura dalla perfezion dell'art. E veramenti il *biel*, il *nobil sentiment della bellezza*, lè una prova grandissima di un sinti delicat. — Ma se nualtris varessin di stabili chista prova sora di no, cè si varess di concludi? Lis condizions del biel son un element della natura umana, son un patt anchia lor par arrivà alla perfezion della vita social: cui che no lis sint no pol provà che dolor o vergonza.

La nestra puora storia dell'art nus presenta nei tims passaz un sol nom, che al podi jessi ricuardat senza disgust: un ciart Caucig, pittor, che almanco mostra una scuola non falsa, e che se no lè pûr nel disèn, lè almanco pazient nel menà i soi lavors, val a di nel lavoraju cun diligenza. Ai nestris dis viu

vut e vin anchiamò qualchi zovin pittor, i quai, se no saressin dismentejazz da nualtris, nus insegnarissin un poc alla volta, crodemit, a separà il zal dal neri, la zizania dal gran. In quant a scultura, je no nus jà dat nuja mai; poc di plui l'architettura. — Chè barocada della glesia dei Gesuiz di Gurizza, vi prèi lassaila da banda: chè corporazion no ja vut mai bon gust, e la nestra glesia lè goffa come lis lor predichis e il lor chiapiel a tre musis. La fazzada della parocchia di Gradischia lè la plui biella fazzada di glesia che sei nel Friul, ma lè di un art pagana che no jà nissun caracter di glesia. Resta chel gran vas di Aquileja; ma cui che gi entra dentri, spalanchial forsi i voi par altri che par la vastitat di chel templi? Io scometti che cert par un no jan mai capit che lè la vera art cristiana che là, e che se no si preja là dentri no lè plui nissun altri luc che ispiri devozion sulla tiara.

Par scomenzà dunchia a capi se che lè l'art, fait a me mud. Vaid nell'oratori di chist seminari. Chiatareso la Madonna del Zona, che, crodemit, al lè cumò il mior pittor di Vignesia. Chialait ben che Madonna; e po passait nella glesia del seminari stess, e viodèt chè altra Madonna lavorada dal vieli Tominz. An diel di chei che viodind un quatri colors che sbèrlin e che stonin, a jan preferit chista a chè. Copàju fradis, che no meritin grazia. — Vualtris paraltri varress un po di sens comun plui di lor, e fareso un altri judizi; ma se par uestra disgrazia vi sintissis inclinaz a judicà su chel pid, prima di favi ridi daùr lis spallis tornait a fà il confront, e vaid su e jù dos tre voltis. Chialait prima di dut l'inspirazion religiosa. Osservait la naturalezza dellis lineis, la dignitat dellis movenzis e della positura. Notait chel riposo cujet che regna nella figura pitturada dal Zona. Rimarcait la purezza dei contornos, il pudor dellis curvis, la nettezza e la proporzion dellis formis, la ve-

ritat dei rilievs, della lus, dellis ombris. E badait in ultin all'intonazion di chel colorit cussi fresc e nell'istess timp cussi sodo. Usait il voli a dut chist, confrontailu cui altris lavors che vi chiàdin sott voli; e no stait stufassi, no stait perdonala alla uestra ment chista curiositat generosa; ma sora dut badaimit a me, e no stait dà ascolt a cui che fas la critica par ignoranza; e po mi savareso di in fin dei conz se vareso capit qualche chiossa, e se vi pararà anchiamò che l'art a sei come a dissi un zujatul, e se sei plui onest chist vizi di metti dug' i artisg' in t' un mac, di chel che sei il confondi come faseso lis paraulis di filosofo e mat, di zarlatan e poeta.

In ultim jo vi ricuardi anchiamò chist: no stait svergonzassi di fà l'esercizi che vi jai suggerit. L'ignoranza ustinada al fas vergonza, ma no la volontat d'imparà. Chist studi vi zovarà un mond, erodemit. E quand che vareso imparat qualche chiossa, podareso chialà cun plasè lis dos statuis di san Pieri e Pauli a Gradischia, il quadri della Madonna cun diviars altris sanz daür l' altar major della glesia di Romans, la presentazion della Madonna al templi a Turiac, il sant Antoni a Canal, il san Sebastian a Fara, e cussi qualche altra robuta ca intor, che cumò disprezzaïso o no ves mai viodut — e che cul timp vajareso di no vè conservada; come cumò (vi lu disi franc) tros di vualtris dovaressiso deventà ross di no jessi al cas di cognossila.



Un invenzion par nualtris



Calorifer a corrint d'aria libera.

Si; par nualtris. — Ves mai viodud una gran stanza rischialda da d'invier cun nualtris che un fornellut, e mediant dei tubos di fiar, che gi chiaminin intor par dentri la muraja che la circonda? Fait il cont che lè l'istess chel che ca vi descrivi. — Un tubo orizzontal che ricev il calor mediant un fuc concentrat d'una banda, al si schialda in duta la so lungiezza egualmente, par la reson che il calorìc lè una sostanza lizzerizsima e rara che tind a spandissi e par consequenza si alza e chiamina simpri, e quand che si chiata come che al foss di di impresonada, e no pol sollevassi, a lè costretta di movisi adasi e di batti nel so cors i parèz della so preson,

e schialdaju par dut, fin che otten la libertat di sparnizzassi par l'aria. Chist calor lè un tesaur. E da sta scuviarta si son fattis una quantitat di applicazions, fra lis quals lè anchia chista d'un me amì, che culì vi presenti.

Il modellut che lè stampat ca'di banda, vi darà una pizzula idea di chel che fevelli. Lè un tubo dunchia di fiar, lung circa quatri metros, e del diametro di 0. 35, distirat orizzontalmente, dentri del qual, mediant una specie di fornellut si fas suc cun t'un qualche combustibil che al dèi gran flamma, come che saressin lis chianis, lis fascinis, il len di pèz etc. Chist tubo lè siarad in un casson di breja, daviart paraltri di sott e di soravia, e alt sora tiara un centimetro, di maniera che l'aria pol introdusisi par chista viartadura di sott, e, schialdada cul calor che emana dal tubo, (per cui si fas plui lizzera di peso), pol alzassi e dispiardisi via par la banda superior del casson, che come che disevi, lè viarta anchia chè. Chista azion lè chel che si clama *corrint d'aria libera*, la qual jà dat il nom al calorifer che vi descrivi.


Sora il casson, invece di cuviarta o di tapon, lè disponuda una ret o filiada minuda di fiar, sora la qual si adatta la materia che dev jessi sujada. Destinad dunchia il gran a subì chist servizi, la corrind d'aria che prima disevi, rischialdada dal tubo, traviarsa la filiada e il strat di gran che gi stà parsora e sujand nel so passaz chist gran, al s'imbev di vapor, e si dispiard liberamenti nell'alt e va via.

L'uso di chista macchinuta no vi dirai ce tant che pol sei util a cui che ves l'amor e la volontat di doprala. L'inzegner Pisani, venezian, nell'inventala, la jà destinada appunt par uso di sechià il gran, e chist al saress un gran benefici par dut il nestri pais, specialmenti nellis vals della montagna, e allis bassis, dulà che l'umiditat che il gran puarta cun sè nei granars, lè tanta distruzion di sostanzis, e tant velen par la int che lis dopra. I anties pensavin anchia lor a chist bisuin di sujà ben il gran, dalla sanitat del qual depend troppi voltis di salvà una popolazion da non pochis disgrazis. No savevin paraltri doprà nuja di miei che dellis chiamaris rischialdadis all' *eccess*, lis quals, oltri che consumà un capital pal combustibil che' i lava, non otti-

gnivìn nissun scopo, parcè che l'aria non podind dispiardisi quand che jera plena dell'umiditat che il gran al veva dat fur, impediva l'asciugament invece di facilitalu, e restituiva l'umiditat a chel gran dal qual la veva bevuda.

In quant po alla maniera di dòprà chista macchina, ecco cà che mi spieghi. Il sorgtore o il ris che si varess di secchià, si lu distira nella quantitat di un sacc e miez sora la ret che saveso; si lu ten ben mescedad par 15 minuz o 20; po si alza il telar dalla banda del chiamin, e si butta dut il gran par tiara acciocchè si disfredi. In sta maniera cussì facil e cussì seleta, si otten che il gran resta perfettamenti sut, senza pericol che soffrissi mai plui, senza vessi alterat par nuja nè nel color nè nell'odor nè nella sostanza, e conservand perfettamenti la so natura e la quantitat che veva prima.

L'inzegner Pisani ja vut il privilegio della fabbricazion di sta macchina. L'acquist val 200 flur. in arint, che si pàin un tiarz all'ordenazion e doi tiarz alla consegna. Pol jessi doprada in comun, magari da ving' possidenz, parcè che si lassa traspuartà facilmenti, e no domanda nissuna spesa d'implant. La quantitat di gran che suja in una zornada lè da 60 a 100 star second l'umiditat che conten. La spesa del combustibil risulta da 4 a 6 k. par star a misura dell'umiditat stessa. — Vo capiso dunchia ce vantaz e ce economia che nus puarta. Pensait, e compraila.



LE CANTAT DELL' ARMENTAN

Allegris! L' alba lè pronta, e il dì
Cui che ul vè vita no dev duarmì.
Flat al cuar, che za sbrundula
Pai confins del me país;
No lè pigra la me mandria,
E il me sun si lu capiss.

Allegris! L' alba lè pronta, e il dì
Cui che ul vè vita no dev duarmì. —

Ma chista pedada
No lè del me chian;
Ches tachis no quadrin,
Chei pèi no mi van. —

All' erta! l' insidia
Lè pan pai mei ding',
E i lovs no mi bèccchin
Che sèin anchia in ving'.

Allegris! Cull' alba scomenza il travai,
Scomenzin lis penis, scomenzin i mai.

Ma intant che mèditin
Dans e fastidis,
Cui che ja un anima,
Cui che ja un cur
Vegla — e cull' alba
Lè za sicur.

Allegris! L' alba, co chiata in pis,
Protez la mandria dai soi nemis.

IL CHIAZZADOR

Son vîng'ain che remèni la vita
 Su pai crez che mi slambrin i pis,
 Ma il dolor no lè chist dei mei dis.
 Foi la chiazza a un pensier che mi spiita
 Forsi forsi lontan, come il di
 Che i mei avos gioldevin culi.

La mattina mi chiata cull' arma
 Pronta simpri al dovè che mi clama;
 Alla sera lè l'ultima brama
 Chè dell' alba che invida al travai;
 E se il braz nella gnot si disarmo,
 Disarmassi il me cur no pol mai.

Son vîng'ain che il soreli mi riva,
 Come uè, sul miez di nel sudor;
 Ma par chist jo no sinti dolor.
 Anchia in sun nella ment resta viva
 La speranza che il sen mi nudriss,
 Come il pan che dà fuorza ai mei dis.

Vegnarà forsi il di della calma,
 Rivarai chel pensier che mi spiita?
 Ai mei fis lassarai chista vita
 Di pericui, di penis, di mai?
 Anchia i màrtirs jan vut la so palma —
 E riposo ai mei fis no darai?

Su, chiazzin, che il pensier no perdona:
 E ving' ain no si suda diband
 Se la fede nus clama indenant.

La speranza coraggio nus dona,
 Volantat il pensier dell'amor,
 Sicurezza ving' ain di dolor.

BUNA SERA

Buna sera, buna sera,
 Cui che strùscia no dispera.
 Lè finida la zornada,
 Lè finid il me lavor
 Nella grazia del Signor:
 Buna sera, buna sera,
 Cui che strùscia no dispera.

Buna sera. — La chiampana
 Ja sunad l'avemaria;
 E chel sun mi lè una mana,
 Lè una voja, un allegria:
 Par che al clami la famèa
 A polsà dal so lavor
 Nella grazia del Signor.
 Buna sera, buna sera,
 Cui che strùscia no dispera.

Buna sera. — In somp de villa
 Viodi il fun del me chiamin,
 Viodi il svol della cisilla,
 Senti il chiant del me visin.
 Ognidun al si rierèa

Dopo fat il so lavor
 Nella grazia del Signor.
 Buna sera, buna sera,
 Cui che strùscia no dispera.

Buna sera a cui che passa,
 Buna sera a cui che ven,
 Buna sera a cui che lassa
 La me puarta e il me teren.
 Benedet dusinta voltis
 Cui che torna dal lavor
 Culla grazia del Signor.
 Buna sera, buna sera,
 Cui che strùscia no dispera.

IL UARDA-FUC

Battin vot oris — Rigida
 Lè l'aria e il vint al ciùla:
 Cui che no duar che vigili
 Sul fogolar che all'ard —
 Ven planc e no sbrundula
 L'incendi che sul tard,
 Quand che no si arv plui l'opera
 Dell'on nè i soi lamenz —

Attenz !

Battin nuv oris — Libera
 La vita s'ì consola;
 Ma il uarda-fuc al medita
 Sull' ora del dolor:
 Pensait! No lè una sola
 La lagrima del puor
 Quand che no siarv plui l'opera
 Dell' on nè i soi lamenz —

Attenz!

Battin dis oris — L'anima
 No duar co l' on riposa;
 Sott la cinisa al buliga
 Chel fuc che mai no mur:
 Badait! lè dolorosa
 La gnot, e il mal sicur,
 Quand che no siarv plui l'opera
 Dell' on nè i soi lamenz —

Attenz!

Batt miezagnot — L'è l'ultima
 Ora del dì che passa:
 Attenz! lè un fuc la lusigna
 Come il vulcan che al bol:
 Attenz! la gnot lè bassa,
 Ma il dì no ven di svol
 Quand che no siarv plui l'opera
 Dell' on nè i soi lamenz —

Attenz!

Raccont.

Schialdava suartamenti l'instat. Jera una biella zornada del 18...; un an sul fà di chist altri infeliz, che cumò che jo scrivi sta par finì la so vita. — No vi dirai se lè biella in chè stagion la natura nel pais là che vi meni. Lis bassis del Friul, cun chè vasta planura, cun tanta aga, cun chei praz, cun chè supiarba vegetazion, cun chei uzèi che vi chiantin par ogni banda, cun chel cil che par che al invidi a ringrazià cui che lu jà fat, lè inutil di, se non si podaress chiolilis in fal cul paradis del prin pari. — In chist zardin della natura jera dunchia, di biel miezdi, una pizzula barchiuta come quasi una vintula, leiada al puint di Aquileja, e un puor fruttat, come che al fos stat instupidit dal soreli, a' duarmiva dentri distirat, non badand all'aga che sbatteva di quand in quand la so scuna sulla sponda di piera del canal. Un on, di statura bassa ma robust e dut neri e nud fur che miez pett e lis cuessis, vigniva fur dall'osteria lì vizzina, contant no sai ce tang' bez nella man, e murmuand no sai ce paraulis culla bochia siarada. Avvizinat alla sponda, al clamà nel so rozo dialet: jèviti Toni. Poi si metè sulla schiala, par spietà che il frut gi menàs dongia la barchia par chioilu dentri e là via.

Si jevà il frut barcoland sullis giambis: i vòl gi zirarin un poc: a pareva come che al foss par colà muart là che jera. Una buna blestema del pari capitada in bon timp, gi fasè tornà il chiav a segno e lis suarzis nei pols, e si metè svelt al sò ufizi.

Chiapada dunchia la cuarda par chel chiavez che al si univa alla barchia, al si dè a fàla sù come cui che tira fur dal poz una sela. Avvizinat in sta maniera al luc nel qual stava plantat fra dos pieris un conjut

cull'altri chiav della cuarda, lu chiolè via, al pojà a squara lis mans sull'orli della sponda, e fasind cun lor un pas daür l'altri come cù che chiamina, al si menà là che lu spietava so pari — e montat nella barchiuta anchia chist, chiaparin un rem paromb, e vogand serin strada.

“ Bat in ordin . . . „ sbrundulà cun t'un altri corpo chel vieli, dopo un lunghissin silenzi. Il pizzul al si drizzà mior sullis giambis, pojà (come cerchiand di fermalu) il pid dret quasi par traviars fra i pajoi sconquassaz della barchia, e curvand manco di prima i braz sora il rem, gi dè plui spinta e plui fuarza, fanzinlu plejassi a ogni vogada fra il scalm e l'aga, che mandava quasi la spiuma.

Il so pett ansava fuart. Par sujassi il sudor che gi colava dalla musa come una ploja, al alzà il braz zanc fin al cernèli; ma la magna no lu veva nanchia tochiat quand che il rem mal diret da una sola di ches mans débilis, al saltà fur dal so puest, e la barchia si zirà un poc d'una banda, come mal gaviarnada.

Un altri corpo del pari fasè dismentejà al fi la fadia e il sudor, e il viaz si rimetè come prima. In chista maniera si menarin quasi tre oris, e arrivaz fur nella laguna, smontarin su t'una specie di prat. — Cui jera chè int? Peschiadors dei casons. — E ce tang'ain veva chel pizzul? undis ain no rivavin.

Un altra persona, sudant anchia jè, chiaminava in chel moment istess dilung pai rapars che siarin di cà e di là il flun Natisa. La jarba jera alta e gi cuviarzeva mieza vita, fasind intop ai soi pas, che parevin menaz propri di furia. Zovin, di qualchi ving' ain, veva propri l'aspiet del nestri contadin di planura: biell, fuart, disinvolt, usat ai strapaz e plen di volontat di fa del ben. Lava lava, svelto come quasi il pensier che lu spinzeva, senza un poc di riposo, indenant; e no badava nuja nè all'aga dei palluz che scoreva in rojuz fur dellis vam-

padoris daviartīs, nè ai pujeris che saltellavin mòrbiz traviars la ret dei canaluz di ches praderiis largis e viartīs, che una volta nudrivin cul so foragio chè razza famosa di chiavai furlans, i quai nel 1580 jan bastardaz cul pustribul di Lipizza; nè dava ment ai uzèi che svolazzavin cà e là, o chiantavin fra lis chianis vicinis cun t'una vos rauca e fastidiosa, o sberlavin di lontan nei pantans cun chel urlo che al someja propri d'un toro.

Arrivat dopo una buna ora quasi in fin dei pal-luz siaraz, il zovin al montà jù del rapar, e traviar-sand sora un puintut di len mal sicur la suessa maestra del pallud nel qual si chiatava a jessi, al entrà dentri in t'una chiasa, e

„ Barba Sef, al disè a un òn vieli che uzzava sora una muela a man una ronzea; “ barba, vignit, vi prei, cun la uestra barchia a buttami fin a Grau; me mari lè par muri, e ul viodi anchiamò una volta i soi fradis. „

„ O, par muri! “ al rispundè maravejat chel altri on, seguitand a zirà la piera che zemeva sott il fiar che lusiva.

„ Prest, prest, barba, vi prei: soi vignut di gallop, e no sai se rivarai a timp di viodila mai plui. “ E intant, senza spietà rispuesta, ripassava il puint, disleia-va una barchia dalla riva del flun, montava dentri, e clamava anchiamò una volta: „ Barba, vigniso? “

„ Vegni “ rispundè l'altri. E tirada via dalla mue-la la ronzea, frejava un par di voltis la lama sulla ma-gna della chiamesa par nettala dal pantan che gi si je-ra fernet sora nell'uzzala, e provand il tai cul polleiar, chialàva come distrat traviars il balcon della cusina, un morar del cortiv e diseva fra sè: „ vevi justa di come-dalg! “ Po vignind fur culla flachia come una persona che fas qualche chiossa malvulintier, al si metè sul ra-par viars la campagna, e clamà: „ Meni; da'di voli a ches vachis là in somp, 'ò devi là via. “

„ Dulà vaiso, cumò! “ si sintì sberlà un altra vos

di miez a una risera che vigniva justa allora sborzada da un par di umin e tre o quatri feminis.

„ Voi a Grau . . . “

A Grau ?! . . .

„ Sì, ma torni in un batti di voli. “

„ Su via, barba! “ si sintì anchiamò la vos di chel che spietava. E dopo qualchi altri minut, si sintì la battuda allegra di doi rems che si allontanavin pal aga.

Intant, in un pizzul chiasal di Aquileja, zemeva sora un puor jet una femina, consumada da fievaris, zala, strenta, inclapida — cadaver di vita. Un predi gi stava al flanc e la confuartava a muri cun pazienza e rassegnazion. Il pett di jè pareva forsi come la crosta d'un vulcan quand che lè par sclapassi. E la man che strinzeva un pizzul crucifis e cerchiava di avvicinalu alla bochia, tremava a schiassadis continuis, come la fuèia d'un poul, quand che un poc di vint della sera al suspirava. Dos feminis stavin inzenogladis ai pis del jet, e lis lagrimis gi plovevin a quatri. Cinc fruz, nevoz della muribonda e fioi di ches dos che vaivin, chialavin sta scena cun doi voi sbalordiz, non capind ben ce che al jera e ce che al sares stat par nassi. Dutis cieris tombadizis, stralunadis, ma pur devotis; parcè che no lè nessun moment che plui si ves bisugna di Dio, di chel che compagna l'ultin respir d'una mari.

„ No, son vignuz anchiamò? “ domandà cun t'una vos di sepulcri la malada. „ — Che ju viodaress almanco anchioma una volta! “ E attor la so balla dei voi si mostrà come una specie di lagrima, che zirà intor chel cerclì ros e sut che ju circondava. Lis polpebris tremarin nel plejassi e tornassi a sollevà cun prestezza tre o quatri voltis, e la lagrima si distaccà cuo fadia, vignind ju adàsi fin alla metat della musa, e restand li sujada dall'ardor della piel che buliva.

„ Vebit pazienza, dona Pasca, “ sottentrava a di

il predi; „ vegnaran e sares consolada. Raccomandaissit intant al Signor: invocait la so misericordia, distaccait il pensier da chista val di dolors, pensait alla vita eterna; vo gi seso cussì vicina che no pol manchiavi il coraggio di desiderala cull'anima. “

„ O Dio benedett! “ sciamava la viela: „ E se no podaress plui viodi nanchia me fi? “ E quasi par allontanà chist pensier scomenzava la so prejera prediletta, *ave Maria*; e chei altris seguitavin in coro: Santa Maria, prejait par no, pecchiators, cumò e nell'ora della nestra muart, cussì sèi.

La vita del puor lè una misera vita. Lis fadiis par lui son una providenza, parcè che'i fan almanco dismentejà i patimenz, e no gi lassin timp di ricuardassi di cui che giold nell'ozì e nei plasès i favors della fortuna e dell'injustizia social. Ma vegnin i dis della fan; vegnin i dis dellis malattiis; vegnin i dis dellis disgrazis plui grandis. Il fi che dev là militar, e che dopo vè consumat i soi plui bieci ain della vita, non soltant senza judà ma ben anchia tormentant cun spesis insopportabilis la famèa, torna a chiasa a puartà quasi simpri il vizi e la disunion. I fruz che colin a nidadis come una benedizion del Signor, e che la mari no jà ce dà di mangià, nè sa cun ce'cuviarzia nell'inviar, cun ce soccoriu nellis malattiis che vegnin. La zovintut, indispettida dei soi bisugns senza ripar, che si butta come par un sfogo al vizi, alla crapula, e qualche volta anchia al disonor. I paris che tormentaz dai patimenz propriis e da chei della so famèa, indurissin un poc alla volta il cur e tormentin cul autoritat del paron chei puors che non podin jessi da lor consolaz. I viei, che passuz di velen par una lungia continuazion di mài, d'aventin indifferenz a ogni dolor, a ogni disgrazia, e no si ricuardin di vè vivut se non quand che la muart lè vicina, e ju abbat spaventaz, parcè che no jan savùt mai ce che sèi la speranza. — Mài consuèz, che nò ju badin plui,

parcè che sin trop usaz a viòdiu ogni dì, senza mai contemplaju. Ma mài, che si fan spaventevui all'anima nostra, quand che un pericol gnov e un dolor mai viòdut nus si presenta alla vista, e nus obbleja, senza che quasi si necuarzin, a consideraju cull'anima.

I doi contadins, vignuz cun la lor barchia fin fur dal strett del canal e sintut che si alzava un fregul di maistri sull'aga, plantarin l'arbul e la pizzula vela slambrada, e per manchianza di timon lejarin a popa un rem, par direzi la barchia. Il vint soffiava a favor. La barchia svolava. A viodila corri all'orza in chè maniera sull'aga, pareva che ves vut intendiment, e che cercias culla so premura di secondà la premura del zovin che la dirizeva. In poc di timp traviarsarin il pallud. aviart. Lassarin daür di sè la glesiuta di san Marc, dulà che la tradizion nus conta che sei smontat la prima volta l'evangelista par predichià il so vanzeli; e passarin chel ziezac dei canai, che s'incrosin là fur par dug i viars. Vioderin alla lontana chei bieì arbui che fan ombra all'isuluta di san Zulian, l'antiga solitudin dei Benedittins che plui non esistin; passarin l'isula Gorgo, che qualche quindis secui in daür jera duta un sussur dei lavoranz dellis flottis romanis, e che cumò lè muta come lis aghis che la jan mieza cuviarta; voltarin in fin, par scurtà la strada, a dretta, lontan dal chiampanili isolat di san Pieri d'aur (il santuari pagan di Apòlline Belleno, dio protetor d'Acquileja) — e jerin zà par tocchià chè zancada che fas il flun là che si unis cul canal major, chè una volta al siarava l'isula dechiaduda e quasi abbandonada di Grau.

Il maistri intant veva cessat di soffià; e zirant par buerin, veva jevat una levantera, che si faseva infuriada. “ Calin la vela, „ veva visat plui voltis il barba, che capiva il pericol e no veva chè gran furia del zozin. Ma chist altri, flagellat dai soi pensiers, metteva duta la so suarza nel tigni cul rem obbleada la barchia, e plejanlu plui che pòdeva dalla so dretta alla zanza,

faseva che la vela chiapass il vint par sclauèz, e senza di paraula, continuava la strada. Un reful 'i fè schiam-pà un moment il rem dallis mans: si plejà la barchia sott chel impit del vint: ma il zovin in un moment al ricuperà la so posizion di prima, e continuarin la strada.

Intant, come che vin dit, i doi peschiadors, pari e fi, jerin arrivaz al fin del lor viaz. Su d'una pizzula altura circondada duta dallis aghis e cuviarta di jarba paludosa e di ragns e di sbissis, si alzava il so umil tuguri. Un poèta vares dit una delizia chel sit. Aga di cà, aga di là. Isulis di ogni banda. Daùr, la tiara ferma cul chiampanili d'Acquilea che al pàr che nasci come un gran fong fur dell' aga. Denant, i savallons e i puarz. A dretta, un poc lontana ma ben distinta, la fuartezza di Maran cullis sos muràis e i soi turions plantaz dentri al fond dell'immensa laguna. Dut intor casons, e siaràis e barchis di traspuart e di peschia. Cà e là qualchi planta, qualchi sterp, qualchi arbul. E il cil seren, e l'aria netta, e l'orizzont che al si spalanca quasi senza cuufin... Ce uareso di miei? E a una grandissima distanza che la vista jà ce fà a superala, chè muraja maestosa dellis alpis che finissin l'Italia - Insuma, se uares viodi il pais dellis fatis vaid la: jo no puess davi un ritrat plui perfet e plui nobil.

Ma voltait la madaja. No vi dirai dell'abbandon di chei lucs, separaz dalla tiara e dal consorzi dei umin. No vi dirai dei insez che tormentin la int, nè del miasma che gi consuma la salut, nè dellis viperis che gi minacin la vita. No dirai nanchia dei strapaz, dellis fadiis, del chiald e del fred, che patissin chei puors che stan là. Son mài ordinaris chisg cà; son travàis che il major numer dei umin son condanaz a patì simpri, e che plui o manco quasi in ogni luc ju patissin. Ma vi dirai soltant una part di chè vita, e po domandareso vò altris al romanzier o al poeta se son capaz anchiamò d'invidiala.

Su chè mieza altura di prat là che jerin rivaz i nestris doi peschiadors, si alzava la lor puora capana. Un trenta pài plantaz nel teren e uniz a piramida o a cavalet cullis cimis insieme, formavin il schèletro del tuguri; chianis e pallud jerin il rest della muraja. Un foro alt poc plui di tre pis, jera la puarta. Di dentri, una persona un poc alta no podeva sta dretta in pis. Dall'alt pendolava un pal, tajat in forma di forcùl o di rimpin e voltat cù pis in sù, il qual faseva lis vecis di chiadenaz. Quatri stangis fermadis a dei pizzui pài tignivin insieme un par di sacs, sui quai duarmivin cunfusamenti umin, feminis, fruz. Un pochia di farina in t'un altri saccut, unica lor ricchezza: una stagnada e una plàdina e dos sidons, i soi mobii.

Appena rivada la barchia, saltarin fur tre altris fruz e una femina incuntra ai doi capitaz. " Cìmut isa lada? „ domandà la femina al marit, che tirand fur di saccheta pos carantans, al strinzè lis spallis, e al entrà nel tuguri. " Dunchia nujaltri che chist? „ continuà a di la femina seguitand il marit. " Eh lu sai ben jo: Vareso bevut, mangiat allegramenti, zujat! e ecco ce che puartaiso a chiasa vualtris umin, par nudri lis uestris creaturis. No basta la miseria: occor anchia il vizi. Bisugna buttà via chel poc di ben che Dio nus dònà. Ecco parcè che Dio nus manda po lis disgrazis „.

Il marit si strinzè nellis spallis. Al jessì fur della capana senza rispundi paraula, e chiappant in man una ret ispirada sun tre pài par comedala: " E vo veso fat dut chist biel lavor: veramenti . . . ! „ e il so *corpo* gi restà par chista volta nel sen, parcè che la femina saltada su un altra volta: " Eh, s'intind! rispundeva; nualtris a chiasa a lavorà gnot e di, e vualtris gioldi, sacrificà dut, consumà anchia il nestri . . . „

Chista volta duta la vos che je veva nei polmons no 'i bastà a cuviarzi chè del marid che tonand come un fulmin, mandà fur dall'anima cun t'una sola paraula il so fiel, e siarà alla femina nella strozza chel torrìnt di

villaniis e d'imprecazioms, che fra lor jera il solit salut della sera.

Cujelat in chista biella maniera il temporal, ognun, si de' allis sos facendis di gnov. La femina fasè un poc di fuc. Il marid ispirà un quatri sfueis su doi stees e lis plantà dongia la flama, par cuèilis. I fruz si sintarin là infor par beccà un bucugnùt anchia lor. Il plui grand, vignut di Aquilea cul pari, al tajà diviars bucugnuz di chiana lungs una quarta e viarz di una panda in dos pontis come un piron. E dug insieme si metterin a fevellà dei lor faz tranquillamenti come che no fos stat mai nuja.

“ Compari Nanc mi ja puartat uè di mattina chisg' quatri lins, disè la femina, e chel fregul di farina che lè là nel chianton „.

Ah, sì: le stat dunchia! E cimut ti jajal fat pajà chista roba?

“ Vot carantans i lens (ierin quindis bucugnuz di numar, sultì e curz come la miseria) e la farina gi la jai paiada a reson di quatri carantans al funt „.

“ Ecco cimut che il puor paja chiara la so miseria. Il sior ja la farina a doi carantans; e i lens in abbondanza anchia d'invier, quand che nualtris battin i ding come cui che jà la fievera! — E a proposit di fievera, sastu cui che stà par muri a Aquilea? „

“ Cui, mo: disèmilu „.

“ Dona Pasca

“ Oh! la sur di me compari . . .

“ Jè propri . . . „

Il vint jera in chist frattimp cressut come disevin. Appena che i nestris doi peschiadors vevin finit di mangià il pes cussì fat e restit senza cerimonis, e che i fruz plui pizzui vevin scroccat la so porzion anchia lor, il pari al vignù fur dal cason, e viodind il timp che no lassava timp all'ozì, clamà Toni, so fi, e judaz dalla fe-

mina, puartarin i cogòis nella barchia, e si metterin in via par làju a plantà sullis peschis.

Jera zà vicina l'ora della mieza colma. Chè ora viars sera, nella qual i nestrìs peschiadors plantin chei siaràis cullis chianis sui lucs plui alz della laguna, val a di là che il terren resta a sut durant la sechia, e dentry i quai restand siarat il pes in preson, vadin a chiapalu nella mattina, quand che al resta senza aga. I nestrìs doi cognossinz si vevin za mitut al lavor; il pari chiaminand fin a mieza vita nell'aga, e plantant un dopo l'altri i palez che tegnin in pis lis chianis; e il si stand nella barchia e dant fur all' altri un poc alla volta il cogoi rodolat, incuntra che lu plantava nel fond. Il vint paraltri disturbava fuartamenti chel lavor faticos, e no gi uareva nujaltri che la natura robusta e l'abitudin di chè int, par podè soppuartalu. No manchiava di quand in quand la blestema del vieli, cumò cuntra il vint, cumò cuntra l'aga, cumò cuntra il fi che no veva colpa se gi trabalava la barchia, puartant a ogni saccodada fur dellis man del vieli il palet che frachiava nel pantan sotto l'aga. Il mestier d'aventava paraltri sempre pluifaticos, e quasi quasi impussibil. Il frut si sintiva za avvilit, e nol veva plui suarzis di rezi. Il pari capiva che no gi sares stat pussibil di finì par chè sera, e s'inrabiava di plui, ustinat di no cedi. In un moment, il fi che cerciava un occasion o un pretest di finì chel travai, chè fadia, chel fastidi, — “ Oh, al slamà : chialait chè barchia là jù pàr che sei propri in pericol „.

Diffat, i nestrìs puors contadias, mal pratics di guviarnà una barchia fur del canal e cun un timp come chel, vevin cedut allis ondis e al vint. Arrivaz là che la laguna si estind, senza il rapar di ches isulis lungis e incrosadis fra lor, buliva il mar plui furios, l'aria no veva riten. Il zovin si jera ustinat di tigni sù la vela, sperand di finì prima il so viaz : ma una sbuffada im-

provvisa del vint gi la veva chiapada par traviars, e buttat lontan a dreta la barchia, che nel tajà l'onda di flanc veva rot il rem che al serviva pal timon che manchiava. Si dèrin premura i doi umin di calà chel straz e jevà il pal che tigniva luc di arbul. Ma impazzàz malamenti par la premura, la confusion, il traballà della barchia e lis soffladis del vint, metterin plui timp che no ves occorut par recuperà la lor strada. Pò, distrigaz di chel imbroi o di chel pericul, là, nel miez dell'aga, cun chel timp infuriat, cun chè barchia pizzula, sconquassada, senza guviar, provioduz di un sòl rem, e senza quasi plui cognossi la strada, si piarderin di coraggio, e si tignirin piarduz.

Jera in chel moment che Toni ju veva vioduz, e ju mostrava al pari, non forsi tant par compassion di chei infeliz, come par colzi un pretest di liberà sè stess dallis spinis. Ma lui no saveva che di lì a qualchi ora varess vut di desiderà la so barchia e i soi cogòis; no saveva che dopo qualchi ora varess dovut pentissi di chel so sens di plasè inuman che senza savè cimet, veva pur provat nel contemplà la disgrazia di chei infeliz, pai quai il so egoismo di frut no veva savut sinti compassion. — Il pari, par viodi mior ce che gi veva indicat il fi, al montà nella barchia, e riparand i voi cu la man dai ràgios del soreli, al distinguè clar ce che il fi veva induvinat nel so cur.

Ce si veva di fa in chel moment? Il prin moto lè stat di dà una chialàda al so siarai; po all'aga. „Za chista sera all'jera destinat; no si podeda fà nuja „ al pensà fra di sè. Po chialà il so tuguri, po l'aga di gnov; po il so tuguri, po la barchia in pericul. — Il cur del popul lè simpri bon. Domandagit l'anima . . . e, oh in nom di Dio, che a nol vi dirà dos veltis di no! — “Ma cun chisg' imbròis cà, no si pol nanchia lavorà cul rem “; al murmuja un altra volta fra i ding'. „ Basta; il Signor judarà! “e dada un ultima chialada alla barchia dei contadins come par misurà la distanza che ju

divideva da lui, chiolè un pal fur dalla so, smontà jù nell'aga, plantà in premura chel pal nel pantan plui in fond che al podè, dentri al recint del cogoi scomenzat, lejà i ròdui dei altri cogois in un fass, jù assicurà miei che jera pussibil a chel pal, montà in barchia da capo, fasè il segno della cros, al chialà l'arbul di Barbana, e cul rem nella man: " Anin! „ disè al fi, e si butà cun duta la persona a una voga infuriada.

La braura dell'espert remigant varess vut ce fà a puartassi fur di chel infiar di ondis e di vint, se appunt il vint nol ves secondat il chiamin della barchia. Jera una furtuna che si chiatava in moment di colma. Altrimenti no vares podut chioli la traviarsada cussi come che al fasè. Ma anchia chist ben puartava il so malan anchia lui, parcè che l'aga che cresceva, contrastava in direzion cul vint che soffiava, e in chel contrast cui che ai tocchiava fà dopla fuarza par superalu, jera al nestri puor peschiador, che lavorava propri come che si è soliz di di, alla disperada.

Chei altris doi intant si sfadiavin di tigni sald almanco dulà che jerin, e studiavin di doprà chel rem e miez che gi jera restat, par no lassassi puartà dallis ondis in precipizi. „ O santa Maria di Barbana, „ implorava il vieli; „ fait che jo viodi anchiamò una volta lis mes creaturis! „ — Il zovin, a chè trista prejera si sinti corri un fred par lis venis. Nel prin moment del pericul l'istint della vita e la vos dei ain zovenii gi vèvin fatti dismenteà ogni roba. Veva provat il bisuin di salvassi, veva mitut in chista sola idea lis sos fuarzis, e ogni altri desideri jera scomparut del so cur. Il vieli invece veva raccolt chè logica generosa dell'anima, che dopo jessi arrivada a chei tims che par sè stess no jan plui un avignì, a chei tims che no si spietin plui nè passions nè speranzis, a chei tims che jan siarat la coscienza fin a ches memoris che in altris dis consolavin — fas ri-

nassi improvisamenti la vita propria nella vita d'altris personis; e il puor on si veva ricuardat che no jera sol in chist mond; si veva ricuardat che la so muart, che chè so muart cussì miserabil, saress stada tantis lagrimis, tang' patimenz, tanta agunia par la so famea — e al sinti il bisuin di vivi, non par sè stess ma par chèi puors che al veva fat nasci, e una lagrima gi schiampà fur del voli incassat, e la necessitat d'un miracul par podessi salvà, gi nascè dentri all'anima.

Un fred improvis, disèi, a si sinti corri il zovin pes venis nel scoltà chè invocazion del puor vieli; e subit dopo una scalmanada gi montà sulla fazza — che il pensier di so mari gi jera tornat immediatamenti alla ment. — „ Oh, che no la vares plui di viodi! Che varessin di chiatassi insieme stassera nell'altri mont! “ — E dismentejand là che al jera, molà il rem che tigniva, e si chiazzà lis mans nei chiavei, tremand dut come una chiana.

„ Jastu paura, Jacun? “ Domandà il vieli, nel viodi chè disperazion del nevòt. „ — Paura? “ ripeté l'altri „ Oh!... “ e accompagnà chel suspir cun t' un moto, che pareva uares di: vieli, no stait misurà l'anima a quartis; anchia un puor mendic ja sentimenz nellis visceris!

Ma in chel punt istess, si mostrà lor a pos vares di distanza la barchia del peschiador, e un: „ Coraggio, sin cà par judavi! “ al parè che vigniss ju da una vos del cil, mandada da Dio par salvaju.

Si slargià il cur ai doi infeliz a chè vista, a chè vos. Faserin qualche ultin sfuarz par avvicinassi anchia lor a chei doj salvators. E dopo forsi un bon quart di ora di fadia, si chiatarin a puartada un dell'altri.

Ma lis ondis sbattevin simpri plui fuart, e ogni volta che lis dos barchis pareva che dovessin tocchiassi, una gnova ondada lis divideva indaùr. „ Dàinus un rem; “

al disè Jacun; ma il peschiador, pratic di chel davòì, no si fidava, par paura o di puartà nell'aga chel tal che si varess buttat a chiapalu, o anchia di viodi, se occor, ribaltada una barchia. — Sbalotavin dunchia li intor da un altri quart di ora, senza podè vignì al fin di chel bal, quand che un onda, sbassansi improvvisamenti sott la barchia del peschiador, la puartà a batti propri sull'altra. Il brav'on si buttà d'un lamp sulla sponda della barchia vicina; e fasind fuarza all'aga che tentava di puartagila via un altra volta, la tigni ferma chel poc che bastà, a fin che i altris gi dèssin una man. „ Butta i rems di là, Toni „ al sberlà allora a so fi; e fat passà anchia il frut nella barchia dei contadins che veva za viodut cettant che jera plui granda e plui sicura della so, al petà anchia lui dentri un salt, e raccomandà alla providenza chè antiga e infelìz compagna dei soi sudors, dei soi plases, dei soi vodagns, dei soi pericui e dellis sos caritàz, ultima dellis quals jera chista.

Allora si derin a vogà a tre rems, fasind fuarza al vint plui che jera pussibil. „ Di ce banda zirin? „ saltà su in chel a di Jacun, il zovin contadin, che no pensava plui a nuialtri che alla mari. „ Eh! dulàustu che nin, se no indaur? „ rispundè il barba, al qual premeva di metti pid in tiara e di podè contà alla so famea il brut zuc che gi vevin fatti ches aghis. — „ Ce? a Aquileja? Ma cimut tornarai jo in fazza a me mari cussi sol come che soi vignut via? I dirai che jai vut paura, che mi ja premut plui la me vita che non i soi desideris? „ — Ma culi no jera timp di braùris. — Ualeva sì, che corressin daùr alla barchia abbandonada; ualeva che lu mettessin dentri, parcè che lui saress lat sol cun t'un rem fin a Grau. Ma voja o no, al dovè tasè, e vogà come i altris, e ringrazià Dio se jera il cas di podè anchiamò salvassi la piel par un altra plui biella.

Ma di chel brut zuc no jera superada nanchia la metat. Restava di tornà indaùr, cul vint plui contrari che mai, cun la barchia plui imbrojada di prima, parcè che jera plena di int. Lè vera che vevin un om espert cun lor; e cun lui jera tornat il coraggio anchia ai altris. Ma chel che jera piess lera, che scomenzava a fà scur. In ogni mud seguitarin a bàtti; e dand e dand, pussibil che dopo tant fà, Iddio varess propri ualut su-bissaju?

Instant, la femina del peschiador viodind che il soreli a jera za tramontat e che il timp infuriava, mentri i soi no tornavin, a veva scomenzat a sintì battì il cur come par un presentiment di disgrazis. La famea di barba Sef dall'altra banda, no savind parcè nè par cò che al foss cussì improvvisamenti sparit, lava domandand cà e là se al foss tornat, se si ves sintud di nuja di lui. Par tiarz vigniva l'ansia della muribonda, che par una di ches visions di chei tai che son li vicins alla lor ultima ora, pareva che al viodèss in balia del mar chè dos puoris barchis, che par contentà l'ultim so desideri puartavin forsi a soccombi tantis personis, e a vai tre famèis.

Chista puora femmina jera nassuda a Gràu, nel miez a una nidada numerosa di creaturis, che dalla peschia del pari ricevevin la misera sussistenza. Gràu, ce no savessiso, lè una cittadella, pizzula ai nestris tims e popolada di appena 2300 abitantz, plantada nel miez d'un isuluta che sta sull'orli della nestra marina, lontana, dalla banda di miezdi, 7 miis dalla presint Aquileja. Ai tims anties, l'isola jera plui granda e plui biella, e la ciutat jera florida, richia e ridint. Quand che Aquileja, la ciutat dei imperators e dei patriarchis, chiadè nellis mans di Attila (an di Crist 452), come Concordia, Altin, e Padua e tantis altris; i abitantz di chè granda ciutat si rifugiarin impressa nel sen della laguna, e plantarin prima qualche tuguri e po dopo lis chiasis i palaz e i templis di Gràu, di Caorle e di Vi-

gnesia. Gràu jera qualchi chiossa za prima: un chiaschiel di uardia par la laguna, e il centro dei puarz di stazion della flotta romana (an di Cr 105) distaccada da chè che veva stazion principal a Ravenna, e destinada pai litorai dellis provincis venetis e dell'Istria. Ma dopo la chiaduda di Aquileja, al acquistà plui importanza, e dopo specialmenti la calada dei Longobarz (altris barbars del nord vignuz ju nel 568), cun la seconda ruina di Aquileja si fasè quasi capital dellis isulis: gi si confermà da papa Benedett I il nom di gnova Aquileja; ottignù i soi patriarchis che ul di paris dei paris; e al vè chel concili famos pal scisma dei tre chiapitui che vi lu spiegarin un altra volta, tignut dal patriarchia Elia il 3 di settembar del 579 nella basilica di santa Eufemia, che anchiamò esist, antichissim domo dell'isula. — Lis eruzions dei barbars par-altri seguitand a vignì ju simpri plui suartis e plui spessis, anchia chista puora ciutat al fo tormentada; cui gi dè il saccheggio, cui la brusà, cui diroccà lis fabbrichis plui biellis e plui richis; di maniera, che un poc alla volta, dut il mior si ridusè a Vignesia, e chel che no vevin distrut i umin, a buttarin par tiara il timp, il mar e la miseria.

Cumò dunchia no lè plui quasi nuialtri che un nid di peschiadors o poc miei, fur che qualchi glesia antiga o qualchi chiasa moderna. Il puor lè propriamenti puor culà dentri. E della miseria non la plui fortunada a nasceva la nestra dona Pasea, che vin chiatada sull'jet della muart. Un an, quand che jera zovina e biella, un altri zovin e biel, tornand dal santuari di Barbana, al si veva cula so compagnia chiazzat cun la barchia in sechia dentri a un banc di savallon, e al si jera metut a suazzà fin al cason là che je stava cun la so famea, par domandà lor un pochia di aga dolza par bevi. In sta maniera si vevin cognossut. Si plasèrin un cun l'altri; seguitarin di lì indenant a viodisi lis fiestis, allis sagris, allis zornadis di devozion. E, par

finila prest, si sposarin. — Dopo qualchi an un dei fradis di je, om di judizi e brav nella peschia (e chel che plui val, furtunat) al veva mitut di banda cul so lavor qualchi carantan. No jera migo una fortuna, saveo: ma par lui jera pur una spezia di providenza. Al si pensà allora di ualè fa qualchi afar; chiolè all'inchiant la fittanza di una val cul dirit della peschia par plui ain; cun so fradi al si metè a fa dabbon; e prima di jessi viei ne un nè l'altri, a si chiatarin a vè un capital nellis mans, da fà invidia a un paron di quatri o cinc colonis.

Il marit della Pasca, un puor diau senza nuja, vignuz su i intrics della fiolanza, al si metè a batti la quarta dei doi cugnaz, sgnoccolant qualche rimusui dei lor vodagns. Ma batt uè, batt doman, e ogni volta domanda qualchi chiossa di plui, i doi cugnaz si stufarin. Po, bisogna che saveo che jerin anchia un poc avaroz, come che lè simpri il puor che al fas fortuna cul sudor della propria front. E insuma finirin cul mandalu via. Il contadin che in part par la miseria solita, in part par lis anadis plui miserabilis della miseria, in part par lis malattiis che vevin chiapat a tormentà la so famea come ches di tang' altris, no saveva plui cimet rimedià ai soi cas. I affiz crescevin di an in an, i debiz si alzavin e manchiavin lis fuarzis. Scomenzà un an a vendi la blava nell'autun par pajà un debit e sparagnà cussi l'interess: par l'inviar provioderà Iddio! Vigni l'inviar: no jerin voris, no jera roba, no si veva credit, no jera cas di judassi. — “ Sior paron, se je no mi soccor, nualtris murin dug di fan „. Ma il paron chioleva sù il registro dei crediz, e il puor contadin lava via cun la fan, la vergonza, e l'aviliment. — “ Sior paron, se jè no mi juda, jo devi vendi i nemai „. — E il registro capitava in bal un altra volta, e il contadin taseva e si slontanava. — I prins ain al là malamenti, ma senza altris malans. Dopo, gi convignì colà nellis sgrifis dei usuraris. Po al vendè un manz, po un altri. Plui tard al vendè il second pàr,

e comprà un pàr di vachis. La tiara, mal collada, mal lavorada, a rindè sempri maucul. I creditors scomenzarin a fà plovi lis petizions. Il paron par paura che sparrissin anchia lis vachis, al chiazza un opignòrament sora di lor. Il puòr pari di famea al buttà il mani daùr la manara, al lassà che l'aga corrès alla China, e schias-sand lis spallis, lassà che fèin ce che uarevin, e finì cul jessi puartat all' ultima malora.

Licenziat dalla tiara che veva lavorat par taing' ain, ridot al possess di nuialtri che un badil, un manara e una forchia, al daventà sottàn, al si mettè a lavorà a zornada, fà viaz, sgiavà fondamentis antighis, cerchià monedis romanis, domandà la caritat! Oh, ma jera inutil! La miseria lè la danazion dei puors paris. Al si varess mitut a robà: ma gi vigni un pensier nella ment. — Cor là di un avocat: “ Si podia fà lit ai cugnaz? „ Infinochià sù ciarz pretesg' di ereditaz, di patrimonis, di divisions, di diriz. Al prèja, all'insist, al promet. — “ Ma i bez? „ — “ Dividarin la fortuna. „ — La causa è fatta.

Chista fo l' ultimà ruina del galanton. I cugnaz che judavin prima almanco la sur, gi voltarin allora li spallis affatt. La famea plui abbandonada e plombada plui in fond nella miseria, si viodè par zonta la conseguenza di malatiis plui lungis, plui numerosis e plui seris di prima, e l'on chiadè par desperat sora un jet a batti la fievera quatri ain alla lungia e a muri alla fin quasi d'inedia.

Fin che viveva il marid, la Pasca striscinava la vita lavorand quand che podega, e cirind la caritat quand che no gi jera pussibil di vodegnà cul so sudor onorat. La buna femina si tormentava di non podè assistì il so on, di non podè zovagi in nissuna maniera. Chei pos carantans che beccolava cà e là, no bastavin nauchia par la polenta. Lis midisinis o gi vignivin somministradis gratis dalla comun o lava je stessa a raccolzilis pai praz, jessind che la natura lè simpri manco avara dell'on; la natura disi, che cun la so providenza jà semenat l'as-

sinz e il santonic in tanta abbondanza nel pais dellis fieveris, come i limons e i naranz nel pais dei rischialz e dellis inflammazions. Ma dutis sti gran curis della puora femina no bastavin pai altris, e a jè stessa gi roseavin un poc alla volta lis visceris. “ Oh, la me miseria! „ a sclamava tantis voltis inzenoglada davant una cros, o sbassant i voi murtificada dal rifiut di chè caritat che implorava, o sgrufuida partiara sott una planta di sanbuc, o intor l'adulca amara che cuejeva par fà i decoz ai soi malaz che zemevin. “ Oh, la me miseria! „ suspirava la puora; e gi chiadevin lis mans, e vaiva.

Muart il marid, la so suarza jera za duta estenuada, e la volontat del coraggio jera anchia chè sfinida e distrutta. No passarin tros mes che jè covava il stramaz sul qual jera muart il so on; e jerin za nuv ain che si chiatava in chel stat, quand che nualtris la vin vioduda li muribonda.

Lis sos dos fiis si vevin maridad nella miseria culla miseria. Una veva vut siet creaturis e gi jerin restadis sol dos. Chè altra an di veva vut undis, e tre solis gi restavin in vita. I mariz jerin muarz anchia chei, un da doi ain, e un da tre. — Dei maschios la Pasca no veva plui nissun altri che Jacun, il plui zovin di dug', che nualtris cognossin za da un piez; e al timp che no'sin, il lavor di Jacun e la cerchia dei fruz tigniva in pis la famea, tant che la fan no vigniss propri a distruzila.

Chista poua malada dunchia, veva nei soi ultins mes fat prejà i fradis di perdonagi e di vignila a chiatà. Ma i fradis jerin durs: Se foss stat un sol, vares forsi cedut; ma in doi si mettevin sù un cun l'altri. Il lor rifiut la veva avilida di plui e buttada a tombollons viars la fuessa. Capitada po l'ultima so zornada veva sintud un strinziment di cur, una passion, un affan che no podè tignissi di prejà Jacun che coress subit a Gràu, e che pre-jass chei soi barbis di vigni in pressa cun lui, parcè che jè si sintiva in fin di vita, e uareva viòdiu anchiamò una volta cajù, jessi perdonada, e bussaju. — “ Va tu, in

persona, ti prèi; nò sta fidati di nissun; mèniu; digi che io muri, che jài patit tant, e che mi bastaress di viodiu anchia lor al me jet, par dismenteà dut e muri senza dolor e contenta „!

Ma viodind che la gnot si avanzava, e cun duta l'ansia del mal sintint il strepit del vint che infuriava, scomenzà a sinti una paura dolorosa di qualche disgrazia. Zavariava quasi simpri, ma nei soi suns tenebros messedava i noms di buraschia, di aga, di muart, e : „Jacun, no sta là, no uèi, . . . oh, sintis ce timp! . . . lè il montafin, Jacun . . . murin dug' . . . fermàilu . . . Oh, la me miseria! „ — e s'ingrizigniva duta insieme come un glimuz, e gi s'inclapivin i ding', e tremava, fin che o tornava a sberlà, o colava, come dopo una gran fadìa, stracca, rotta, imbramida.

In chist frattimp i vinz si vevin propri dischiadenat, e un siroce sglonf al veva chiapat a sofflà, nettant via la levantera di prima, e sollevand a grang' cavallons tantis ondadis, che a ogni sovoltada plejavin jù la schena in un vòrtiz, cun chel sussur che fasin lis franis dei monz, che precipitin a saltellons nella val. Plui che il vel della gnot, una cuviarta penza di nùì che si veva distirat sott la capa del cil, faseva propri spaventosa l'oscuritat. Quatri gotonis di ploja scomenzavin a colà raris ma pesantis cà e là come tanta timpiesta. Viars jevà di soreli si viodeva una strica lungia di nul colorida d'un zal rossastri ma cussi fastidios e sepolcral, come il rifless d'una gran flama lontana. Di cà, di là, vigniva alla uarela, fra miez al strepit dei tons e alla chiaduda dell'aga che si rompeva in sè stessa, il sun distant e distirat di qualche chiampana che al prejava la grazia di Dio fra miez al temporal che infuriava. Scomenzà a rompi la ploja : un diluvi. I lamps si confondevin un cull'altri : i tons parevin come l'eco profond al precipità fragoros di un gran clap dentri all'uet d'una

grota. E il vint che al sivillava come i serpinz dei danaz, pareva che al uaress sconvolzi la tiara.

La famea del peschiador, tremant, spasimada, senza savè ce pensà, stava inzenoglada nel miez della so puora capana, prejant devotamenti il rosari. Un ramut di ualif al fumava su quatri boris fra la cinisa, e un luminut ardeva di una lus pallida e quasi muarta, rindind cul so trist splendor anchiamò plui tetra chè scena. I lens del tuguri, sbattuz dal vint, parevin che ciulassin anchia lor e scriccavin come una breja sechia che cumò al si sclapa, cumò al si schiavezza pal miez. E traviars lis chianis scelpignava una rosada minuda, che in part la ploja, in part lis ondis fasevin penvetrà fin là dentri. Dut in un moment, un ondada traviarsa la paradana, si dilata sul terèn e spariss. — La femina salta su spaventada. Un moment di silenzi. — Un altra onda si mostra, e una tiarza e una quarta. La femina si presenta cul chiav bass sott la puarta. Un lamp gi mostra ai voi stralunaz dut intor nuialtri che un mar: jera come sott il pleniluni d'invier, quand che si sglonfin cussi fuart lis gran colmis. — Petta un salt in daür cun terror. La disperazion gi lè entrada nell'anima. Chiapa dos dellis sos creaturis sui braz, la tiarza gi si tacca allis cottulis. Jess fur; traviarsa l'aga a mieza giamba. Spessèa: ma la frutta plui granda no pol stagi daur: „ Cor Menia “ sberla la mari: „ cor che se no si nein! „ A lè inutil. Nell'oscuritat, che i lamps fasin anchiamò plui scura, nella confusion, che il pericol fas anchiamò plui disperada, no san là che vadin, no jan plui lun di reson che lis meni. Cenonè — dopo un gran travajassi — un lamp gi palesa un rialz come in fòrma di rapar, poc lontan di lor. „ Ah! “ al ciula consolada la mari. Sollecita il pas. Son za quasi viciniis . . . Un canal lis separa: un canal larg, profund, che al si spalanca davant ai lor pis come la muart fra la vita e l'eternitat. Ma la disperazion d'una mari lè plui granda d'ogni difficultat. Cun t'un pensier improvis al met jù la bambina

mezzana, d'un quatri ain all'incirca: „ Tegnìla “ i dis alla granda: „ stait ca, torni subit: “ e si butta nell'aga. Nada travìars. I abiz gi fassin intop fra lis giambis, lè za lì par plombà ju nel fond; ma chiapa un ram di baraz che gi si presenta davant sulla riva. Il ram ced, jè cola indaùr. Lè un contrast propri di muart. Fas un altri sfuarz prodigios. Spinz un altra volta la man insanganada fra lis spinis, gi si tacca dentri come la gramogna nel terren; ma chel altri braz no pol dopralu parcè che ten la so creatura cun lui. Cui ding' si tacca allora strenta a chel ramaz che tigniva. Butta inàenant la man, e si chiapa plui in alt. Ripet una seconda, una tiarza volta chist moto. Finalmenti a lè sul sut, a lè in salv sulla riva!

Depon la creatura, si dispoja nuda, e torna nell'aga. Salva la seconda, e si chiàzza una tiarza volta nell'aga. L'ultima lè salva anchia jè.... Si butta in zenoglon par ringrazià Iddio, e chiad ju come muarta.

In tal doman jera la plui biella mattina che ves mai consolat la natura di chisg' bieì pais. Il cil limpid come l'aga d'un diamant. L'aria trasparent, senza una bava che disturbas il spieli cujet dell'aga o i fii lizzers e suttii della jarba dei praz. Saltavin allegris i armenz pai pascui, e i uzzeluz chiantavin cul lor sivil di legria sui palluz, sullis chianis, sui arbui. — Il contadin e il pastor mandavin anchia lor il salut dellis lor canzonettis all'aria. — Soltant cà e là, par l'aga, si viodeva gallegià qualchi rimusui di cogòis, di casons, di fòssignis, di uatis, di rez. — Una famea di peschiadors chialaut chè desolazion si sintiva rompi il cur e selamava: “ oh lis mes miseris! „ — Un zovin smuart, sbattut, cun t'una lagrima sechia nei voi, al vaiva in t'una puora chiasa d'Aquileja sora un cadaver. — E barba Sef, sintat nella so cusina, cun duta la so int di chiasa intor di sè, al finiva di contà una lungia storia sfregolansi lis mans e disind: “ cumò 'o mi spieti la fievera „.

LA ME STORIA.


Isa storia, isa romanz o poesia? — Lè un poc di dut; parcè che la storia dei popui lè come una religion: lè memoria, desideri e speranza.

Nualtris, come che si chiatin a jessi cumò, culla nostra religion, cullis nestris lez, cui nestris costumes, cui nestris affiez, cun lis opinions nestris, sin come una planta di lontanis ledris; sin come un gnov edifici tirat su cui avanz di tang' altris che plui non esistin. Al comun, alla famea, alla possidenza dei antics europeos, vin incrosat la fede religiosa dei asiatics, l'inspirazion poetica dei affricans, il sentiment patriotic dei prins popui d'Italia, la scienza dell'Egit, la prevision dei profez d'Israel, la bellezza dei grecs, l'energia dei romans, l'instabilitat dei barbars, la volontat operosa, pazient, rassegnada che ispirava il vanzeli.

Chista nostra patria si clama, come che saveso, il Friul. Lè una porzion di chel pais plui grand che si clama Italia, come che la Savoja saress una part della Franza, e l'arciducat d'Austria una porzion di Germania; e l'Italia, la Germania, la Franza tantis fraziions dell'Europa. — Chista nostra tiara, paraltri, jera jè simpri compagna, simpri popolada d'una sola stirpa, simpri componuda d'istituziions che somèin perfettamenti allis nestris? — Tre o quatri mil ain, trenta o quaranta secui, cent o cent e trenta generaziions, no son una tirada di flat. Ma chè int che in che volta viveva, jà vut famea anchia jè, e fioi, e nevoz e posterios — i quai, da un all'altri, si mandarin lis lor usanzis e i lor interess, come che fasin no' cui nestris. Chista tiara e chist cil jan vut simpri plantis e lus, moviment e calor, il soris benedett della speranza, e la rassegnazion della tomba che misteriosamenti si sia-ra sul passat e sull'avvignì, e che no rispund nanchia



Lit. Seitz



alla lagrima dell'amor nè alla blestema dell'odi. La vita lor no pol dunchia jessi muarta cun lor, e i sentimenz che animarin i paris, si comunicarin sicuramenti nei fis, come che i faz che operar in i prins insegnarin a operà nella stessa maniera ai seconz, cun t'una continuazion di esperienzis che una all'altra si lèin. Par altri il pensier dell'on fat no lè come chel del bambin, nè il sentiment della creatura che vài nellis fascis no lè compagn di chel della mari che lu chiarezza e nudriss. Par conseguenza l'etat del mond lè come l'etat dell'individuo: cress, e dà suarza, e perfeziōna, e consola; e par spiegà chist mejorament della vita, bisogna rinasci di man in man nella vita dei avos; e par no confondi i principis lor, si dev cerchià di riprodusi in no stess il pensier e i affiez di chei tai che di etat in etat vivevin za prima.

Vo sàveso che il mond una volta contava dàur il calcul dei savis una vita di frut. Second lor cumò nol saress plui vieli d'un on che vares 5857 ain par puntin. Ce vi paria? Un on si, saress vieli: ma il mond? — La scienza ja ulut persuadessi: lè montada sullis montagnis plui altis, je svolada par aria cui ballons, si ja subissat nei poz, nei sotteraneos, nellis cavernis, nellis grotis, nellis minieris, e perfu nei vulcans; ja esaminat, scandajat, analizat ogni roba; ja osservat in ce maniera che si forma ogni gota di rosada, ogni gran di savallon, ogni lusigna di metal, ogni fil di lus, ogni vena di calor della tiara; — e sàveso ce che ja concludut? — che il mond lè mond, e che la so etat conta, a di poc, un milion almanco di secui.

Misericordia! direso vualtris ... Ma vaid a plane, e no stait spaventassi; che no vi meni tant par la lungia, nè si dev crodi che Adam sei nassut cullis stellis.

Quand che la tiara ves podut formà l'on, come hec produs il viar oben l'acquila, no nus impuarta

par cumò di savelu; par cumò, jo disi, che no si tratta di spiegavi la *materia animada*, ma l'*anima civilizzata*. In ce moment che l'on vès fat la so prima famea, come che il chian domestic o la tигра salvadia componin la lor, no mi occor nanchia di divilu, in fin a tant che no si fevella di *istinz*, ma di *principis*. Ma quand che la int si ves unit in un armonia di pensiers, di sintimenz, di volontaz e di operis; quand che i umin, dispiarduz par la tiara si metterin in alleanza fra lor, e si clamarin popui, e derin vita al consorci e alla suarza social — chist, par dimostrà il caracter della societad e i pas della civiltat, occorres ben di cognossi.

Duta sta storia paraltri lè un chiamp nel qual la memoria si piard, e si abbandona dutaquantà all'idea. E l'idea dell'on, par esaurì l'argument, al met- tète insieme la vita, l'istint, i bisuins e la reson, e sviluppand l'astrazion della storia, supli all'ignoranza dei faz culla percezion dellis regulis.

Un gran scrittor ja clamat l'on un animal eminentementi *social*; val a di dotat di una tendenza a unissi in consorci, dotat quasi si diress di un istint che lu puarta a acquistà un poc alla volta dut chel che gi zova e dut chel che podarress zovagi nel seguit. L'amor gi dona una campagna e dei fioi: ecco la famea. L'uso presint gi fas capi la necessitat di pensà ai bisuins del futur: ecco la proprietat. La necessitat di proviodi al propri avvignì lu spinz all'emulazion: ed ecco l'equilibri dellis volontaz e dei miez. Il pensier di garanti a sè stess il liber esercizi dell'emulazion operosa, lu obblea a rispettà i fruz dell'operositat altrui: ed ecco in fin il ricognossiment dei mutuos diriz e la confession dell'eguaglianza individual. — Dapprincipi no poteva jessi proprietat perpetua e eguaglianza social senza occupazion, nè occupazion senza ricognossiment di diriz, nè rispiett di diriz senza suarza, nè unitat di con-

sorci senza fundament stabil di ideis: ecco par conseguenza la lez. Ma lis passions son par lor natura insubordinadis: quindi la necessitat d'un principi comun e superior a dug' quang'; la necessitat di assoggettà ogni principi terren e mondan al principi d'una ment granda, provida, incomprendibil, eterna — Dio: ed ecco la religion. Ma diviarsis jerin lis aspirazions, diviars i talenz e lis suarzis; diviarsa quindi l'applicazion, diviars l'esercizi, i miez e il resultat: ed ecco che la societat fra la int a daventà varia all' infinit, sminuzzada; ma ristretta nel confin di un scopo comun e stabil, uèi di in chè unitat di principi che fas concorri cul pensier, cui affiez, e cull' opera, separadamenti un par dug', e nell' insieme dug' quang' par ognun nei bisuins della vita.

Nei prins timps il gener uman si univa in famèis e in tribùs: tiarmins ristrez, che obbleavin dug' insieme chei che lis formavin a una applicazion sola, simpri egual, e il plui delli voltis nuialtri che distruttrice, come la peschia e la chiazza. Par chist viodin in chè epochis i pastors, i chiazadors e i peschiadors, uniz insieme, figurà ognidun il caratter d'una nazon. L'agricultura dilatà e multiplicà la forma dellis societ z primitivis. La cultura della tiara, domandand impresg' e mestiers, a creà il bisuin di dassi a sti gnovis applicazions, lis quals podevin e dovevin soccorri alla fattura dell'agricoltor. Un poc par volta al s'ingrandì il chiamp dei conzorciz; si slargià l'union dellis famèis; si dilatarin i confins dei pais che si abitavin. La prepotenza dei suarz a uoi insieme la debolezza dei vinz, e il contrast dei tros debii cui pos prepotenz persuadè la fusion dellis suarzis, jessind che chiatansi a jessi dug' contra dug', e avind par fin di combattisi e di superassi, si ridusevin a dassi soccors vicendevul, e a deludi cullis istituzioni civils lis intenzions del natural egoismo. In sta maniera, chei che podevin doprà i braz nella uera

imagarin i miez e il sistema di difesa e d'offesa: ed ecco la milizia. Chei tai invece che dalla natura no vevin ripuartàt il don dei muscui di fiar ma dell'intellett che al resona, doprarin par la lor conservazion invece della fuarza l'inzen: ed ecco i tribunai, i judiz, i sapienz, i regulators della vita. Sora chisg' elemen, si plantà una spezie di sicurezza e di ordin fra la int; e in seguit a chist al vignì il cambi dei ogez superfluos cui ogez necessaris: ed ecco il comerci. Daur il comerci nasceva la volontat dell'indipendenza social, procuransi cull'art ce che la natura no dava, o ingrandint cull'art stessa la quantitat dei prodoz naturai, mediant l'emulazion, val a di la gara di fà tropp, miei, prest e cun sparagn di fadia — ed ecco in ultim l'industria. — Lis lez, la religion, la fuarza, i talenz, l'agricultura, il comerci, l'industria crearin la ricchezza; la ricchezza a dè vita alla prosperitat dei pais, la prosperitat all'invidia, all'ambizion, alla discordia; chisg' vizis puartarin la diseguaglianza; la diseguaglianza i costums e i privilegios, e chisg' ultims sfuarzarin la int alla division, all'emigrazion, alla formazion di altris popui e di altris costums, fasind in sta maniera che si mesedassin i regnos, i scias, i parons, i principis, lis lenghis; e dand in sta maniera scomenzament a chel chiamin prodigios della civiltat, — moto, svilup e perfezionament, che anchiamò lavorin pal ben dell'umana famèa. —

Dut chist cà va benon, vo direso, — ma la civiltat, di dulà lè vignuda la civiltat? — Oh, la lus ven dall'orient, no saveo?

Nell'oscuritat dei tims primitivs, una chiossa sicura lè, che nell'occident (lis nestrìs bandis) no si chiatavin a jessi grang' consorcis di nazions, ma tribus minudis e numerosis, e lenghis che no si capivin fra lor, quand che nell'orient jerin za grang' e formaz i regnos sacerdotai in chei pais che son l'Eden

della sacra scrittura e che dèrin origine alla parabula santa di *Adam* e della so prima famea. Chista prima patria della civiltat si estindeva dilung del *Gange* (un dei quatri fluns del paradis terrestre che al traviarsa l'India), dell'*Indo* (un altri flun di chè tiara), del *Tigri* (che jess fur nell'Armenia e va fin jù nella Persia), dell'*Eufrate* (che ven jù dall'*Ararat*, val a di chè montagna sulla qual dev vessi salvat da qualche gran pericul chel popul che sin soliz di rappresentassi in Noè cullis sos tre tribuz di Cam, Sem e Jafet) e nell'alta vallada del *Nil*, il placidissim flun dell' *Egit* che fin da bambins veso za sintut nominalu. Nel lengaz poetic di chè int primitiva chist popul lè stat clamat il prin on, come che si varess ulut di cun chist, che prima di lui no si chiatavin a vivi che bestis. Jera il prin che ves dat ordin alla vita quasi si podaress di cittadina. Jera il prin che des principi alla scienza. A lui l'astronomia insegnava il nassi e il tramontà e l'influi dellis stellis; l'idraulica rivelava lis vicendis dell'aga e la so suarza micidial o benefica; la midisina riduseva a calcul la salut e lis malatiis, e pandeva quasi diress i miracui della natura e li sos providenzis. Ma chista sapienza, nassuda fur dalla pratica e dalla riflessione dell'individuo, jera restada privilegio di famea fra chei pos, e diventà il principi d'unacasta separada da dug, che usurpà in brev timp un autoritat illimitada cul santuari e la regia. L'arbitri monarchic di sta casta sacerdotal, profitant dell'ignoranza del popul, si fasè orrendamenti tirannic. Sott di lui, lè plui il cil che lavora cui so spauraz, che non l'intellet e l'ordin cui lor provedimenz. L'on lè slav d'una potenza occulta che lu spia dapardut, e lu colz quand che manco si pensa. Nissun pol saltà fur del confin che gi ven assegnat. Il *Paria*, che deriva da un popol buttat nel disonor della sclavitut di chei tims, lè una maladizion del gener uman, lè una pesta che contamina qualunque

altri on che lu tochia. No lè cur che batti nel pett di creatura umana che podi liberassi dalla chiadena dei affiez che gi son comandaz. No lè intellett che podi contrastà mai cul consens dellis lez azzettadis, cull'infallibilitat del domini suprem, cullapotenza della natura fatta sclava dell'astuzia dei fuarz. Agni roba lè una prescrizion, dalla qual no si schiampa. Ogni volontat, ogni sentiment, ogni idea jà la so misura, il so dovè, la so regula. L'isolament individual distruz la dignitat personal. L'ordin insuperabil del dovè, non sintut ma comandat, schiaffoja cul terror del chiasti e dell'infamia l'arbitri dell'anima che cerchia di liberassi e no pol. L'uniformitat e la stabilitat distruzin la reson. L'on lè daventat una macchina fra il cil e l'infier. E l'anima so lè plejada sott il peso della materia che schiavezza ogni volontat, che romp il cur e la ment, e mett l'on al livel della piora e del chian, parcè che no pol uguaglialu alla bestia salvàdia. —

Pur, anchia sott chista tetra e feroz disciplina, la civiltat si propaga, e frenand a poc a poc l'impit dellis passions, assoggetta la int a una lez, e gi impediss la distruzion di sè stessa. Dalla vita ziròvaga la obleja al sentiment d'una patria. Dalla sussistenza incierta della zornada la costrinz di passà ai provedimenz del futur. La inchiadena alla uarzina che seconda la tiara; la uniss in cittadinanzis che abbellissin i pensiers e i affiez; muda cul sudor del sclavin praz i palluz, in chiamps i deserz, i bosc in vignis, in pomeris, in olivez. Viarz stradis e puarz e canai. Uniss in qua gran lenga i dialez. Usa i geroglifics e scuviarz la scrittura. E cun la memoria dellis operis e delli scuviantis za fattis, butta nella societat umana lis fundamentis dei esperimenz che incoraggissin il desideri di meiorà simpri la vita — e la civiltat vera scomenza.

Clamat da chist desideri, un di chei popui sat-

vadis, cala jù dai monz dell'orient viars tramontana, e scielz un ricovero stabil sul declivi dell'Indocàucaso, val a di su chè falda di mont, che dividind la Scizia dall'India, chiala appunt viars chist ultima. Lassù lè dunchia *Promèteo*, la personificazion della civiltat plui antiga dopo chè del prin pari. Chel altiplan, abandonat fin a chel moment ai boses, e al desert, si convertiss sott di lui in un zardin di delizia, e ven creat il regno dei *Butros*. Dallis stessis montagnis, un'altra int a ven jù viarz miez di, e istituiss la famèa dei *Bramins* sora l'Indo e sul Gange, che famèa che anchiamò viv e regna, e che lè forsi vergin nellis sos credenzis e nei soi costums anchia uè. — Chist dall'Asia. — Intant l'Africa veva sintut un poc di spirit di vita anchia jè, e il sacerdozi *etiopic* (che regnava nell'Abissinia fra l'Egit e l'Arabia) lu fas arrivà fin allis fosis del Nil, là che incontra la civiltat indiana, plui granda e plui perfetta della so; chè civiltat che creava l'industria e no meteava anchiamò la vita dell'on all'arbitri d'un Dio che devasta e distruez. Ma mescedaz in sta maniera i doi principis sacerdotai, e confonduda quasi la lor vita par un contat cussi strett e par una lungia derivazion di pensiers e d'affinitaz, si mescolarin l'Egit cull'Asia, i pastors del desert cullis cittadinanzis formadis. Un poc alla volta l'Egit supera l'Asia. *Sessostri* inalza la vita del popul; crea il regno civil; istituiss la forma non individual ma social della lez. Il *Delta* (che lè il bass Egit) ven sechiat dallis aghis; si regola il Nil; si alzin sora il livel dell'inondazion cun tantis collinis altrettantis cittaz; e dalla sclavitut dei asiatics superaz e vinz, si crea la vita pubblica dell'egizian, e si forma il gnov guviar e la gnova ricchezza.

I *Caldeos*, popul dell'Assiria o Soria, e i *Babilones*, abitanz della capital dei Assiros, alzin la tor dellis osservazioni astronomichis (la tor di Nembrod

uei di o di Babel, che ja da mutiv a tantis invenzioms e a tang' suns) e da jè fan nassi a furia di osservazioms, fur dalla gnot della superstizion, l'alba della scienza vera — cussi mal comprenduda. I *Assiros* stess, popul industrios, dån anima alla stabilitat della vita cui splendors della richiezza plui granda. I *Medos*, popul guerrier, creïn sul mar Caspi l'autoritat militar. I *Persians*, int del riposo, istituissin il scompartiment dei pais e la sudivision dei guviars. E il compless di chistis basis d' un avvigni regolâr e sigur, si trasfond un poc par volta sull' Europa mediant l'Italia e la Grecia — lis quals raccolzerin chel prim lamp che mandavin intor dutis chistis istituzions separadis, e mediant l'immigrazion dei plui scielz, come che cumò succed nell' America, puartarin a perfezion plui completa i ordinamenz della vita; i quai riceverin plui tard il lor ultin svilup in Roma e in chei comuns che vi farin cognossi nel seguit.

Ma quand che l'Italia scomenza a ricuardà la so storia, nualtris chiatin in jè una tal quantitat di popui differenz e nemis, che nus saress impossibil di diviu. Lè (e vi lu disi in coscienza) una madassa imbrojada. Cui la ul blanchia, cui la ul rossa, cui la ul di un altri color. Nualtris vi la darin in sucint come che il cur nus la dà: e se i tims no nus faran piardi la vena, vi spiegarin miei chisg' altris ain la so vita.

Il nom d'Italia in chei prins tims della storia, non abbrazzava dut chist zardin (come che lu clamin) del mond, che si chiatava a jessi, vi disi, dut sminuzzat e spartit fra chei che jerin staz plui bravs di chiapalu. Dapprincipi si clamava *Saturnia* da chel Saturno, che dopo una uera civil, rifugiat lenti intor, gi lassà il propri nom, come anchia chel altri di *Latium* o *Lazio* a chè part di pais nella qual si veva scundut, derivant la paraula appunt da *Latibulum*, che ul di nascundiglio. Plui tard la clamarin *Ausonia* par un lung timp. Pò la diserin *Enotria*, che ul di

tiara dei vinz, pai vinz che la dominin. Po *Esperia*, che pai greco equivaleva a tiara occidental o di ponent. Finalmenti la denominarin *Italia*, il qual nom second qualchidun deriva da *vittlu*, vigiel, come un pais abbondant di bus e di pascui. Altris par altri cun l'una etimologia plui benedetta, ma che no lè stada un pronostic, lu derivarin da *Itaria*, che nella lingua fenicia ul di *tiara della pas*. Altris da *Atlas*, (*Atlant*) parcè che un poeta la jà clamada cussi, al dis un lombard. E altris par ultin, da *Italo* un re, che lè la solita scurtarola dei debii. Dapprincipi chist nom abbrazzava solamenti chel pais che lè ristrett fra il sen Lametic e il Scillatic; e quand che al abbrazzà duta la tiara siarada fra lis alpis e il mar, lè stat quand che nella uera social, vot popui di chist pais disgraziat si alzarin in lega a maladi il domini di Roma, e preparà culla uera civil la carnificina che viodarin po' compissi dai barbars e sui barbars.

I soi prins abitators son inciarz. Cui jù fas saltà fur dalla tiara come Adam o come lis plantis, e ju clama *aborigenos*. Cui ju deriva da un popul *Fenici*, che stava in una part della Siria, dongia la Palestina attual; altris dai *Gai*, che saress come di i Frances di plui che quatri mil ain in daür; cui dai *Celtos*, che a chei tims occupavin il *Liones* della Franza. La probabilitat plui granda stà par chei che ju faserin vigni jù dai monz che nus stan soravia, fur da chè int che si clamava *Pelasga*, e che ul di zirand o vagabonda.

Fur di chist tronc primitiv, i nestrìs popui plui viei che nus ricuardi la storia son i *Auruncis* e i *Oscis*, dei quai paraltri assai poc nus fevella. Vegnin subit dopo i *Sicui*, che appartegnin appunt a ches dos razzis di prima, ed i quai ju chiatin nell' Italia central. Estinduz in troppis bandis della penisula, schiazzaz po dopo dai *Enotris* che uèreggiarin par tre secui cun lor, si rifuggiarin infìn nella Sicilia, alla

qual fin da chel timp rimotissim lè restada simpri viva l'hereditat del lor nom.

Si presentin po' i *Umbros*, antighissims e suarz, che battuz dai furistirs fur della marina adriatica, occuparin a dan dei Sicui dut chel pais che si comprend fra l'Arno, che lè il flun di Firenze, e il Tever, che lè il flun sul qual plui tard nasceva Roma, la regina del mond. — I *Rasens*, altri popul antic italian, penetrà nell'istess pais sulla ruina dei *Umbros*; e dilatand di li a qualchi timp la lor signoria sora una grandissima part dell'Italia, istituirin doi staz: l'*Etruria meridional* e la *gnova*, cun 14 cittaz suartis e biellis, nella porzion superior della penisula, dula che cumò chiatin la Toscana.

I Illirics, i Liburnos, i Tèssalos — duta int forestiera e feroz — passarin plui tard l'Adriatic, e quartarin dalla Croazia e dalla Dalmazia e dall'Istria la prima memoria dell'invasion forestiera in Italia — scomenzand da chel moment dut chel catalogo lung e doloros di ueris e di sterminis, che jan mudad par tang' secui la sede, il nom e la vita di popui che plui non esistin.

Saress lung a descrivi lis differentis famèis che da chisg' rams derivarin cul progress dellis etaz; parcè che dai *Oscis* vignirin ju i *Sabins*, dai *Sabins* i *Picenos*, pò i *Cascis* e i *Latins* primitivs; senza nominà i *Rutui*, i *Erniz*, i *Equis*, i *Vulscis*, duta int che stava nell'Italia central, che saress come a dissi intor Roma. Nell'Italia inferior, val a di viars Napoli, jerin prima i *Peligns*, i *Màrsos*, i *Campanos*, i *Sanniz*, dal cui sang vignivin po' dopo i *Irpins*, i *Caudins* e cent'altris. E no contin chei della part superior della penisula, nè chei della Sicilia, che prima dei *Sicui* jera abitada dai *Sicans*, nè chei della Corsica e della Sardegna che capitarin fin dalla Spagna e dall'Africa.

In ches epochis, lis nestris provinsis ca intor

jerin popoladis in sul principi dai *Carnos* o dai *Euganeos*, che gi derin il lor nom, fin che si clamarin in ultim *Venezia*, da chei Venez prims che l'occuparin plui tard, e che lè inciart di ce banda che capitassin. Si clamà po *Gallia citerior*, che ul di Franza di cà dellis alpis; pò agro aquilejes; pò *Carnia mediterranea*, e *Forojulio* e *Friul*, come che disinanchia uè. — I Venez che nus presentin pai prins un fregul di storia, derivavin ciart da una di ches famèis, che una schiarsa civiltat lis faseva di barbaris. La lor religion jera una mescedanza di principi italie, settentrional e asiatic, par consequenza manco sacerdotal dell'indiana. Lis lor lez vevin il caracter templari dell'Orient. La lor lenga pàr quasi uns diramazion mescedada di ches che si sevellavin sul Gange e sul Nil. Lis lor cittaz jerin cinc: *Celinam* (Maniago), *Atinam* (Attimis), *Carnon* (Cormons), *Oera* (Doberdò), *Segestum* (Duin o là incirca). Ma una sorimposizion di costums, di religions, di lez, di lenga, di caracter social, che ju fas distingui dall'indul primitiva dei popui orientai nus dimoëtra che lis imigracions (che ul di entrada di forestiers, come che emigracion significa la sortida d'un popul fur del propri pais) alterarin la fisionomia originaria del lor prin caracter. —

Dal compless di sta storia — Dio, l'on e la muart — si rileva duta la filiazion della storia che vi contarai dopo. Lis tribuz montanaris e agrestis dell'antiga Italia vevin sentimenz quasi si diress casualins, amor di chel boccon di tiara che lis nudriva, cult par divinitaz che i costums lor campagno i vevin cread nell'anima, lez di uguaglianza local e personal, societat di tradizions rispettadis fra il consens della multitudin e il principi della difesa comun. — Su chi sg' principis nostrans si buttà dopo il principi oriental di una lez divina, e l'uso settentrional dellis divinitaz subalternis che personifichin l'idea, e dan forma alla volontat e ai affiez. Po ju viodin da una banda

formà la famèa e lis lez e i altars sui sepulcris, come che il caratter egizi insegnava, mentri dall' altra chiatin i voz dellis primeveris fatals (un sacrifici di dug i prodoz di chè benedetta stagion, non escluduz da che terribil condanna nanchia i fioi della femina), il qual costum vigniva dai deserz e dai boses dei salvadis, che in chè maniera sfogavin la troppa multiplicazion della int. Ju viodin, come i popui dell' Africa, accettà la magia, qualchi volta sapient e plui vottis superstiziosa, e accolzi come l'indian il principi dell'onor, di casta quasi simpri supiarb e egoista. D' una banda la vita agricola — vita di pas. Dall'altra la vita vagabonda — vita di pericui e di uera. Culi la fatalitat dell'onor nazional, istint permanent di chisg' popui; là il presentiment del dolor, caratter d' una int disfurtunada, che ja abandonat patria, fradis, paring', e che sint in sè stessa la condanna della propria disgrazia, e capiss che la suarza si consuma e cun je i sentimenz e la vita.

Fur di chist gran poema dell'umanitat che si rifond e ricrea, si prepara chel altri poema plui grand dell'umanitat che si spartiss e solleva. Chist quadri dell'on, che ricev da ogni banda un dovè e un diritt, si racolz in un contorno plui pizzul, là che una int plui ferrea e plui sicura di sè, crea lis istituzions della vita. *Romolo* lè la figura di chist popul sovràn. *Romolo*; l'idea della prima cittadinanza militar e civil, come Adam jera chè del prin popul, e *Promèteo* chè della prima nazion. — *Numa* lè l'appellazion collettiva del senat sacerdotal, che nella dea *Egeria* comprend come in un codiz la prima vera lez divina e umana. — *Servio* lè chè etat furtunada, che cul prin guviar regular e just, solleva fur dalla sclavitut la plebe, che otten possess, nom, volontat e virtuz come i altris. — E *Ostilio*, cun lalotta dei tre zimui par banda (i *Curiazis* e *Orazis*), lè la tradizion di chè epoca, che puarta alla vittoria comple-

ta il principiroman, e prelud a chè suarza che nell'etat posterior concludeva culla conquista del mond. — Po ven Bruto — il creator della patria pal popul. — Ecco Roma.

Siet res dunchia prima della cittadinanza romana: siet popui — siet epochis. Come lis siet zornadis della creazion, e cussi siet societaz par produsi l'on e la vita. Dai sepulcris di che int nasceva an principi di vita che creava, conquistava e donava. Dut il mond veva contribuit a creà la civiltat romana — la potenza romana doveva conquistà par necessitat dut il mond. — Di culi no si schiampa: o savè vivi, o savè muri: lè il destin di cui che ja quatri visceris nel sen e un principi nell'anima. Roma veva savut ualè — e Roma ja ulut la vittoria — Chist' altri an vi lu spiegarai par la lungia.

Cumò jo domandi: veso capit la me storia? Il registro lè chist: Disperà della sapienza lè disperà della providenza. La vita vera ven adasi, come la veritat che illumina, comè la persuasion che fortifica. Vivi ul di vè una mission di còmpi: e una mission lè come una voja — si la puarta fur dal sen della mari e si la sippiliss nella fuessa.

Il gran protocoll di duta sta gran mission della vita lè la storia. — Entrait in una glesia: il so altar lè una storia. Vaid in un cimiteri; ogni cros lè una storia. Chialait l'aga dei ffuns; e la direzion del so cors lè una storia. — Dut lè segnat in chel libri — e ogni paraula o promet, o correz, o anima, o rivela, o ammaestra, o consola. E il mond che al fo' lè come un gran feral sull' orli d'un precipizi: e la int che no lè plui, lè come il libri d'un mestri onorat, che ten viva nei scuclars la memoria della so lungia esperienza, e insegna a sperà anchia quand che sconfuarta, e mostra il ben anchia fevelland del mal che ja scontrat o che ja operat nella vita.

Il sistema metric e lis nestrìs misuris.

Ragguaglios.

Sior sì; anchia il star e il cuinz e la quarta. Dopo un milion di secui che il mond al tombòla, no isa ora che i din anchia nualtris la so buna misurada in ta cuestis?

Ma par fà il propri cont a puntin, lè necessari intindisi prima. E cun vinchiasis qualitàz di misuris che vin su sti quatri spannis di tiara che lè la nestra provincia, dulà isa chel cerviel d'Isaia, che nol piardi la bussola?

Lis pizzulis divisions comunals, l'individualitat isolada e minuda, e l'arbitri furbesc di qualche contrabbandier di coscienza, nus jan lassat fin dai secui passaz chista biella ereditat che stomèa. Cui diressial che sin fradis e prossim, viodind che il doi di Cajo al fas quatri par Tizio e dis o ving' par Sempronio?

E chista stupida usanza al fas pluì mal che la barriera d'una dogana, o il siarai di chei quatri vinz che nus tègnin in schieputa. Lè un impediment insuperabil fin a tant, che dura; lè una chiadena, una muraja, una rosta, tant pai marchiaz del ben jessi social, come par chei del cur, dell'intellet, della volontat, del dovè e della coscienza. Lè un lambic che divid, un tames che separa, una spada che tronca il nodo gordian della vita vera d'unpopul.

Par chioli chist inconvenient, ca di no' dev jessi scomenzat cul prin pass; dev jessi chiolt cul distrusi. Ogni nestra misura lè comunai; ogni so proporzion e ogni so rappuart son esotics. Conservà un sol, lè conservà una dipendenza a elemenz che no appartegnin nè alla civiltat, nè alla condizion prima di vita par no: il caratter nostran.

Ches relaziuns dunchia che no si distruzeran mai, che fonderan in t' un unic principi i sentimenz e i bisuins d'ogni int, che siarvaran simpri tant par la vita comun, come par l'intelligenza e la scienza: ches son lis relaziuns della civiltat vera e la fusion di ches volontaz che no murin. A chistis dunchia 'o vi clami. Scoltaimit.

Decimetro (10 centimetros, o la decima part d'un metro)

Cà di banda vo chiataiso la misura del metro, immaginat dall'Accademia francese, come l'unitat d'ua misura universal, stabilida sul sistema decimal, e chiolta propri dalla natura, acciocchè resti permanent e invariabil, jessind che il metro lè la decimillesimesima part della distanza dal polo all'equator, val a di la intiera circonferenza del globo dividuda par quaranta milions di voltis.

Sora sta base si è plantat dut il rapuart dellis gnovis misuris; e a chist principi biellissim si è scomenzada da qualchi an a adattassi l'Italia come diviars altris pais dell'Europa. Io no podi altri che fàvila cognossi. Il rindila volgar dipend da nualtri che dall'uso, e uè o doman, anchia l'uso scomenzarà a viarzisi un poc la so strada. Ecco par intant dunchia il sistema: plui indenant chiatareso lis proporzions cullis nestrìs misuris: viodit ben di studialis.

Il *metro* lè l'unitat della misura lineal.

Il *chilometro* siarv par lis grandis distanzis, e lè una misura di mil metros linears.

Il *metro quadrat* lè l'unitat della misura di superficie.

L'*aro* (o *decàmetro quadrat*) siarv par lis grandis misurazioni di campagna.

Il *metro cubic* lè l'unitat par la misurazione dei cuarps, il cui volum consist in un solid.

Il *litro* lè l'unitat della misura dei liquiz, e consist in un decimetro cubic, val a di in t'una millesima part del cubo di un metro.

L'unitat dei pesos si dis *gramma*, che lè il peso assolut di un centimetro cubic di aga, distillida alla temperatura di 4 graz, e pesada nell'ued, al moment della so massima condensazion.

L'unitat della moneda lè una *lira* (obben *franc*), formada dal peso di cinc grammis d'arint, a nuv decims di bontat; val a dì in chè maniera, che contegni nuv parz di arint e una di ram.

Lis divisions e subdivisions di chistis unitaz principals si formin cul decim e centesim. Similmenti si jè formada la multiplicazion dellis unitaz stessis. Par chist an mi contenti dellis misuris linears, quadradis, itineraris e concavis; e ca sott vi dòl lis denominazions e il valor d'ogniduna, applicangi nell'istess timp il ragguaglio cullis misuris che son in cors ca di no. Un altri an vi darai ches che manchin, e un poc alla volta v'informarai d'ogni chiossa, e vi darai anchia lis tabellis di riduzion par spagnavi in ogni cas timp e fadia.

Misuris lineals.

Un metro forma	polliz di Vienna	38'
Doi metros formin	tèsis „ „	1' 0' 4"
Tre „ „	„ „ „	1. 3. 6
Quatri „ „	„ „ „	2. 0. 8
Cinc „ „	„ „ „	2. 3. 10
Dis „ (un decametro)	„ „ „	5. 1. 8
Cinquanta metros formin	„ „ „	26. 2. 4
Cent „ (un ettometro)	„ „ „	52. 4. 8
Mil „ (un chilometro)	„ „ „	527. 4. 8
Dis mil „ (un miriàmetro)	„ „ „	5277. 4. 8
Cent mil „ formin	„ „ „	52777. 4. 8
Un milion di metros formin	„ „ „	527777. 4. 8

Frazions.

Un decimetro (decima part d'un metro) jà polliz di Vienna 3. 9'''

Un centimetro (centesima part d'un metro) jà lineis di Vienna 4. 5. 5'''

Un millimetro (millesima part d'un metro) jà punz di Vienna 4 1/3'''

Un decimilimetro (decimmillesima part d'un metro) jà 5/12 circa di un punt di Vienna.

Misuris di superficie.

- Un milliara ($\frac{1}{10}$ di metro quadrat) lè ugual a lin. q.
25''' di Vienna.
- Un centiara (1 metro quadrat) lè egual a pis q. 1' 9''
di Vienna.
- Un deciara (10 metros quadraz) lè ugual a tesis q.
2.^o 4' 8'' di Vienna.
- Un ara (100 metros quadraz) lè ugual a tesis q. 27. 4. 9
di Vienna.
- Un decara (1000 metros quadraz) lè ugual a tesis q.
278. 4. 6 di Vienna.
- Un ettara (10,000 metros quadraz) lè ugual a tesis
q. 2784. 4. 8. di Vienna.
- Un miriara (1,000,000 di metros quadr.) lè ugual a te-
sis q. 278547. 2. 10 di Vienna.

Misuris di concavitat pai liquiz e par materis sechis.

- Un litro (decimetro cubo) lè ugual a polo-
nics o miez metzen di Vienna 0: $\frac{32\frac{1}{2}}{1000}$
- Un Decàlitro (10 decimetros cubos) lè ugual
a polonics o miez metzen di Vienna . . 0: $\frac{324}{1000}$
- Un Ettòlitro (100 decimetros cubos) lè ugual
a polonics o miez metzen di Vienna . . 3: $\frac{246}{1000}$
- Un Chilòlitro (1000 decimetros cubos) lè ugual
a polonics o miez metzen di Vienna . 32: $\frac{460}{1000}$

Frazions.

- Un Decilitro ($\frac{1}{10}$ di decimetro cubic) forma
circa polonics o miez mentz di Vienna . 0: $\frac{3\frac{1}{2}}{1000}$

Un Centilitro ($\frac{1}{100}$ di decimetro cubic) forma

circa polonics o miez metz. di Vienna . 0: $\frac{3}{10,000}$

Un Millilitro ($\frac{1}{1000}$ di decimetro cubic) forma

circa polonics o miez metz. di Vienna . 0: $\frac{3}{100,000}$

*Corrispondenza di altris misuris
lineals cul sistema metric.*

	Metros	Claster di Vienna			
		0	1	1	1
La tesa ordinaria o clast. di Vienna ja	1 89 $\frac{1}{3}$	—	—	—	—
„ „ di fortificazion o clft. di Parigi	2 —	1	0	4	
„ piartia o taula	2 28 $\frac{1}{3}$	1	1	3	
Il pid di Udin (6 par un pass)	0 34	0	1	$\frac{1}{2}$	$\frac{1}{2}$
„ „ milanes	0 43 $\frac{1}{2}$	0	1	4	$\frac{1}{3}$
„ „ roman	0 31 $\frac{1}{3}$	0	0	11	$\frac{3}{4}$
„ vattul	0 77 $\frac{1}{2}$	0	2	5	$\frac{9}{4}$
„ braz ordenari	0 67 $\frac{3}{4}$	0	2	1	$\frac{1}{2}$
„ „ di seda	0 63 $\frac{3}{4}$	0	2	0	$\frac{7}{4}$

*Corrispondenza di altris misuris di superficie
cul sistema metric.*

Un chiamp della nestra misura ja clasters di Vienna	1015
„ „ di Parigi	960
„ taulis	840
„ metros	1821
Un Juger	clasters di Vienna 1600
„ „ di Parigi	1513
„ taulis	1324
„ metros	3027
Una piartia consuaria veneta.	clasters di Vienna 278
„ „ di Parigi	263
„ taulis	230
„ metros	526

*Misuris di concavilat del pais,
ragguagliadis al sistema metric.*

a.) *pal vin.*

CORRISPONDENZA CULLA MISURA				
metrica		di Vienna		
Litros	Milli- litros (1/1000)	Emers	40/ sims	1280/ ins.
Orna di Gurizza (un orna = 6 sellis, 1 sella = 12 boccai) . .	104	935	1 28	731
Cuinz di Cormons (1 cuinz = 6 sellis, 1 sella = 10 boccai) . .	87	183	1 17	183
Cuinz di Gradischia (1 cuinz = 5 sellis, 1 sella = 12 boccai)	84	260	1 15	305
Cuinz di Udin (1 cuinz = 4 sellis, 1 sella = 16 boccai) . .	79	304	1 11	549
Cebar di S. Cros (1 cebar = 4 sel- lis, = 1 sella 12 boccai) .	82	789	1 14	369
Cebar di Sabla e Reifenberg (1 ceb. = 4 sellis, 1 sella = 12 boccai)	80	612	1 12	1097
Cebar di S. Daniel del Chiars (1 ceb. = 4 sellis, 1 = sella 12 boc.	79	304	1 11	549
Cebar di Dornberg (1 ceb. = 4 sel- lis, 1 sella = 12 boccai) .	76	251	1 10	—

b.) *pal gran*

	Litros	Millilitros	Polonics o miez metzen	16/sims	1000/ms.
Pesenal di Gurizza (1 pesenal = 4 quarz, 1 quart = 4 boccai)	25	716	0	13	23
Pesenal di Canal (1 pes. = 4 quarz, 1 qu. = 4 boccai) . . .	28	337	0	14	326
Pesenal di Plez (1 pes. = 4 quarz, 1 quart = 4 boccai) . . .	27	234	0	13	767
Pesenal di Reifenberg (1 pes. = 4 quarz, 1 quart = 4 boccai). .	30	153	0	15	256
Pesenal di S. Cros (1 pes. = 4 quarz, 1 quart = 4 boccai) . . .	33	184	1	0	741
Pesenal di Swarzenegg (1 pes. = 4 quarz, 1 quart = 4 boccai)	30	153	0	15	256
Pesenal di Tulmin (1 pes. = 4 qu., 1 quart = 4 boccai) . . .	19	917	0	8	682
Star di Gradischia (1 st. 6 pes.; 1 pes. = $\frac{4}{4}$; $\frac{1}{4}$ = 2 $\frac{1}{4}$ bocc.)	85	814	2	11	411
Star di Cormons (1 st. 6 pes.; 1 = pes. $\frac{4}{4}$; $\frac{1}{4}$ = 3 boccai) .	92	414	2	14	884
Star di Aquileja (1 st. 6 pes, 1 pes. = $\frac{4}{4}$; $\frac{1}{4}$ = 2 schiattulis) . .	90	129	2	13	581
Star di Udin (1 st. = 6 pes., 1 pes. = 3 schiatt., 1 sch. = 6 schiffs)	73	159	2	5	209
Star di Cividat (1 st. 6 pes.; 1 pes. = $\frac{4}{4}$; 1 quart = 2 $\frac{1}{2}$ boccai) .	77	254	2	7	76

*Misuris itineraris o di distanza geografica
e soi rappuarz approssimativs.*

		al grad.	Mis d' Italia	Chiló- metros	Tesis di Vienna
	Mia d' Italia o geografica	60:00	1:0000	1:85420	
	nell' uso	"	"	"	1000
	sulla proporzion del chil.	"	"	"	978 60/100
ITALIA	Mia milanesea	67:75	0:8930	1:65427	873 8/100
	" di Piemont	48:00	1:2490	2:31770	1223 23/100
	" di Napoli	57:71	1:0390	1:92770	1017 39/100
	" di Roma	74:70	0:7935	1:47190	776 83/100
	" di Toscana	68:75	0:8785	1:62967	860 10/100
	" di Vignesia	60:62	0:7199	1:33520	704 68/100
INGIL- TERRA	Mia di Londra	73:00	0:8220	1:52400	804 33/100
	" di Scozia	50:00	1:2000	2:22500	1174 30/100
	" d'Irlanda	40:00	1:5000	2,78125	1467 88/100
FRAN- ZA	Lega ordenaria	25:00	2:4000	4:45000	
	nell' uso	"	"	"	2400
	sulla proporzion del chil.	"	"	"	2348 61/100
	Lega postal	28:54	2:1022	3:89800	2057 27/100
	Mia ordenaria	15:00	4:0000	7:41660	
	nell' uso	"	"	"	4000
GER- MANIA	sulla proporzion dei chil.	"	"	"	3914 8/1000
	Mia d' Ungeria	13:20	4:5000	8:34375	4403 64/100
	" di Prussia	14:37	4:1790	7:74880	4089 64/100
	" di Sassonia	12:20	4:8549	9:00200	4751 55/100
DANI- MARCA	Mia di Danimarca	14:77	4:0616	7:53210	3974 80/100
	" d'Irlanda (Tynymannaleid)	3:00	20:0000	37:08333	19571 75/100
SVEZIA	— Mia	10:40	5:7693	10:69710	5643 69/100
NORVEGIA	— Mia	10:00	5:9999	11:12500	5871 52/100
RUSSIA	Verste ordenari	104:75	0:5760	1:06714	563 21/100
	Mia di Polonia	20:00	3:000	5:56250	2935 76/100
PAIS BASS	— Mia d'Olanda	19:02	1:8542	5:85500	3090 19/100
SPAGNA	— Legua neuva	16:66	4:5999	6:67500	3522 88/100
PORTOGAL	— Legua	18:00	3:3333	6:18050	3261 93/100
TURCHIA	— Agachs	22:00	2:7241	5:05100	2665 80/100
CHINA	— Li, o mia chinesa	192:40	0:3118	0:57820	305 16/100

**Tabella di riduzione delle misure di Vienna (in corso di nualtris)
con che usadis a Parigi, Londra, Berlin, e Pietroburgo.**

	Vienna	Parigi (sistema metric)	Londra	Berlin	Pietroburgo
Misuris di lunghezza	10 pis equitalin a	5 metros 16/100	10 Foot 57/100	10 pis 7/100	10 pis 57/100 (1 pid - 1/7 di Saschenes) 8 Saschenes 89/100 (1 Sasch. - 5 arschine) 74 Werste 10/100 (1 Werste - 500 Sasch.)
	10 testis ,	48 ,	20 Yards 74/100 (1 Yard. - 5 Foot)	4 Rathen 96/100 (1 Ruthe - 12 pis) 9 legghis 81/100	
	10 legghis postals ,	75866 ,	17 mis 14/100		
Misuris di superficie	10 Jugers uguai a	5 Ettaros 75/100	14 Acres imp. 22/100	21 Morgen 90/100 (1 Morg. - 180 Ruth q.)	5 Baseline 27/100 (1 Deset. - 2400 Sasch.)
Misuris per materis sec.	10 Metsen uguai a	6 Ettolitros 15/100	16 Bushel 92/100	95/100 di Malter (1 Malt. - 12 Scheffel)	5 Tcheveris 16/100 1 Tschew. - 2 Osmine)
Misuris per liqiz	10 Emers uguai a	5 Ettolitros 66/100	124 Gallons 52/100	8 Emers 25/100	44 Wiedros 54/100 (1 Wiedr. - 8 Osmuski)
	10 Boccai uguai a	14. Litros 14/100	24 Pintis 90/100	12 Quàrtii 57/100	8 Osmuski 90/100
Pesos	10 funz uguai a	5 Chilograins 60/100	12 liris 55/100	12 Reichspfund 98/100	15 Fuda 60/100
	10 Quintai , a	560 ,	11 Quintai 5/100 (1 quint. - 112 liris)	11 Centners 89/100 (1 Cent. - 100 Reichsp.)	54 Pud 25/100 (1 Pud - 40 Fuda)
Monedis	10 flurins M. C. -	25 Francs	1 lira sterlina	<div> <p>Si riconvertissi viceversa il franco o lira italiana, e la lira sterlina, dour di sta proportional unitaria.</p> </div>	
	1 flurin ,	2 fr. 50 cent.	2 scellins		
	50 carantans ,	1 fr. 25 cent.	1 scellin		
	20 ,	0 fr. 83 1/3 ,	8 denars		
	10 ,	0 fr. 41 2/3 ,	4 denars		

L' abecè dell' economista

Puor il puor, diss il proverb, e fortunat cui che no mangia pan di semula. Ma la richiezza no lè creada par dug'? Lè forsi un zug di paraulis la providenza?

L'economia social lè una duttrina benedetta che insegna a sperà, e a tradusi in effiet lis speranzis. Ogni galanton pol possèdi chel che possed il plui gran sior della tiara. Il plui gran sior della tiara pol colà sora il stran putrefat come il plui grand miserabil. Insegnà all'on a conservà il miei che possed o a acquistà chel che gi lè util o necessari — ecco il scopo dell' economia privada. Stabili la misura e la maniera della prosperitat comun d'un pais — ecco la definizion plui sicura dell' economia social o politica. — Fa produci, ecco il so principi; produci a bonmarchiat, ecco la so intenzion; fà produci dug' e par dug' — ecco il so scopo.

Vin dit, no sai dulà, ma in chist libri, che anchia la zwanzica ai nestris dis jà piardut la so lega. Consolinsi! Ogni diminuzion di valor del metal, lè un avvicinament del metal viars la puora int. Il metal lè il rappresentant dei valors e della richiezza — consolinsi! Lu vin dit anchia chist: La provvidenza al cussi; la vita dev daventà ogni di manco chiara.

Veso di savè ben, che la scienza della prosperitat social ja praticat chel istess che dutis lis altris scienzis: analizzand, ja suddividut ogni chiossa. Ja scuviart che in natura son dei *factors*, i quai Dio ju dona all'on parcè che ju fasi rindi. *Produrastu cul sudor della propria front* — nissuna veritat plui biella e plui vera di chista. Chialait il pais dei salvadis: una lega quadrada di terens basta appena appena par nudri miseramenti una sola persona; nell' Europa, una lega an di alimenta 1200. Ecco la differenza tra i *factors* natural, e i *factors* fecondaz dall'on che lavora. Ecco la distauza che passa fra l'element produtiv, e la produzion.

La tiara, l'aria, l'aga etc, son *factors naturai*, son elemenz necessaris alla produzion. Ma siccome che Dio ju ja daz gratuitamenti all'on, son staz clamaz *richiezza gratuita*. Dut ce che lè produzion del lavor uman si clamà invece *richiezza onerosa*, jessind che costand una fadia a cui che la produs, domanda par justizia una retribuzion, un compens, da cui che ja bisugua o desideri di gioldila.

Il fin della societad umana lè la prosperitat universal. In ce maniera si ottègnaraja chist benjessi universal della int? Mediant la soddisfazion plui completa che sei pussibil di dug' i bisuins della intiera umana famea. — In ce mud si soddisfaraja ai bisuins di duta la umanitat? Cull'equilibri universàl dellis fuarzis.

Fra lis veritaz riveladis dall'economia social, la prima lè chista: che la causa unica della produzion dell'on son i bisuins dell'on. — Lavor lè fadia, lè sacrifici. E cui lavoraress senza il stimul di soddisfà a qualche gran domanda della propria natura? — I bisuins dunchia oblèin al lavor; il lavor genera la produzion: la produzion par soddisfà ai propri bisuins sottintint il *consum*. Par conseguenza l'armonia perpetua fra produzion e consum lè l'equilibri dellis fuarzis che jo disi.

Cumò rispundemit: nell'umanitat no isial forsi ogni individuo nel timp istess produttor e consumator perpètuu, instancabil? — La risposta no pol jessi che affermativa. — E in ce consistia il lavor? Vin viodut la differenza che passa tra la *richiezza gratuita* del salvadi e chè dell'on della civiltat, l'europeo. Eppur, tant nella tiara dell'indian senza lavor, come nei terens dell'operos europeo, son press a poc chei istess principis di produzion. La differenza sta in chist: che nel prin, i principis produttivs stan come muarz, parcè che nissun ju clama alla vita; mentri fra i seconz labraura dell'on ju fas operà il fenomeno della rendita senza fin, o, come che si diss in economia, la *creazion dei valors*, la soddisfazion dei bisuins dell'umana famea. — Il lavor dan-

chia no lè nujaltri che il compless di ches operaziuns fattis dall'on o culla ment o cui braz lis quals jan l'abilitat di modificà la materia in mauiera, che finissi di sei inert o inutil ai nestris bisuins; o cun altris paraulis, il lavor lè chel travai, o chè applicazion di suarzis morals o materials, che siarv a chioli via dai oggez utii (i fattors naturai) dug' chei ostacui che impedissin la lor utilitat o la facultat di riesci a zovament della vita.

Se ogni on dunchia lè simpri *produttor* e *consumator* sulla tiara; val a di, se ogni individuo jà bisuins di soddisfà, e par soddisfaju prova la necessitat del lavor che gi procura i miez della soddisfazion, oçcor che a ognidun gi vegnin concedudis lis suarzis della produzion, la pussibilitat del lavor. E se il benjessi social depend dalla prosperitat plui universal d'ogni singal so membro, ecco che la societat dev consentì a ogni on dug' chei miez di produci, i quai bastin a pajà i soi bisuins; il compless, cioè, di chei *appetiz*, di ches *tendenzis*, e di chei *desideris*, i quai vegnin a constitui quasi diress l'attivitât passiva della vita.

Da chistis premessis, ecco lis consequenzis. I bisuins creïn il lavor; il lavor gènera la produzion; la produzion soddisfa al consum. I bisuins, la produzion e il consum devin chiaminà paralei. Chist equilibri no pol derivà che dalla pussibilitat che dug' Quang' produsin, quindi lavorin il plui che si pol. E se il lavor no lè nujaltri che una rimozion dei ostacui naturai che impedissin la produzion della richiezza gratuita, lè necessari rimovi parimenti a vantaz tant dell'individuo, come dell'umanitat, dutis ches difficultaz artificials che si opponin al lavor, all'att del produci, alla creazion insuma di chei valors che senza il lavor no si creïn.

Cumò dunchia 'o domandi: qualis son lis difficultaz del lavor? Jo lis jai clamadis artificials, sebben che tropis di lor stèin propri in natura. Ma jessind che la scienza lis ja distintis cul titul di *monopolis*, cussì l'artifici ven dallis istituzions, o dalla manchianza di provedimenz, o da provedimenz contraris al scopo — lis restriziuns, i

privilegios, lis castis. La me paraula, par consequenza, no lè propri a dissi fur di vada, e pol corri.

Un scrittor frances, al scriveva za ains press a poc sti paraulis: Distudait il soreli. No isial forsi il soreli un sechiador, che salta sora marchiat a chioli il pan fur di bochia ai fabbricators di chiandelis, di feral, di lampions, di lumins, di pavers, di mocchettis etc. etc., i quai fàressin bezzons se no fossin ches dodis oris di lus che al nus manda? — Ecco spiegad il sistema protezional, chel sistema che limita il numar dei produttors, e sosten il presi dei prodoz favoriz e privilegiaz; ecco dimostrada l'incoerenza di soccorri pos centenars di produttors, buttand in malora tang' milions di consumators, che di chel prodott jan bisugna.

Il principi contrari del monopoli lè invece la *concorrenza*. Dai secun passaz, fin cumò, si veva dit simpri: chist cà lè un pais: la so richiezza lè rappresentada dalla produzion: i prodoz esteros schiaffòin la produzion nostrana: impedingi dunchia l'entrada. Al di di uè invece si diss. Chist cà lè un pais: la so richiezza lè rappresentada dal cousum: il marchiat universal facilita il bonmarchiat: dilatin dunchia il cambi, fin che ogni-dun podi consumà tant che basti a soddisfà i soi bisuins. Ecco l'equilibri, la prosperità, il benjessi.

Dilatin dunchia il commerci. Pensin che ogni on lè produttor e consumator, e che il bonmarchiat universal se gi farà vodegnà manco gi farà anchia spindi manco. La misura di chist bonmarchiat lè la moneda che rappresenta i valors. Manco che costa la moneda, plui vodagna il lavor: e dug' lavorin, e dug' gioldin, e (chel che plui val par l'imperturbabilitat individual e social) dug' san, e possedin.

E i miez di fa chist? Il secul ju jà preparaz in gran part: istruzion, moralitat, lavor, possidenza: la gara universal del miei, culla pussibilitat di fà il miei e di gioldilu: la concorrenza della libera produzion material, intellettual e moral, fin che rivi a jessi parallela al cousum, fin che rivi a soddisfà nell'umanitat dug' e ogni-dun. Promessa di Dio, che — lejèt il vangeli e la viodareso.

QUATRI FREDURIS.

Chiaccaris son chiaccaris. Il mont lassa fevellà; e intant seguita a remenassi par aria, come un sgurlⁱ che trotta. Cumò jo uaress savè se son lis zirandulis dei nestrìs cervici che fan rondolà in sta maniera la tiara, o se son i tombollons della tiara che nus fan là attor il chiav senza sosta.

Chel che mi par che sèi sacro, lè, che dug' no jan i lor sentimenz a segno. Ma vegnaraja po la zornada dell'ordin, il di del judizi universal?

La vita lè un miracul, se la chiolin come vita. Ma lè un miracul non parcè che lè nassuda: buzaris! nassin pur anchia lis talpis. Ma parcè che dopo tang' guàis, dopo tang' fastidis, dopo tantis miseris dell'anima a no lè anchiamò propri muarta.

Ca saress dunchia di domandà, se al sei mior spietà o finila.

Ma la fede ul vè il so pensier e la speranza il so regno.

Dunchia? Dunchia tirin il flat anchia un poc. Uè la cros, doman il riposo, passandoman la gloria. Lè il judizi di Dio. Lè la vos della providenza che chianta cussi. La gloria dei elez, la gloria dei savis. E amen.

Pensait!

No pensino? — Sì, come il viar che sbusa la tiara!

Pensà veramenti, lè fadia. Parcè che il pensier domanda un scopo, e il scopo domanda una volontat. Cui pensa al dolor prima che al vègni? Cui pensa alla consolazion quand che il dolor lè vignut? Ognun al par che chiali indenant; e invece al viv solamenti di memoris. Ma il ricuardassi del timp passat senza un avvigni che nus clami, lè come plantà una cros

sora un muart, senza un flor che rignovi di di in di la so vita. La memoria sola, lè una poltroneria: se lè trista, lè un mal; se lè biella, un rimuars. Cui che no chiala indenant si dispera.

— Ma parcè si jajal di pensà tant e simpri? Qualche volta lè un ben di no podè pensà a nuja. —

Cui che si dispensa di chialà nel so cur ul di che no jà fede in sè stess o che ja paura di cognossisi, come cui che si desmenteja ce che lè stat, si dismenteja di chel che lè e di chel che sarà. La dismentejanza lè come l'ignoranza: no lè vita. L'ignoranza lè una viltat, la dismentejanza un ingratitudin. Pensà ul di vivi, imparà, insegnà, vè speranza, vè fede. Pensà ul di insuma operà. — “Ogni di una ria” diseva un savi dell'Italia antiga. — E i libris sanz nus disin: “Pensait che dug' corrin alla lizza, ma che un sol otten la palma. Corrit in maniera ognun di vo, che il premi al podi daventà uestri”.

La paraula.

E lo paraula? — Un don di Dio, la paraula! Socrate diseva ai soi discepui cussi: no saveso che dut ce che savin lu vin imparat dut quant cul ajut della paraula?

Ma no dut quant ce che ven dalla paraula lè un ben. — E par chist? Dio diseva al so fedel: se nella tiara della colpa chiatarai solamenti cinc jusg, perdonarai anchia a dug' chei tang' altris miars di colpevui.

Ma cui nus insegna a distingui la paraula vera dalla falsa? — Cui? la veritat stessa. Jo sai ben che i nestris viei van ripetind chel proverbi poltron e fariseo, che al di di uè i ochiuz menin a bevi lis ochis. Ma se una volta zoventut e ignoranza uareva di chel istess che vechiaja le paura, di cui erial la colpa? Se la paraula coraggiosa no zirava pal

mond cussi franchia comè cumò, a batti sulla coscienza dei trisg' — viarzet la storia — e chiatareso forsi che la veritat jera muarta? Che al foss vignuda dalla bochia ingrispada d'Esof, o da chè ironica di Socrate o da chè sorridint di Platon; che vigniss dai profez o dai jùdiz, dai apuestui o dai sanz paris, dai filosofos o dai poèz, la paraula della veritat si alzà simpri fra la int che spietava. E la veritat a superà i secui, e la paraula la fasè eterna, e anchia uè, crodemit, i soi apuestui no manchia.

Dut stà in chist, che nissun di nualtris al vehi di ripeti alla fin cul profeta Abacuc: “ Domine auditionem tuam: et timui „. O signor, jai sintut l'anunzi uestri, e ài vut paura!

Dunchia, ce fino?

Muri cullis mans in man, no lè vera?

Che Dio nus uardi! Jo, par me, jai stabilit di fà pluitost l'indian... Ma vualtris direso che lu foi za a chist ora. — No lè ver. Se vi meni par la lungia, no ul di che vi meni pal nas. Timp e pazienza, diseva la brava int d'una volta. E un filosofo grec al ripeteva: voi adàsi parcè che jai premura.

Cui che viaza cumò par lis Indis nus conta maravèis della vita patriarchal di chei popui. Son salvàdis, saveso. Ma chei res che duarmin sul teren come i nestris pastors di montagna, ches principessis che lavin la blanchieria sulla fontana, come lis nestris massaris, chel popul che viv cullis struscis della propria schena dug' in t'una maniera, jo, vi disi il ver, uaress viòdiu. Il me vizi le stat simpri la curiositat, e ciartis gnovitaz daress un voli a cognossilis. Lè par chist che, prima di straccami, jo disèi che uaress fà propri l'indian. Ma par tignimi su in vena mi confuarta chist'altra promessa di Dio: “ Par un poc di timp al dovrà soffri cun pazienza, e po dopo sarà consolat „. — Lè l'ecclesiastic che fevella cussi — e un libri sant a no falla.

Tradizions tartaris.

Fra i tartars (un altri popul dell' orient plen di fuc e di vita) son un mont di proverbis e di parabolis che corin par la bochia dei viei. Sintit sul nestri proposit chistis tre che vi conti. — Un zovin, puor ma brav, e plen di fede e speranza, al si sumià una gnot di jessi daventat un gran on. Un sun par chè int lè una profezia; e troppis voltis no jan tuart. Chiolinju come una rivelazion del futur, a si chiazzin daur a chè clamada, travàin e sùdin, e chel che no varessfat mai la fortuna al fas nassi la fede. — Il zovin dunchia al si dè a remenà subit cul cerviel ce che al varess vut di fà. Raccolz tre amis, quatri, dis, ving', cent, dusinta. Al si met a corri cà e là. Occupa un pais culla fuarza; conquista un second e un tiarz. Arriva al quart: lè un uess dur, una fuartezza che no si pol chiapà par nissun viars. Il zovin lè ustinat; lè zovin, inespert, ja pochia int, ma ul vinzila! Ven battut. La so pizzula truppa si dispiard; lui al dev schiampà sol fra i bosc, avvilit, perseguitat, senza speranza, nè confuart, nè coragio. Zirava fra i pericui di chel bosc da troppis oris. Jera strac, affamat. In un moment al viod fra lis plantis una puora capana. Entra. Chista una viela. Gi preja un poc di ristoro: ricev un plat di mignestra. Cull'aviditat della fan al chiazza una sidon plena in bochia. — E la mignestra scotava, e al dovè spudà fur dut cun premura, blestemand chel fregul di provvidenza e di caritat che veva chiatada. *Cui che no sa spietà paja il fio*, al disè allora la viela. Il zovin al pensà al sens di chisti paraulis. — Jera propri il so cas. — Precipizi lè disgrazia ciarta.

Il zovin eroe al veva beecat di schiampon chista fede, e al si rimetè in vita. Raccolz altra int. Si fas pluì suart. Spieta, combat, vodagna; polsa anchiamò, si rinfuarza, combat da gnov, e 'l vodagna.

Il so cur si sglonfa dal plasè. Pensa: cumò soi sigur; podi alzami . . . — E par la seconda volta lè vint, buttat sol nellis monz, plui avilit, plui distrutt della prima. — „ Dunchia il me sun jera fals; jo soi stat ingianat . . . ! “ e fremeva. — Un cai lava su par un arbul. Faseva un po di strada, po si fermava; tornava a là su, e si fermava, e chiaminava da capo. Il zovin stava a chialalu: lu viodè in ultin vicin a dà di volta fra i rams: il desideri di finì chè fadia lu fas tentà un ultin sfuarz, e senza tirà il stat volta — e jù a tombolon! — „ Maladetta la pressa! “ par che una vos a i favelli nel cur di chel zovin. Resta un moment pensieros; si ferma sora i soi cas; riflet e conclud: Cui che va planc vè ben; no lè piar-duda la prova.

Torna a fà int, a combatti. — Lè inutil! Anchia la pazienza no siarv. Lè destinat che al finissi miseramenti la vita.

Buttat par la tiarza volta a remèn, al si chiatà in un tuguri desert, e la so anima fuarta a sinti par la prima volta la vera disperazion. — „ A no lè propri rimiedi? pensava. Il plui grand ja di sei propri il plui disgraziat? Jera cussi granda la me speranza; la me fede no la varess cambiada cull'onnipotenza di Dio! Ma il numar dei nemis mi schiaffoja, e come che no soi riuscit chista volta no riuscirai mai, mai, mai! . . . “ — E strinzeva i pugn, e chialava denant di sè cun doi voi stralunaz, come par cirì nell'ued e nel silenzi lontan la speranza. Ma il spazi (al dis un brav scrittor italian, dal qual tradusi quasi di planta chistis ving' ultimis riis) il spazi jera limitat dalla muraja, sulla qual invece di chiatà la speranza a gi si mostrà . . . induvinait mo ce? una furmia. Anchia chista volta, Tamerlan (che cussì si clamava chel zovin) si fermà cui voi e cul pensier a chialà chel che viodeva. L'inset lava su adasi adasi, puartant in bochia un fruzzon di blava. Il

peso jera trop grand par lui, e dopo vessi rimpinad un poc al plombà ju cul so caric. E Tamerlan: „Ti stà ben!“ al sclamava crustand i ding' di plasè: „Sin compagns. Dinsi la man: maledizion a cui che no sà calcolà li sos fuarzis!“ — Ma cenonè, ecco che la furmia torna a fa la so strada cul so sporchez nella bochia. — Tamerlan trema: „che sei plui brava di me?“ — Ma l'inset ju un'altra volta. A nol si stufa par altri. Monta su in daùr, e cola, e torna e cola dis, ving' voltis di seguit. — Jera propri il **Da capo**! di chel galanton, che no chialava nujaltri che il scopo dei soi desideris. — E Tamerlan attent, senza batti palpebra, a spietà che si stràchi. Ma no! Il zovin eròe lè za da qualchi orali immobil, cun t'un ansietat che par propri una fievera, spietand l'esit di chel bal che gi pareva quasi un pronostic del so destin. Finalmente la furmia lè vicina alla so tana — trema — a barcola — chiad. No! lè entrada. — Salta sù Tamerlan consolat: „Perseveranza; ecco chel che manchiava. La fede e la volontat non ingianin!“ — E quatri ain dopo, tentat e ritentat il so destin, al veva un inperi grand sott di sè come dos voltis l'Europa.

Consequenzis.

Ebben? No vi quadra la brusa? — Sigur! La panza pai fics lè plui buna.

Ma cà jo mi sinti sussurà nellis uarellis: Par vignì dunchia al gloria, bisugna zujà dut s'una chiarata, rischià pan e fujazza? — Fradi, dut il mond no lè tartar. —

Cui disia nuja? Ce discors! Jo lu savevi anchia prima. Dut il mond no le tartar, come che ogni on no lè un aquila. Ma cui jajal fevelat che si jà di sei temeraris? Jo contavi una flaba: e po, si diseva par di, par nettassi il cerviel dalla muffa. Za il mond,

lu caplssi, lè biel parcè che ja anchia i mui e i becs e lis ochis! — Una volta sì, si podeva metti la man sul pett e chialà la bochia del leon senza sinti batti il cur dentri via. Ma cumò! Alla largia feminis!

Jo crodevi paraltri che un pensier si podaress semenà dentri ai chiavs che stan anchiamò in pis sullis spallis. Crodevi che la fuarza dell'anima foss viva anchiamò fin che lis bestis no jan distirat i uess nel sepulcri. No mi ricuardavi che il pensier a i fass propri i cuars: soffla e sburta.

Miseris.

E cussi lè — magari cussi no; io lu viodi: i muscui del cur a renzin. Pechiat che par strappòn-ziu si dev spietà la gusiela di Dio!

Ma cui che spuda cuntra il vint si spuda in duess, diss il proverbì. — Tant val dunchia di là indenant-là che al tira.

Ma sperà no lè muardi la tiara. E cui che al viv campa, e cui che campa pol gioldi.

Ma i mai? — Fait baruffa cui muarz cumò! Cui che ul uari a scottadet no si sana.

Braura lè di ridi quand che il cur si schiavezza: braura lè rompi il glaz quand che l'aga si squaja.

La fuarza in no' no nus pol chioli che Dio! E la fuarza plui granda, diseva un gran dottor della glesia, lè chista: *la resistenza passiva*. — Ah, no? Sintit chista flaba, e po se sès boins, rispundemit.

Un puorzelav, consumat dai ains, dallis fadiis e dalla scòria del so paron, stava sfinìt e miez muart sora il stran dei cadavers. Una cancrena schifosa gi roseava il flanc e i scolava a gota a gota il sang patrefat e la chiar che si disblettava a boccons. No si lamentava paraltri; e cun dut chel dolor, pareva che soridess ai curios che gi stavin intor a chialalu. Fra chisg', al capità anchia un miedi, il qual,

o par voja di provà la so art, o par caritat vera, o par caprizi di gustà la pazienza e il coraggio di chel disgraziat, al chiazza nellis mans il so curtiss inglazzat, e al si mettè a lavorà su ches chiars magagnadis fin che si mostrarin i uess blancs e nuz. come si ju pittura in un scheletro. Il pazient chialava e taseva. — Stupefat il miedi: « No tu jas anima che sinti, o sestu forsi senza anima? » al sclamà miez piccat, buttant via il curtis spore di sang che al fumava. — Ma: « Ce ustu che sinti? » al rispundè allora chè anima fuarta ridind: « Taja, taja fin che an dèl; un puor sclav soffrial forsi? »

Providenzis.

Fradis! Nissun mal senza un ben, dis la int. E un vieli diseva: « il mal dà coraggio, parcè che si ja speranza che al vadi ». E un filosofo chiantava: « dolor, fas pur il to mestier tant che ustu: za no mi farastu mai di che tu ses un mal ». — Ce vi parial?

Si; ma i guais no finissin! — Cui lè colpa? Siarait la stalla dopo che lè schiampat il vigiel! — Ma lis disgrazis che vegin? — Ce che lus uè il soreli! e il soreli lè vita! — Ma...? — Ma! Ma! Lè crepada la vachia, ma za vevi di vendila: storia antiga, che par nestra disgrazia, ogni di torna zovina!

Pluitost che chiata la providenza nel mal, no lè mior cìri la providenza nel ben? Cui che cir chiata, dis il proverbi; cui che bat si fas viarzi, cui che fila tiess, cui che semèna al cuèi, e chian di chiasa no falla, e fuc di fradis no chianta, e arbul del pais no si sechia, e voli di paron a nudriss il pujeri!

A podelu!

Si; lu capissi benon: la voja lè, ma lis suarzis? Finalmenti jan mangiada la fueja! Ma uaressin fà come il puor: chialà, e nettassi la bochia.

“Cun chist fuc jo uaress brusà il paradìs, cun chist'aga uaress distudà l'infar”; diseva una femina inspirada, corrind nel miez d'una plaza e puartand nellis mans un chialdir e una faglia. — Uaress distruzziu, diseva, a fin che l'on imparass a crodi che si pol vè una virtut nell'anima par la sola virtut e no par la paura d'un chiasti o par la speranza d'un premi.”

Ca no si fevella di un cuntra dug, ma di dug cun dug. — Una man lava l'altra, e duttis dos lavin la musa. E quand che si jè in chistis aghis, ualè ul di podè. Cui che no sa judassi si neja; ma cui che viod, proviod e si salva.

Saveso la storia dei tre anei? Dug tre jerin perfettement compagns, ma un sol veva la virtut di fà amà da dut il mond chel tal che lu possedeva. I tre fradis disputavin fra di lor; fasevin il diàu a quatri; ognidun uareva che il so foss il bon. Ma il judiz dezidè in sta maniera: — Alla prova! Faissit amà un a gara dell'altri. Dezideran. . . — Cui mo? — L'esit e i posteros.

E cussi in ogni roba; parceche saveso cui che lè imbrojat nel servizi? Cui che lè destinat par so disgrazia a fa i pugn cun qualunque che capita. “Ce faressistu se disint tu il to sè si pensassin dug i altris a di di no?” diseva il buffon a chè bestia di Filippo second, re di Spagna.

Che in quand a podè, basta jessi fur di pupit che nissun vi mettarà la chiavezza. — Dut sta in chist di vè un anima. — “La me spada lè curta”, diseva un zovin spartan a so mari. “Fas cont che sei lunga”, rispundeva la viela. “Ma no rivi”, tornava a di il fi. — “Fas un pas di plui”, ripeteva la femina. — E lè ver. Come che il pett del nemì lè simpri vicin quand che il propri nol trema, cussi la fortuna ti presenta sempre i chiavei se tu stas pront par chiapagiu.

Il plui che occor lè la fede. Quand che i chines

no san plui ce rispundi a un missionari che cerchia di convertiu, saltin fur cun sta storia: " Se la religion uestra foss la plui buna e la vera, l'imperator no podaress ignoralu, e par conseguenza al saress cristian anchia lui: uareso vualtris crodisi plui sapienz dell'imperator? „ — Lè dutrina chinesa; ma vualtris fasela d'aventà cristiana. E la maniera? — Vebit fede nella sapienza di Dio — e in vualtris."

Conclusion.

E culi io finissi. — Chiaccaris son chiaccaris, lu vin dit da principi. Ma chiaccaris no son frottolis. Il cur jà un desideri, la ment un pensier, la paraula un dovè, l'opera una volontat, la fede una meta. — Il pellegrin nol chiamina diband — e anchia la cros pol jessi una palma.

Una flaba par coda.

Ed ecco l'ultim periodo. Jo sai che tros mi varessin sparagnat la fadia di rivà fin culi. — Piess par lor. — " Tu uarestu che ti alzas allis stellis a cost di slambrati cullis mis sgriffis „ diseva l'aquila alla sbissa, che sivilava in ta jarba: " sivila pur, ma atrisciniti! „ — E Esof a una bestia che lu prejava di fagi di qualche chiossa di biel, di bon, di sensat, rispundeve: " La mocolistu? No diress forsi il mond tu ses d'aventat il moralista e jò l'asin? — Ma resta.





St.	1
Se.	2
P.	3
L.	10 - 0

Presi 24 carantans.

he tros m
 — Piess
 stellis a
 aquila
 , ma
 java
 nsat,
 and